

54644/13



7115

OBSERVATIONES
CHEMICAЕ
ET
MINERALOGICAЕ

QVAS
INCLYTI ORDINIS MEDICI
CONSENSU
IN ACADEMIA GEORGIA AVGVSTA
PRO GRADV DOCTORIS

LEGITIME IMPETRANDO
PUBLICE DEFENDET
AVCTOR
CHRISTIANVS EHRENFRIED WEIGEL,
SVNDENSIS POMERANVS.

DIE XXVII. MARTII MDCCLXXI.



GOETTINGAE, AERE DIETERICHIANO.

CHAMBERLAIN
MILWAUKEE
PRO. GRADY DOCTOR



SACRAE REGIAE MAIESTATIS SVECICAE

AB INTIMA FIDE

D O M I N O

C O M I T I

H A N S H E I N R I C H

de L I E W E N

REGIS REGNIQUE SVECIAE SENATORI
EXCELLENTISSIMO

SVMMO POMERANIAE SVECICAE ITEMQUE RVGIAE GVBERNATORI
ILLVSTRISSIMO

ACADEMIAE REGIAE GRYPHISWALDENSIS
CANCELLARIO CELSISSIMO

OMNIVM ORDINVM REGIORVM SVECICORVM EQVITI
ET COMMENDATORI DIGNISSIMO

MAECENATI OPTIMO

*Ob eximiam historiae naturalis, physicae experi-
mentalis, matheosque scientiam;*

*Et singulare studium quo inter maxime ardua nego-
tia quascunque scientias fouet*

Specimen hoc inaugurale

Humillime et deuote

dicat et consecrat

A u c t o r

Christian Ehrenfried Weigel.

P R O O E M I V M.

Speciminum inauguralium finem perpendenti mihi, non alius ille esse videtur, quam ut per prolixiorē singularis rei pertractationem, vel nouorum quorundam, in quadam scientia ad Rem Medicam pertinente, inuentorum patefactionem sensim Medica scientia magis magisque augeatur ac elaboretur. Ita vero fatendum quidem est, cum praecipuus artis medicae scopus sit, aegros sanare, sanos conseruare, etiam eas, in quibus practitorum argumentorum vnum alterumue pertractetur, dissertationes fini huic optime satisfacere. Cum vero, qui modo Academica studia absoluit, is tali experientia, quae ad eiusmodi argumentum rite elaborandum necessario requiritur, adhuc careat; nil in hoc genere prestare poterit, nisi quod haecenus de quadam re scripta colligat, cum se inuicem comparet, et in ordinem redigat, ubi tamen quoque contrariorum diiudicatio, deficiente experientia, admodum anceps erit. Nec inutilia censi possunt spe-

M V I O R T

cimina, quae in aliis scientiis, ad Medicam rem pertinentibus, versantur, licet non immediate inde eluceat usus Therapeuticus; cum hae scientiae elaboratae tamen permultum faciant ad fundamenta rite ponenda, quibus postea superstruantur Therapiae regulae. Arrisit mihi inter eas Chemia, iucundissima scientia, ad quam, tum Parentis optimi ductu, cum hîc loci ex Ill. ac Celeb. Praeceptorum praeceptis, ediscendam iam aliquamdiu allaboravi. Desumsi igitur ex adversariis laborum in patria sub Parentis directione institutorum aliquot experimenta, quibus alias quasdam observationes addidi. Breuibz omnia enarrare studui, nec nisi necessariam explicationem apposui. Quaedam eorum forsân Chemicis grata erunt, saltem tironibus non inutilia. Contentus ero, si quaedam ex iis momenta lectu non indigna censebuntur.



OB-

OBSERVATIONES CHIMICAE
ET
MINERALOGICAE.

OBSERVATIO I.

DESTILLATIO SPIRITVS VINI.

Spiritum vini vulgarem vendibilem (cuius semuncia in cochleari accensa, si deflagrauerit, duas circiter drachmas phlegmatis relinquit) rectificare, i. e. adeo concentrare, vt dicta quantitas accensa circa octauam partem phlegmatis relinquat; huncque *rectificatum* vulgo dictum, repetita rectificatione eousque concentrare, vt dicta quantitas, absoluta deflagratione, paucas solummodo relinquat phlegmatis guttulas, i. e. in *alcohol* vulgo dictum mutare, res est cuilibet pharmacopoeo nota.

A

Sed



Sed *alcohol fortissimum* parare, cuius semuncia post deflagrationem dictam ne minimum quidem relinquit phlegmatis vestigium, et cuius semuncia paucissimo, adhuc calido, pulverisato salis Tartari e. gr. granis duobus, in phiala affusa, post paucarum horarum digestionem, commota decenter phiala, nullatenus cum salis Tartari particulis coeat; simulque odoris et saporis amoeni, hinc ab oleo suo foetido liberatum, nec heterogeneis particulis impraegnatum; res est difficilior, in quam saepius summi Chemici operam ac industriam suam collocarunt.

Ad plurima experimenta alcohol potentissimum per dictos characteres diiudicatur, quare experimento a GODOFREDO *a)* proposito opus non est, et egere possumus tali Spiritu Vini, qualis artificiose describitur a IVGELIO *b)*, nisi ad peculiariora experimenta sublimioris Chemiae respiciamus.

Mediante abstractione super *Sal Tartari* multum, ad scopum nostrum obtinendum, effici posse scimus.

III.

a) in Actis Parisinis Anni 1718.
p. 37. seqq.

b) *Experimental-Chemie* p. 92.



III. ac Celeb. VOGELIUS, Academiae huius Lumen, Praeceptor mihi nunquam sat deueniendus, in *Institutionibus suis Chemiae*, hac de re eruditas profert observationes c). Idem hic Vir Experientissimus et Sincerissimus satis curiosum experimentum docet d), quo instituto alcohol vini tartarificatum a non tartarificato distinguui possit, quo autem deficiente solummodo ex effectu v. g. in vulneribus e), in vernice f), etc. differentiam detegere licuit. Interim mirandum sane, Sal Tartari, quod tantam ignis sustinuit torturam, quoad partem, vel minimum quoad aliquam partem constitutivam, in hac operatione volatile reddi posse, et cum alcohole per alembicum transuehi. Videtur certe hoc experimento stabiliri veterum regula: *si vis fixum volatile reddere, plus volatilis, quam fixi, sit in compositione; inversa ratione procedendum, si intendis volatile figere.*

Methodus qua usus KVNCKELIUS g), merito laudanda

c) v. gr. §. 390. 391.

d) in nota 2da ad §. 389.

e) tartarificatus in vulneribus facile inflammationes ciens ob acredinem suam.

f) quae, si cum tartarificato para-

ta, post siccationem facile rimas nanciscitur.

g) *Laboratorium chymicum Edit. Engellederi pag. 708 seqq. Laudatur et dilucidatur a TEICHMEYERO in Instit. Chemiae p. 81. et Ill. VOGELIO l. c. §. 391.*



danda est. Sed et aqua destillata alcoholi addita, re-
 tificationum numerum, impensas, et labores valde
 adauget, immo, cum semper principio alcoholi pere-
 grino sit imbuta, aliqualem minimum mutationem alco-
 holi inducet, id quod maiori gradu valet de aqua non
 destillata. Certe aqua fontana dulcis, pluuiialis, niua-
 lis, et praeprimis roris, saepius destillatae in quavis de-
 stillatione relinquunt portionem terrae, in aëre humi-
 diusculo deliquescentis. An haec terra sine salini prin-
 cipii connubio antea potuit in aqua solui, et soluta su-
 stentari? unde deliquescit, si adhaerens adhuc prin-
 cipium salinum non retinuerit? Cur in aquae, prae-
 primis roris, mense Iulio, praegressis diebus calidis-
 simis et sicca tempestate, collecti, destillatione lenissi-
 ma vasa vitrea destillatoria vtplurimum finduntur? an-
 non itaque semper principium salinum cum terra iun-
 ctum transit?

Cetera additamenta ab Ill. VOGELIO *b)* diiudi-
 cantur.

Quod ad scopum felicem obtinendum varia ma-
 chinamentorum genera sint excogitata, quorum quae-
 dam

b) l. c. §. 389.



dam laudanda, alia non item, scimus; quorum quoque mentionem fecit Ill. VOGELIUS i).

Saepius in Parentis, maxima pietate colendi, laboratorio institui, hanc circa rem, experimenta, instrumentorumque ad hanc rem idoneorum imagines in charta delineavi, quae cum iam ad manus non sint, imperfecta delineatione, huic dissertationi annexa, praesupposita, inuenta utilia narrabo, verbisque, quantum in mea potestate, illustrabo, quo B. L. contentus erit, donec, (si tempus vacabit, circumstantiaeque fauebunt) icones meliores instrumentorum chemicorum, tam emendatorum, quam recenter inuentorum, (quae iam in charta delineavi) in lucem proferre possim publicam.

Sequentia ut eo melius intelligantur, B. L. notet

I^{mo} me per *mensuram* Stralsundensem, vel (ut provinciali termino utar) *durch einen Pott*, intelligere mensuram, quae duas libras Lubecenses circiter capit; harum 36 constituunt *ein Ancker*, harum 6 *ein Oxhoft*.

2^{do} In adiecta tabula lineam horizontalem n. o. significare pavementum laboratorii.

A 3

Instru-

i) l. c. §. 392.




Instrumenta, ad rectificationem Spiritus Vini a me in vsum vocata, sunt sequentia.

Fig. I.

I^{mo}, *vesica* cuprea vulgaris tantae capacitatis, vt ad duas tertias repleta recipere posset 10 vel 12 *mensuras*.

Haec vesica in superiore superficie, medio loco inter collum vesicae *c*, et marginem vesicae *b*, rotundo foramine praedita, cuius diameter tres quartas partes digiti transuersi aequat. Super hoc foramen conferruminatus est tubus stanneus *a*, detornando excauatus, perpendiculariter positus, longitudine duorum pollicum, diametri, inferius foraminis dicti, superius vnica linea crescentis *k*), ita vt hoc cauum speciem coni detruncati, inuerse positi, prae se ferat. Prouide suber optimae notae foramini tubi dicti immittatur, obtegatur vesica bubula, probe in aqua emollita duplici, quae constringenda valide filo, infra annulum, quo tubus iste instructus est, tubulum dictum ambiente. His cautelis obseruatis decenter, sub destillatione, adeo forti, liquoris

k) nisi enim supra paullulum maiori amplitudine gauderet quam infra, epistomium suberinum non sat firmiter imprimi posset.



quoris spirituoſi ne minimum quidem per hoc foramen in auras diſpergi poſſe, mihi crede.

2^{do}, Veſica aut athanori, aut vulgari furno catini, aut portatili ex bractea ferri, aut ex lateribus conſtructo, iam immiſſa, illi imponitur *conus detruncatus* cauus ex ſtanno puriſſimo, interne et externe tornando paratus, longitudine pedum duorum. Inferius accommodatus ſit magnitudini colli veſicae, cui immittendus; ſuperius habeat foramen tres pollices diametro aequans.

3^{io}, Cono huic detruncato imponatur *alembicus* ex ſtanno puriſſimo paratus. Figura eſto ſimilis vſualibus vitreis alembicis, et hinc quoque inferior eius pars ambit, et in ſe recipit ſupremam partem dicti coni detruncati. *Roſtrum* vero in progreſſu ab alembico pauciores circuli gradus defleſcat a linea horizontali, quam roſtra plerorumque alembicorum ex vitro paratorum, quia longiſſimus tubulus huic roſtro applicandus erit.

4^{to} Roſtro applicetur *tubulus*, e ſtanno puriſſimo paratus, ita vt extremum eius extremum roſtri cingat. Longitudo ſit octo pedum, apertura circa tres quartas partes digiti tranſuerſi aequet. Terebra dum perforatur



foratur tubulus, id curae fit, vt nullae in eius foramine relinquantur foueae, alias aegre foramen depuratur.

5^{to} Alius *Tubulus* adhuc requiritur, eiusdem circiter longitudinis, cuius foramen recipere potest prioris tubuli extremum. Conficiendus dicto modo e stanno puro, vel, ad sumtus leuandos, e bracteis ferreis purissimo stanno obductis *l)* conferruminato; vbi vero duplex cautela obseruanda 1, vt margines bractearum sibi inuicem non incumbant, sed duntaxat in extremis se tangant; alioquin foramen tubi decenter expurgari nequit: 2, vt ne vsitata ad ferruminationem massa, e stanno bismutho etc. composita, conferruminentur, sed tantum puro stanno et resina; tunc vero super omnes iuncturas coaguletur stannum altitudine vnus lineae pollicis; stannum enim fluens sese non insinuat inter extrema bractearum, nec ea connectit, quia ibi ferrum nudum est, et nobis nondum innotuerunt encheireses, stannum vt ferro adhaereat efficiendi. Fig. 2. a. b. est hic

l) laminae ferreae non nisi purissimo stanno obduci possunt, quia alioquin splendorem non conseruant, vnde aequae tuto adhiberi possunt quam stanneae. Sique etiam forsan iis in

locis, vbi stannum inductum est, temporis successu ferrugine laederentur, haec in spiritu vini fundum peteret, nec noceret.



hic tubus in b. abscissus, transiens per alium tubum capaciore, quod per puncta indicatur.

Extremo huius tubi a. applicari potest vas recipiens vitreum, eae capacitatis vt circiter duodecim vel sedecim *mensuras* capere possit.

6^{to} Si nunc tibi fit volupe, omnes commissuras ope vesicarum suillarum, (in aqua tamdiu maceratarum donec intolerabilem fere factorem spargant, atque manubus tritae iisdem adhaereant) exacte claudere, infunde vesicae spiritum vini rectificandum per foramen a. ope Fig. I. infundibuli, claude hoc foramen dicto modo, et igne moderato destilla vt guttas decidentes distinguere possis. Sed tardus labor, et tamen, si gutta guttam fere tangat, spiritus non sufficienter refrigeratur, hinc eius multum perditur, et labor cum periculo incendii, licet tubus dictus notabilis sit longitudinis.

Potuissem breuiorem tubulum eligere, illumque per vas refrigeratorium ducere, methodo vulgari; sic potuissem destillare absque tanta temporis iactura. Sed

1^{mo} Tubuli vulgari methodo, oblique quidem, attamen linea recta, per dolium refrigeratorium ducti, mediocri

B

tan-



tantum refrigerant gradu; qui vero serpentino modo per dolia refrigeratoria ducti, non nisi ex cupro parari possunt, nec decenter expurgari ob structuram suam *m*); unde Spiritus Vini aut venerea labe inficitur, aut foetidus facile euadit a partibus impuris antecedentis destillationis. 2^{do} Nec in usu esse solet, recipiens vas vitreum tubo applicare et ope vesicae adglutinare, sed solent supponere excipulum, eique imponere infundibulum, quod intrat spiritus ex tubulo profluens, quando ad instar calami straminei profluit. Coguntur ad id faciendum, quia praevident periculum dispendionis vasorum, a spiritu non sufficienter refrigerato, alioquin oriundum. Qua vero methodo copiam vaporum spirituosorum in auras auolare vix mentione eget.

3^{tio} Vulgare vas refrigeratorium, scilicet sufficientis capacitatis, magnum occupat spatium, quare in laborato-

m) Laminae enim cupreae margines circum se invicem complicantur, dein malleo conuoluta haec commissura complanatur; unde necessario longitudinalis sulcus manet. Obiici posset, in tubo nostro e laminis ferreis stanno obductis, no. 5. descripto, licet maxime approximentur extrema, impuri quid adhaerere posse

quia stannum fluens commissuram non intret: sed optime expurgabitur, si finita operatione aqua per illum destillatur, posteaque vnco ferreo, cui stupa obuoluta, (qualis ad sclopeta expurganda adhibetur) interna eius superficies detergitur; id quod in prioribus curuata structura vetat.



boratoriis minoribus maxime incommodum est instrumentum. Requiritur insuper saepissime ministri praesentia in laboratorio, cum ad aquam vase refrigeratorio contentam agitandam, eum scilicet in finem, ut superior frigidior cum inferiore calefacta misceatur, tum ad refrigeratorium euacuandum et denuo aqua frigida replendum; unde etiam istud emergit incommodum, quod laboratorium claudere nunquam liceat. Demum notetur, non semper aequalem effectum per vulgare vas refrigeratorium obtineri posse; breui nimirum ante repetitam repletionem aqua refrigeratorii tepida euasit, hinc impotens, quae sufficienti gradu refrigeretur.

Laudanda quidem est inuentio aliorum, quando Fig. 7. ope antliae saepe noua aqua frigida in refrigeratorium ducitur, et quidem per infundibulum, quo frigida aqua specificè grauior descendit ad fundum refrigeratorii, unde calida refrigeratorii aqua, ut specificè leuior, ascendit, et accumulata per canalem lateralem, superiori parti refrigeratorii applicatum, effluit *n*). Sed sem-

B 2

per

n) vid. Fig. 6.

a. b. c. d. vas refrigeratorium.

e. f. tubus per quam destillat spiritus vini.

g. infundibulum per quod aqua fri-

gida antliae, ut grauior, ad ima refrigeratorii descendit.

h. canalis lateralis e quo aqua ascendens effluit.



per relicta hoc modo tepida aqua multum semper obstat sufficienti refrigerationi; et tamen refrigeratorium multum spatii in laboratorio requirit.

Nec minoribus incommodis laborant, qui aliis usitati sunt, alembici vase refrigeratorio cupreo instructi.

Bona igitur, rectaque via excogitata ad incommoda adducta remouenda, quam experientia comprobata exponemus.

Dolium capax o) ponatur in vicinia laboratorii, et a terra eleuatum sustineatur, ut fundus dolii aliquot digitos altior situs sit quam canalis Fig. 3. Ex vicina antlia p) ope lignei canalis, ferui ope, frigida aqua propellatur in hoc dolium, extra laboratorium positum, donec totum repletum sit; quod sub destillatione continuata fere omni sexta vel septima hora necessarium erit. In inferiore parte huius dolii lateraliter applicetur canalis, per quem perpetuo aqua ex hoc vase defluere possit determinato gradu, quare istiusmodi canalis orificium pro lubitu magis vel minus aperiri vel claudi posse debet; id quod per epistomium aurichalceum obtinetur. Si omni minuto temporis primo e dolio librà vna semis effluat,

o) v. gr. ein Oxhoft quod 6 Anker continet.

p) vel si haec deficit amphoris infundi potest.



effluat, sufficit haec quantitas ad necessariam refrigerationem spiritus.

Decurrat ex hoc aqua in alium canalem, vel ligneum superius apertum *q*) vel alium superius non apertum e. gr. per tubum ligneum, aut ex bractea metallica, aut ex corio paratum, per parietem laboratorii ductum, donec ad desideratum locum perueniat, et decurrat ab a. ad b. Fig. 3.

Cadit aqua in infundibulum c. Infundibulum hoc Fig. 2. intrat canalem d, cuius substantia est bractea ferrea stanno obducta, figurae cylindricae, diametri foraminis circiter tres quartas partes digiti transuersi aequantis, longitudinis tantae, vt eius superius orificium, quod intrat infundibulum c, circiter 2, 3, 4 digitos altius sit punctis inter h. et g. possibilibus *r*).

Nunc concipias tibi tubum e. f. g. h. eiusdem Fig. 2. figurae tubum a. b. ambientem. Tubus hic paratus e bractea ferri stanno obducta figurae cylindratae, tantae

B 3

diame-

q) vsus sum affere 2 pollices crasso, longitudinaliter sulco exarato.

r) alioquin enim lapsus aquae non

fat. altus foret, hinc aqua, quae in infundibulum c defluerat, inter istud et canalem d exitura esset.



diametri, vt vbique inter binos memoratos tubos maneat spatium tertiae partis vel dimidii digiti transuersi; longitudinis duorum pedum. Inferne ab e. ad f. clauditur hic capacior tubus per bracteam transuerse afferruminatam, medio duntaxat perforatam, pro transmittendo tubulo a. b. cui quoque firmiter afferruminatur, nulla relicta apertura. Tubuli d. inferius foramen, tubo dicto e. f. g. h. afferruminatum est antea facto foramini in tubulo hoc maiori.

Ergo aqua fluens e tubo d. defluet in tubum e. f. g. h., illumque replebit, et tubum a. b. in medio situm ambiet, quem tamen nunquam intrare valet, sed duntaxat refrigerabit, si fuerit calidus *rr*). E tubulo e. f. g. h. aqua perpetuo affluens perpetuo effluit per superius foramen apertum, quia locus inter g. et h. inferius situs quam suprema pars tubi d.

Vt eo melius mentem meam capiat B. L. consideret Figuram 4., quae fere vera magnitudine exhibet faciem extremitatis superioris, tubi capacioris e. f. g. h.,

rr) vi legis physicae: transire calorem e corpore quocunque calido in contiguum minus calidum, donec aequali gradu calida euaserint.



h., scilicet quae inter h. et g. continetur, et adspicitur si oculus in b. sit constitutus. In hac Figura 4, Fig. 4. minimus circulus est tubus a. b. (Fig. 2.) quasi sectus consideratus; medius circulus quasi sectum repraesentat tubum e. f. g. h. (Fig. 2.). Inter hos binos circulos conspiciuntur tria spatia minora z. z. z. vmbra notata, quae significant binos tubulos ibi connecti per intermedias tres bracteolas adferruminatas; sed duntaxat in hac extremitate, non vero per totam longitudinem tubi e. f. g. h. s). Spatia y. y. y. significant spatium inter binos tubulos (a. b. et e. f. g. h. Fig. 2.) intermedium. Repletur hoc spatium aqua refrigerante perpetuo affluente, et per has aperturas perpetuo frigide effluente in canalem infundibulo instructum l. m., e quo defluit Fig. 5. per pavementum laboratorii (cuius superficiem determinat linea horizontalis n. o.) in canalem t) ligneum p. q. Fig. 6. per quem continuatum laboratorium ab omni aqua refrigeratoria affluente liberatur u). Notandum insuper, cana-

s) his connectuntur bini tubuli ut semper aequaliter distantes maneant, ut aqua inter illos fluens, tubum a. b. (Fig. 2.) in omnibus punctis possibilibus refrigerare possit.

t) Simili usus sum qualem in nota q) memoravi, modo tecto,

u) Nam laboratorii Parentis pavementum atrio cingente altius est ultra pedem. Si hoc non esset, canalis ligneus p. q. pavimento incumbere deberet, finita operatione remouendus,



canalem infundibulo instructum l. m. posse parari commodissime e bracteis ferreis stanno obductis, et remoueri; tunc fouea, per quam pauimentum intrat, latere tegitur, ne eunti in laboratorio pauimenti inaequalitas alio tempore sit incommoda.

Ne vero aqua per aperturas y. y. y. perpetuo effluens, vi adhaesionis a g. (Fig. 2.) secundum longitudinem tubi decurrat, et ex puncto f. (Fig. 2.) decidat in terram, humectetque pauimentum laboratorii, sed omnis cogatur defluere in infundibulum (Fig. 5); omne spatium vmbra notatum, inter medium et maximum circulos (Fig. 4.) significat bracteam rotundam tubulo e. f. g. h. (Fig. 2.) in suprema parte h. g. ad angulum rectum per ferrurationem annexam; quod et Fig. 2. illustrat.

Omnis hic apparatus finita destillatione facile remoueri potest.

Tandem de vfu huius inuentionis dicendum erit. Si tubulus, per quem aqua e dolio extra laboratorium posito effluit, eo gradu aperiatur ope epistomii, vt, quando dolium ad minimam partem repletum, omni minuto



to primo effluat libra vna cum dimidia, sequitur paullo plus aquae proditum esse dolio prorsus aqua repleto ob maiorem pressionem; sed mensura desumatur a casu primo, ut sufficiens fiat refrigeratio. Certus itaque scio, tanto gradu eam posse destillari, ut, ad instar mediocris calami straminei, perpetuo possit spiritus in excipulum transire frigidus; et tubulus, quem transit, inter recipiens vas et locum refrigerationis erit frigidus, etsi breui ante refrigerationis locum ob calorem manibus tangi nequeat. Possunt igitur vnica hora octo librae alcoholis obtineri sine vlllo periculo. Protracta destillatione donec, qui transiit, spiritus lactescat, vel non amplius accendi se patiatur, aperitur foramen vesicae *a* (Fig 1.), siphone exhauritur phlegma, denuo per hoc foramen infunditur spiritus rectificandus, vel, si opus est, eodem modo aqua eluitur vesica et foramen rursus subere clauditur, quod duplici vesica bubula firmandum. Intra horam denuo incipit destillatio. Si velis longum tubulum depurare, aqua, qua eluitur vesica, destillet vnicam horam, et ab omni faetido odore et sapore depurati erunt tubuli, et denuo alcohol boni odoris ac saporis destillando obtinere poteris. Nec opus est, ut ignis exstinguatur, vel luta remoueantur.



Paruis his machinis destillaui spiritus vini vulgaris vendibilis sex *Ancker*, omnemque in iis contentum spiritum sub alcoholis *purissimi* specie obtinui, (paucis libris exceptis, quae in fine operationis transeunt, et usque ad nouum laborem asseruantur), intra duodecim dies. Si vesica loco decem vel duodecim *mensurarum* capere potuisset tres *Ancker* sine dubio opus absolutum fuisset circiter tribus diebus x). Verbo, quo maior vesica, eo rarius opus euacuatio vesicae per siphonem, ceteraque quibus operatio retardatur.

Hoc apparatu cessant incommoda antea adducta, et obtinentur commoda seqq.

- 1) laboratorii spatium non angustatur per vas refrigeratorium;
- 2) summus gradus refrigerationis obtineri potest;
- 3) omni possibili celeritate labor peragitur;
- 4) nil spirituosum in auras dispergitur;
- 5) toto

x) Si tunc maiori rinulo destilla-
verit, ob colli aperturam ampliorem
euaporatione, sub eodem gradu ignis,
fortiore, quidem omni minuto pri-
mo circiter tres librae aquae refrige-
ratoriae fuissent consumendae, hinc

dolium, e quo fluit, saepius replen-
dum; tunc vero quoque omni hora
circiter octo *mensurae* spiritus tran-
siturae fuissent, adeoque repetendam
dolii repletionem temporis compen-
dium compensaret.



- 5) toto labore perdurante, v. gr. per duas hebdomades, nulla lutatio soluenda, nisi quae suber in foramine vesicae firmat mutanda, quoties denuo spiritus affunditur. Nam, quae recipiens vas cum tubo iungit, lutationem mutare opus non est, si excipulum in ventre epistomio vitreo instructum adhibetur.
- 6) parcis pabulo ignis, quia furnus in serie continua calidus conseruari potest, cum alioquin, si pro quavis iteranda vesicae repletionem lutationes mutandae essent, methodo solita, cum residuum in furno ignis pabulum frustra consumatur, tum iterata operatione vnius saltem horae interuallum elabatur antequam furnus debito gradu rursus calefiat. Obtinetur itaque tam temporis, quam sumtuum compendium.
- 7) Si laboratorium bifariam diuisum, longusque tubulus transeat per parietem intermedium, illa pars laboratorii, in qua recipiens vas est, poterit obserari licet in altera parte famulus furno ingerat pabulum ignis.
- 8) parua tantum et viliora opus sunt recipientia vasa, ob sufficientem refrigerationem;



9) tandem labor peragitur sine omni periculo ab igne timendo.

Eaedem machinae adhiberi possunt ad destillationes rerum aquosarum, tunc autem cono detruncato alembicum sustinente opus non est, et alius maioris diametri alembicus vesicae collo immediate applicatur, nec longus tubus stanneus, no 4., necessarius, quia aqua facilius refrigeratur quam spiritus.

Obiicietur forsan, methodum dictam reiiciendam esse, si vellem spiritus acidos aliaque stannum arrodentia destillare, quia tunc tubulis vitreis opus est. Hoc verum; sed mutatis mutandis et in tali casu hic refrigerandi modus locum inuenit, de quo forsan alio tempore plura.

OBSERVATIO II.

MERCVRII IN PVLVEREM CONVERSIO PER SOLVM IGNEM.

Antequam ad hanc discederem Academiam, Pater meus cogebatur ultra sex menses ignem in Athanore alere. Curiositate ductus tentavi Mercurium (sic dictum) per se praecipitatum parare; quem in finem sequentia institui experimenta.

Emebam ex officina pharmaceutica argentum vivum, quod per alutam pressum *a)*, super chartam albam decurrens non splendebat ad instar argenti politi,

C 3

sed

a) traiectionem per corium non semper sufficere ad mercurium et metalla vnita denuo secernenda, sed plumbum, stannum, et Marcasitam ex parte simul cum mercurio corium

transire, iam BOHNIVS monuit in *Diss. Chymico-Physicis Lips. 1696. 8vo Diss. XII, §. 12. et Diss. XV, §. 8.*



sed potius ad plumbi splendorem debilem accedebat; charta, quae ei horizontaliter substrata erat, commota tardius iusto currebat; in cursu constitutum caudam chartae adhaerentem, eamque conspurcantem relinquebat; in minores partes diuisum non sphaericas repraesentabat, sed potius diuersa figura praeditas. Impurum ergo erat, hinc, antequam pro scopo meo obtinendo adhiberetur, depurandum.

Destillaui igitur hunc Mercurium per se ex retorto vase vitreo, cuius collo quadruplex charta emporetica circumuoluta, propendens ad aliquot digitos, et intrans ad aliquot lineas superficiem aquae in vitro patente supposito chartamque perpetuo humectantis *b*). Toto ventre retortae vbique ad collum vsque arena obruto,

b) Iam LVDOLFVS *Einleitung in die Chymie*. p. 371. huius encheiresis mentionem facit, praefert tamen, sine charta emporetica, partem colli retortae aquae excipuli immittere. Sed necessaria est ista encheiresis. Alioquin enim, si pars aperturae colli tantum aquae immissa, copia mercurii sub forma vaporum auolatura esset, et facile mercurius feruidus recipiens frigidum allidere, illudque findere, posset. Si vero totum eius lumen sub aqua demersum, tamen

collum retortae, ab aqua frigidum conseruatum, a globulis mercurii feruidis facile finderetur; sique ignis gradus ad tempus breue imminutus, aqua ex excipulo in retortam ascensura esset; sique recipiens retortae ita applicatum vt iuncturae lutatae, aqua calefieret nec mercurium sat refrigerare posset. Si vero tubulus chartaceus propendens duntaxat quartam partem pollicis aquae immersus, illo in casu, si aqua in retortam ascendere moliretur, potius ab aëre exter-



ruto, in catino ferreo oblique furno immisso, decenti ignis gradu destillabat Mercurius, nec poterat chartae poros transire, nec suppositum vas findere ob sufficientem refrigerationem, nec adscensus aquae ex applicato recipiente, aqua maximam partem repleto, quam intrare alias debuisset collum retortae, ignis gradu sub operatione forsan ad tempus remittente possibilis erat. Finita destillatione mercurius chartae emporeticae infundendo ficcatus, dein per conum e charta alba scriptoria contortum, apice subtilissimo foramine apertum c) mittendo ab adhaerentibus forsan chartae emporeticae fibris vel alio puluisculo liberatus, pristinam retinuerat indolem.

Hinc septem huius mercurii partes cum vna parte florum sulphuris pallidorum subuiridescentium, adeoque ab omni arsenico purorum, in aethiopem redegi
difficili

no comprimitur et ex aqua eleuatur; postea si aër tubulum intrauit, vel pondus mercurii destillantis illum aperit, extremum eius rursus in aquam cadit, et omnia in pristinum statum restituta.

c) per corium enim transmissus, semper quendam retinet puluerem, qui hoc modo chartae adhaeret. Vñ

fumus quoque cylindro vitreo, ope ignis in tubum capillarem ducto, qualem quoque commendat HUNDETMARK in *Diss. de Mercurii viui et cum salibus varie mixti summa in corpus humanum vi atque efficacitate etc.* Lips. 1754. p. 15. nota m. vitri tamen laeuor nimius videtur, hinc charta praeferenda cui tenerri- mus puluisculus facilius adhaeret.



difficili labore, scil. saepius instituta tritura et calefactione ad perfectam vnionem tandem obtinendam. Studio opus, ob magnam mercurii, respectu florum sulphuris, quantitatem difficillimum, aggressus sum, et absolui, ne in subsecutura reuiuificatione maior florum moles retortae collum nigredine inficere, suffocantibus vaporibus laboratorium replere, mercuriumque transiturem nigredine sulphurea inquinare posset.

Aethiopis huius reuificatio cum triplo *d)* calcis viuae debitis cautelis, partim iam dictis (scil. respectu apparatus vasorum) instituta; qui transiit mercurius, terendo primum cum aceto vini destillato, dein cum sale culinari, a signis malis commemoratis liberari nequibat.

Eiusdem aethiopis partem vnā cum triplo salis tartari mixtam dicto modo destillaui e retorta, e vitro Megapolitano e nigro viridi *e)* durissimo parata, reuificatumque mercurium dicto modo terendo, et siccatum
per

d) vt tutiori via irem, cum aliquin duplum suffecisset.

e) hoc vitrum durissimum est, ob paucas partes salinas, quas continet;

tale vero opus, quia retorta probe excandescere debet, quo casu facile colliquaretur, si vitrum multas partes salinas contineret.

per conum chartaceum mittendo ab adhaerentibus forsan quisquiliis liberare tentavi; sed nec hocce artificium successit.

Vidi itaque adductas in arte receptas methodos non semper sufficere ad mercurii perfectam depurationem.

Reuificationem aethiopis per limaturam martis meditate omisi, quia alio tempore mihi male successerat, dum reuificatus mercurius criteria mala adducta prae se ferebat, et sine dubio LVDOLFFVS *f*) fidem meretur, scribens se semel ad mercurium e cinnabari reuificandum, deficiente limatura martis, squamas ferri sumsisse, ubi pars ferri simul transiuerit, dum maius pondus mercurii obtinuerit, et hic quoque spissiusculus fuerit. Putavi forsan rubiginem aliqualem limaturae simile quid praestituram fore. Hinc quoque, quas quidam ad mercurii destillationem commendant, ferreae retortae minus laudandae videntur, cum, licet quidem mercurius cum ferro, sine interueniente intermedio quodam, in amalgama abire non soleat, tamen forsan vi ignis coactus



ctus et in subtilissimos vapores resolutus in illud agere possit, cuius pori tunc quoque vi ignis dilatati.

Notanda hac occasione censeo, quae BOERHAAVIVS in *Opusculis*, et quidem *Dissertatione de Mercurio prima atque secunda* docet, quod mercurius metallum continens leniori igne transiuerit, et partes metallicas secum rapuerit.

Forfan magna pars mercurii venalis impura reddita per reuificationem praegressam e cinnabari natiua, addita limatura martis g). Forfan dantur artifices, qui mercurium cum lucro e plumbo h) vel stanno etc. parant, qui forfan specificam qualitatem matris suae retinet, nulla arte ab illo separabilem.

Uterius quo minus mercurium hunc experimentis subiicerem, impediuit casus, quo vitrum illum continens frangebatur, maximaque mercurii quantitas in pauiementum laboratorii dispergebatur.

Vt

g) SCHLÜTER *Probier - Buch* p. 80.

h) vti simplicem viam indicat GROSSE *Recherches sur le Plomb* in *Actis Parisiis* Anni 1733. Plum-

bum in spiritu nitri diluto soluit, unde pulvis griseus fundum petiit, quem mercurialem esse comperit. Prolixiores aliae a KVNCKELIO, NEYMANNO, LVDOLFO, HENCKELIO aliisque traduntur.



Vt itaque certe purum obtinerem mercurium, re-
vificaui Mercurium sublimatum corrosivum venalem cum
triplo Salis Tartari, et obtinui mercurium ab allegatis
mendis liberum, qui etiam super laminam ex argento
purissimo factam politam, calore in auras dispersus,
nullam maculam gryseam (quae scil. contenti metalli
calx foret) reliquit. Num hac via semper purissimus
obtaineatur, an duntaxat ad hunc sublimatum a me em-
tum olim ab artifice purus mercurius adhibitus fuerit,
aliis diiudicandum relinquo, dum saepius repetita ten-
tamina requiruntur, antequam phaenomena quaedam
ad certas leges reducere liceat.

Ex purissimo hoc mercurio reuificato, exactissimo
ignis regimine observato, paravi multorum mensium
spatio Mercurium (sic dictum) per se praecipitatum,
coloris rubelli ad instar minii *i*), qui a solis radiis illu-
minatus viuidum rutilum splendorem oculo spectatoris
obiiciebat.

D 2

Enar-

i) Mercurium diuturna digestionem
in pulverem mineae rubedinis abire
negat BOHNIVS l. c. *Difs.* VIII.
§. 14. 28. et tantum gryseum colo-
rem nancisci affirmat. Quod tamen

experientia, et tot recentiorum scri-
ptorum testimonia sat refutant. Sine
dubio ille non omnes adhibuit enchei-
reses necessarias.



Enarrabo quasdam encheireses, quas ad processum feliciter absoluendum vtilis et necessarias iudico.

- 1) Non minor quantitas quam marca vnica, seu libra semis, mercurii viui sufficit pro vitro vnico; alioquin pondus mercurii, vi ignis in collum vasis propulsi, non sufficiet, vt rursus in fundum decidere possit, sed, qui ascendit in collo haeret, in fundo nullus manet, adeoque frustra labor instituitur, vt etiam recte monuit *LYDOLFVS k)*.
- 2) Vitrum continens sit phiala plani fundi, (*Setz-Phiole* vocant) e vitro crySTALLINO conflata; cuius colli apertura vbique dimidium, ad summum tres quartas partes digiti transuersi *l)* aequet; longitudo colli sit quatuor pedum, plani fundi diameter circa trium vel quatuor digitorum. Accedit quodammodo ad hunc scopum vitrum a *ZWOELFERO m)* delineatum, sed fundus nimis latus est, vnde si non vbique mercurio tectus, hic refrigeratus e collo decidens vitrum franget. Angustior di-
cto

k) Einl. in die Chymie. p. 225.

l) si enim collum infra amplius est, copia mercurii ad tempus adhaerere potest, quae interea ignem non

experitur, vnde tardior progressus operationis.

m) in *Mantissae, Pharmacopoeiae Regiae annexae, P. I. Cap. VIII. p. 500, 501.*

Etō autem non esto, cum superficie mercurii minore opus silentius progrediatur.

3) Orificium phialae charta, filo circumligata, sufficienter claudatur contra illapsū impuritatum, non tamen omnis nexus aëris in vitro contenti cum aëre ambiente impediatur. Iubent STAHLIUS ⁿ⁾, BOYLE, aliique phialae collum colliquari; quo casu vero facile phiala finderetur, licet ea, quam suadent, cautela adhibita, ut antea aër phiala contentus calore rarefiat ^{o)}; nec opus est haecce, sic dicta, hermetica sigillatio, cum sufficiat, lumen charta tegendo, illapsū alienarum particularum arcere, dummodo collum phialae sit longitudinis iam (N. 2.) memoratae.

4) Decens ignis gradus adhibendus. Est hic, si perpetuo mercurius eleuatur ad vnius, vel ad summum duorum pedum altitudinem et rursus decedit in fundum; quod ex deargentato quasi colli colore in plurimis punctis, in aliis autem punctis ex globulorum mercurii descensu cognoscendum.

D 3

Sed

ⁿ⁾ *Fundam. Chemicæ. P. I. Norimb, 1746. 4to p. 130. §. 20.*

^{o)} uti KVNCKELIUS p. 229. iubet.



Sed in ventris arenae immerſi *p*) ſuperficie interna parum vel nihil currentis mercurii apparere debet, ob calorem notabilem, quo, qui decidit, breui in vapores reſolutus, in collum redit. Iam praecipitata pars aut ſub ſuperficie arenae, aut immediate ſuper eandem domicilium habeat vt magis fixa.

5) Diuturna operatione, vltra ſex menſes protracta, tandem omnis mercurius in dictum puluerem rubicundum conuerſus fuit.

Mira fane res, Mercurium, inter metallica corpora minime deſtructibilem, ſola ignis actione, ſine alius corporis additione adeo immutari, vt ſibi nequaquam ſimilis maneat, et oppoſitas maxime proprietates acceperit; quare non incongruum videtur breuibus explicationem huius mutationis tentare; diffuſam enim diſſertationis limites non patiuntur, nec conſummatam tradere tironis vires permittunt. Optime autem tradetur, ſi ſingulas ſeparatim recenſebimus mutationes, quas

p) Docent quidam phialam duntaxat arenae imponendam eſſe, ſed tunc labor fruſtra in diutiſſimum tempus protraheretur. Sed iuſto maior calor quoque non eſto, vt ſcil. fun-

dus phialae candefcentiae propinquus ſit, quia tunc pars mercurii calcinata ſtatim ruruſ reuificaretur, adeoque in caſſum labor inſtitutus.



quas Mercurius hac operatione patitur; quae sequentes sunt.

I) *Ex corpore*, minimo caloris gradu semper *fluid*o, nec nisi frigoris artificialis et naturalis summorum, coniunctorum, vi in solidum corpus coercendo q) *mutatur in massam puluerulentam*, nullo pristinae fluiditatis vestigio relicto. Studuerunt hocce phaenomenon explicare varii varie. Sic BOYLEVS r) e corpusculorum mercurium constituentium, per innumeras reuolutiones, arctiori connexione s), viscositate quadam t) explicare studet, cum mutatione albuminis oui comparat, vel ex particularum crebra euolutione simili cum vitrorum laeuigatorum cohaesionis modo deducit u). Quae omnia autem minus probabilia videntur, et ab illo ipso tanquam coniecturae duntaxat afferuntur. Nec comparare licet hoc phaenomenon cum metallorum imperfectorum calcinatione. Haec enim vi ignis phlogisto suo, quod illis metallicam formam dare sat euiectum cenfeo, orbantur, quo in auras profugato, principio cohaesionis suae priuata, in puluerem dilabantur necesse est.

q) vid. ACT. PETROPOL.
r) In *Historia Fluiditatis et Firmi-*
tatis P. II. in *Opp.* Colon 1680. edit.

s) Sect. 51.
t) Sect. 52.
u) Sect. 53.



est. Mercurius autem hactenus nulla arte phlogisto suo orbari potuit, et in hoc adeo perfectioribus metallis, auro puta atque argento, antecellit, quae e quibusdam cum salibus combinationibus nonnisi addita substantia inflammabili quadam reduci possunt, cum mercurius contra, innumeris licet combinationibus, formisque tortus, semper tamen in peculiarem sibi formam fluidam metallicam reuertatur, sine ullius inflammabilis additione, dummoda ab eo, quod, illi combinatum, formam eius immutauit, debitis encheiresibus liberetur x), unde

x) Adducunt quidem BOHN l. c. Diss. XIII. §. 12. RHENANVM et HARTMANNVM ex argento et mercurio quandam vitri confectionem docere, cui tamen successum deneget; et STAHL *Fund. Chem. P. I. p. 129. §. 18.* BECHERI assertum: Mercurium ope spiritus salini ita immutari posse, ut non amplius in formam currentem reduci possit, nisi addito puro metallo, quod tamen nondum experientia comprobatum affirmat, adeoque de eo merito dubitat. Et *ibid. §. 22.* experimentum aliud, ubi scilicet mercurius retortae tubulatae candefactae ad paruas portiones iniectus, in aquam limpidam conuersus, in recipiens vas transeat; sed et hanc, leni destillatione, in pristinam currentis mercurii formam redire affirmat. Plurima de mercu-

rii in principia sua resolutionis difficultate auctorum testimonia adducit HUNDERTMARK in *Diss. de mercurii viui et cum salibus varie mixti summa in corpus humanum vi atque efficacitate, eiusque cum sulphure coniuncti virtute in idem nulla* Lips. 1754. nota g. ubi vero notandum, duo, quae in contrarium adducit, experimenta non sufficere pro declarando contrario; nam mercurii per se calcinati rubri vitro caustico in vitrum mutatio dubia adhuc manet (si scilicet mercurius antea alio metallo impraegnatus non fuit) cum facillime ibi fallacia committi possit, uti quoque de metallorum nobiliorum per vitra aut specula caustica vitrificatione lis est inter magnos viros; ergo hinc nondum probatur, terram vitrescibilem mercurii principia ingredi; et quod secun-



de etiam mercurii e combinationibus cum aliis corporibus restitutionem sub reliquorum metallorum reductione comprehendere noluerunt, sed proprio reuificationis nomine insigniuerunt Chemici.

Iure itaque affirmari posse arbitramur, hanc mutationem particularum quarundam ex igne accessioni tribuendam esse, quae interstitia particularum mercurii penetrent, longaue temporis mora illas ita a se inuicem separent, illisque adhaereant, vt conatui earum sese coniungendi sufficienter resistent, ynde soluta cohaesione in puluerem secedant, quod adhuc magis probabile reddit

2) *Ponderis augmentum*, quod mercurius hac operatione accipit y). Commune hoc habet cum plumbo z) et regulo antimonii aa) quae quoque calcinatione

secundo ex turpethi mineralis colore flauo deducit phlogiston, inde demonstrari posse non censemus, cum hic color, vti postea dicetur, potius particularum, alius indolis, ignearum effectus esse videatur; saltem hoc modo phlogisto suo priuari nequit; adeoque verum manet, nondum notam esse artem, qua mercurius in principia sua resoluatur.

y). Testantur hoc ponderis augmentum, et quoque ex retentis particu-

lis igneis explicant LEMMERI in *Coniectures sur les couleurs differentes des précipités du Mercure*, in ACTIS PARIS. 1712. p. 57. et HOMBERG, *Du Souffre Principe*, in ACT. PARIS. 1705. p. 92.

z) vid. Ill. VOGELII, *Prolus. de Incremento ponderis corporum quorundam igne calcinatorum*. in *Opusc.* p. 68.

aa) Sed debita encheiresis adhibenda, quam docet Ill. VOGELIVS in



tione rite instituta pondere augentur. Cuius phaenomeni ego quidem nullam aliam perspicio rationem, quam quod particulae ex igne accesserint et particulis mercurii adhaerentes totius massae pondus maius reddiderint. Nam, ut alia taceam, quam KVNCKELIVS *bb)* de pororum imminutione, indeque oriunda maiori gravitate specifica profert, assumere nequeo, cum potius contrarium contingat, dum scil. metalla calcinationis vi in pulverem dilapso volumine augeri, et poros magnitudine augeri, hinc licet gravitas absoluta aucta, tamen specificam imminutam esse, necesse videatur.

3) *Color ruber* mercurio per hanc operationem conciliatur. Circa hunc explicandum varii varie desudarunt. Ut ZWÖELFERVM taceam, qui rubedinem omnesque colores in se habere mercurium dicit *cc)* cui vero contradicit KVNCKELIVS, qui tamen quoque improbabilem, ex viscosae materiae extrorsum pulsione, vel terrae quadam per calorem accensione, explicationem exhibet *dd)*; probabilior videtur recentiorum veluti

LEM-

in *Diss. Anal. Chem. de Vitro Antimonii*. Opusc. p. 162. nota i.

bb) *Laborat. chym.*

cc) *Mant. Spagyr.* cit. p. 502.

dd) *Lab. chym.* p. 227. 228.



LEMMERII *ee*) et HOMBERGII *ff*) sententia, rubedinem hanc accessioni quarundam particularum ex igne deberi; quam etiam sententiam WIEGLEBIUS nuper nouo experimento confirmauit *gg*). Si enim consideramus vias, quibus mercurio rubedo conciliatur, erit vel sicca scil. vi ignis, vel humida vti praecipitatione. Priorem si perpendimus, vel 1) sulphure, vti cinnabaris aut acido nitroso, vti sublimatus ruber KVNCKELII, iunctus in altum euehitur; vbi ignis actionem necessariam esse nemo negabit, cum ibi nunquam sine illa rubedo e mercurii et sulphuris miscela oriatur, aethiopis mineralis exemplo *hh*) et WIEGLEBII experimentum, mercurium viuum vel variis formis immutatum affuso spiritu fumante sulphurato Beguini rubedine cinnabarina imbuendi *ii*), necessariam particularum ignearum accessionem probet; ruber vero ille sine addito sulphure ope acidi nitrosi sublimatus etiam iis immixtis rubedinem debere videatur *kk*); vel 2) solus per se aut salibus solutus calcinatorio igni subiicitur; vbi vero rursus ibi nil nisi igneae particulae accedunt *ll*), hinc autem rubedo

E 2

non

ee) l. c. in ACT. PARIS. 1712.

p. 41. seqq.

ff) ACT. PARIS. 1705.*ii*) ib. p. 37. 41. 50. 52. et alibi.*gg*) *Kleine Chymische Abhandlungen. Langensaltza. 1767.**kk*) ib. p. 46.*hh*) cf. WIEGLEB l. c. I. *Abh.**ll*) et accedere debere patet ex eo, quod mercurius in vitro molendinae fullo-



non fit, nisi postquam omne salinum profugatum sit, quod non solum e vulgari mercurio praecipitato rubro patet, qui, quam diu quid acidi nitrosi illi inest, albus est, dein cessante vaporum rubrorum transitu per flavi coloris gradationes in rubrum abit *mm*); sed et ex praecipitati albi vulgaris per sufficientem calorem, auolante sale, in rubrum mutatione *nn*) perspicitur, unde simul argumentum desumendum contra theoriam eorum, qui hoc phaenomenon ab yrinoso acidi nitrosi deducere cupiunt. Quod vero alteram viam attinet, in mercurii e solutionibus, per alia corpora, rubro colore praecipitatione, etiam negari nequit, omnia ista corpora, quae hoc efficere valent, particulis igneis impraegnata esse, et pro maiori earum copia retenta quoque magis rubrum colorem producere *oo*); quo et Turpethum minerale referendum, cuius flauedo etiam a particulis in oleo vitrioli praesentibus *pp*) deducenda videtur. Sequitur ergo e dictis, colorem rubrum mercurii tum aliis corporibus iuncti, cum praesertim per se in puluerem rubrum

fulloniae caudici tundenti per octo menses appenso quidem in puluerem abierit sed nigrum. BOERHAAVE in Act. ANGL. N. 430.

mm) WIEGLEB *l. c.* IO. *Abh.* p. 159. 161. et acidum nitri nullum

remanere p. 163 --- 165. et LEMMERI *l. c.* p. 57.

nn) LEMMERI *l. c.* p. 58.

oo) *Idem l. c.* p. 61. 62.

pp) MEYER *Chem. Versf.* p. 163-168.



rubrum, vi ignis, redacti, accessioni particularum quarundam ex igne deberi; id quod prolixius supra citati viri demonstrant qq).

4) *Reuificatio per solum ignem*, sed fortio-rem. Quo ipso etiam demonstratur, mercurium hac operatione non per phlogisti iacturam, vti metalla imperfecta, sed per alienarum particularum accessionem in calcem verti. Explicatio autem in eo consistit, quod vi maiori ignis eleuatus mercurius ab adhaerentibus particulis igneis deferatur, adeoque in pristinam formam redeat; cui quidem forsan obiicietur, quâ fieri possit, vt ignis, qui antea partes apposuit, nunc easdem demat; sed facile refutari censemus, dum hoc argumentis a WIEGLEBIO rr) ex naturali mercurii conditione, mercurii volatilitate, et natura huius substantiae elementaris igneae respectu ad mercurium considerata, desumptis haud difficulter explicare posse videtur: quibus ad-

E 3

dendum

qq) et MEYER p. 94. contendit causticum cum omnibus corporibus inflammabilibus rubedinem creare. Num igitur rubedo hîc fit e coniunctione particularum ignearum et phlogisti mercurii? foret saltem ita explicanda, si mercurium speciale

metallum, aequè ex principiis suis compositum ac cetera, assumeremus esse. Sed alia metalla rubrum ab igne assument colorem licet phlogisto suo orbata, v. g. plumbum. Num itaque a mercuriali principio pendet?

rr) Io. Abh. p. 171-174.



dendum venit, quod in minori ignis gradu, lentioris motus causa, adhaerere potuerint particulae, quae aucto igne per rapidum motum auferantur. Et veritatem illam testatur minii et calcinati antimonii per ignem in vitrum conuersio, vbi quoque, quae antea ponderis augmentum effecerant, particulae igneae rursus profugantur ss). Et ignem maiori gradu applicatum destruere posse effectum, quem minori produxit, patere videtur e gypso, quod debito ignis gradu facultatem illam cum aqua in lapideam massam coeundi obtinet, nimio rursus amittit; quamuis hoc simile isti phaenomeno, de quo sermo nobis est, non penitus respondere facile concedamus, cum in calce viua et salibus alcalinis fixis contrarius effectus appareat, quae scil. quo diutius ignis actionem experiuntur, eo maiori gradu caustica euadunt.

5) *Fixitatis quidam gradus*, quem mercurius hac operatione obtinet. Testantur scil. auctores, hunc mercurium in puluerem rubrum conuersum eo gradu ignis non eleuari, quo viuis transit, sed insigniter maiorem exigere, adeoque ignitionem ad tempus ferre. Difficilis

ss) HOMBERG l. c. in ACT. PARIS. p. 94.



cilis quidem videbitur explicatio, quâ particulae igneae et mercurius, quippe duo corpora volatilia, combinata fixius corpus constituent. Si vero ex analogia aliquid concludere licet, adfunt exempla varia, ubi simile quid contingit. Sic ut notissimum quid adducam, acidum falis et alcali volatile urinosum, ambo fat volatilia, constituunt sal ammoniacum quoque volatile, sed minori gradu. Sic Turpethum minerale quoque mercurium viuum fixitate antecedit; Sulphur sublimari se patitur, regulus antimonii quoque volatilis est quodam gradu, quod eius, in auri depuratione, ope follis, in aërem profugatio docet; iuncta attolli nequeunt. Similiter hîc puto mercurium cum particulis igneis iunctum eleuari non posse, sed requiri separationem, qua per vehementiorem ignem effecta, demum mercurius liberatus in excipulum transire possit.

Remansit tamen BOERHAAVIO *tt*) pars huius pulueris in ignitione trium horarum in retorta, et quatuor in crucibulo, adeoque in retortae fundo maculam penetrantem effecit; interim cupellationem non sustinuit; vnde concludit, ignem esse causam fixantem, licet

tt) De Mercurio Experim. in ACT. ANGL. N. 430.



cet de modo, quo hoc efficiat, dubitet; sed negat quoque, ullum metallum notum ex mercurio et igne sic conspiciantibus oriri posse. HOMBERGIVS autem granum paruum metalli obtinuit *uu)* quod fane magnam meretur attentionem. Sed de hoc, cum nondum propria experientia edoctus sim, iudicare nequeo. Id tantum perpendendum propono annon mercurius noster, ob maiorem fixitatem, metalla, ope certarum encheiresium, magis forsan ad mutationem quandam disponat, quam viuus *xx)*.

6) *Acrimonia*, qua in corpus humanum agit. Exstant de huius facti veritate testimonia multa, quorum plura collegit WIEGLEBIUS *yy)*. Hanc autem ex accessione particularum ignearum facillime explicari posse, censemus; et ignem corporibus, quae illi exponuntur, acrem quandam siue causticam vim impertiri posse, calcinatio salium alcalinorum et terrarum calcarearum probat.

uu) p. 92. et peculiari tractatu *du Mercure* in ACT. PARIS. 1709. p. 106 - 117. adeo contendit, metalla constare mercurio viuo per particulas igneas penetrato.

xx) Spiritus salis non agit in argentum, sed sicca forma in caemen-

tatione (forfan ob maiorem ignis applicationem, metalli poros aperientem) lamellas eius quatuor caementationibus, quarum quaelibet non ultra duodecim horas duravit, ratione consistentiae caseo similes reddidit, quod ipse expertus sum.

yy) 10. *Abh.* p. 175. seqq.



bat. Quod vero non omnia corpora ab igne hanc acrimoniam nanciscantur, inde pendet, quod non omnia his particulis retinendis apta sint. Neque theoriam nostram infringit, quod de minio obiici possit, illud talem acrimoniam haud ostendere, cum 1) in minio plumbum phlogisto suo priuatum sit, mercurius noster autem nil amiserit; et magnam differentiam esse posse inter corporis cuiusdam cum alio quodam ex toto, vel ex parte combinatione, facile quis credet *xx*); 2) notum sit, plumbum omnia acida, in quibus solvatur, dulcificare, adeoque et particulae igneae illi iunctae hanc acrimoniam exferere nequeant. Mercurius contra, quolibet cunque menstruo salino vnitus, quadam acrimonia et vi penetrante pollet. Sed et in minio et lithargyrio hoc causticum latere iam MEYERVS docuit *aaa*) et WIEGLEB confirmat, salis tartari soluti, per iniectum lithargyrium post dies tres manifeste acrioris et caustici facti *bbb*), et alcali volatilisi a lithargyrio et minio, vti a calce viua caustici facti *ccc*) exemplis. Sat ideo

xx) Exemplo esto partialis ista stanni in aqua forti solutio, quae in purpurae mineralis et carmini praeparatione, longe minus efficit ad colorem pulchrum obtinendum, quam perfecta huius metalli in aqua regis

rite praeparata solutio.

aaa) p. 169.

bbb) *Vertheydigung der Meyerschen Lehre vom acido pingui.* p. 93.

ccc) *ib.* p. 94, et 46.



ideo probabile censeo, acrimoniam huius mercurii calcinati, maximam partem, particularum ignearum accessioni deberi; licet quoque negari nequeat, mercurii ipsius eam qualitatem, vi cuius per combinationem cum quibusdam aliis corporibus hanc acrimoniam nancisci valet, etiam quodammodo in censum venire debere.

7) *Vis multiplicatiua.* Scribunt auctores *ddd)* si huic mercurio calcinato recens viuus addatur, illum longe breuiori tempore in puluerem similem abire. Cuius quidem ratio multo iure diuisioni eius in minimas particulas tribui posset, qua actioni ignis maior praeberetur superficies et via poros penetrandi faciliteretur; sed si haec sola sufficeret, quodcunque aliud quid puluerulentum admistum eundem effectum producturum esset *eee)*. Ergo ex parte quoque particulis igneis mercurio calcinato adhaerentibus tribuendum erit, dum additus viuus duplicem simul experitur actionem particularum ignearum, tam earum quae in ambiente calcinato

ddd) v. g. LVDOLF *Eint. in die Chymie* p. 223. KVNCKEL *Lab. chym.* p. 230. STAHL *Fundam. Chem.* p. 31.

eee) Fatendum quidem est, solu-

tionem in aqua forti praegressam maximopere accelerare operationem, ob eandem rationem; sed haec quoque quasdam particulas igneas habet, quod vapores rubri testari videntur.



cinato adfunt, quam earum, quae per ignem aduehuntur *fff*).

E dictis colligendum duco, mercurii per memoratam operationem mutationes, maximam partem, accessui particularum ignearum tribuendas esse. Qualis vero hae sint indolis? alia res est. Phlogiston esse nequit; hoc enim vitra non penetrat, quod calcium metallorum imperfectorum reductio, nunquam in clauso vase, sine additione inflammabilis cuiusdam materiae, perficienda, docet. LEMMERIVS et HOMBERGIUS materiam lucis vocant; MEYERVS et WIEGLEBIUS Acidum pingue, s. materiam lucis acido iunctam. Et de proprietate eius adhuc lis est inter magnos viros. Inter hos decidere, tironis non est; nec de denominatione eius litigiis nos immiscebimus, quare particularum ignearum voce vsi sumus; sufficit nobis, esse quid, quod ex igne accedit, cuius qualitates vltioribus experimentis euincendae.

F 2

OB-

fff) Annon confirmat metalli citior fusio, si iam fuso metallo iniicitur, quam si solum igni exponitur.



OBSERVATIO III.

SOLVTIO STANNI.

Cum olim circa solutiones et praecipitationes metallorum occupatus essem, etiam stanni ad varia menstrua rationem exploraui, vbi id a quibusdam solui, ab aliis tantum ex parte erodi vidi. Tentaminum horum vnicum duntaxat adducam, ob singulare phaenomenon, quod in illo obseruaui. Addidi scilicet Aquae Forti concentratae tantum salis culinaris, quantum necessarium erat ad talem aquam regiam producendam, quae stannum perfecte, sine subsidentia minimae particulae *a*), soluere possit. Ob concentrationem menstrui paruum particulam stanni quauis vice ingerebam, nec noui quid adieci, nisi prius

a) Quoties enim particulae quaedam calciformes remanent, proportio inter acidum nitrosum et muria-

ticum rita non est; sed illud abundat, si calx alba; hoc, si nigra relinquitur.



prius totum solutum fuerit. Toto labore per aliquot dies durante, orificio phialae madida vesica tecto, ad impediendam menstrui euaporationem, obtinui solutionem saturatam, coloris flauī ad rubedinem vergentis, seu, vt KVNCKELIO *b)* placet, colubrini. Quod nil fumi flauī, me absente, auolauerit, inde scio, quia cum solutione auri pulcherrimum colorem purpureum produxit. Conseruaui ad vsum vitro optime clauso epistomio vitreo et cera, nec vnquam aperui vitrum, quod reposueram in locum frigidum, vbi duos annos stetit in quiete, quo tempore duabus vicibus obseruaui, me posse vitrum inuertere solutione immota, succinum pellucidum flauum solidum aemulante. Plures vidi fluidum, etiam hyeme, eiusdem coloris. Rarissima est obseruatio, fluidum mutari in solidum, et vice versa, sine ablatione vel additione cuiusdam particulae. Frigus enim in culpa esse nequit, quia aestate quondam coagulata vidi, et hyeme fluidam, licet etiam vice versa. Neque in menstruo quaerenda mihi videtur causa, quum plurimum eodem tempore factarum solutionum, quaedam vti extractio per aquam fortem eandem mutationem subirent, modo quod haec alba diaphana maneret. Nec in stanno adhi-

F 3

bito

b) Laborat. chym. p. 383.



bito rationem huius phaenomeni video ; adhibui Moluccense ad omnes istas solutiones ; sed non omnes similem mutationem passae sunt. An , quia solutionem lentissime institui , vt nihil vaporis istius flauī auolauerit , hae particulae , probabiliter phlogisticae aut igneae , retentae mutationis argui possint ? Sed quare tunc rursus liquida facta , et denuo coagulata ac liquida euasit ? Si cuidam simile quid contingat , forsan causa huius phaenomeni detegetur quae mihi adhuc ignota est.



OBSERVATIO IV.

TERRA FVLLONVM HIDDESEENSIS.

Satis magnum numerum argillarum Pomeraniae Suecicae et Rugiae collegi , lotionē ab admista arena etc. depuraui , quo possem menstruis , igne etc. indolem earum explorare ; nec vllam inueni alteri perfecte in omnibus qualitatibus plane similem. Ex his tantum cinereae



nereae cuiusdam argillae ex Insula Hiddensee mentionem faciam, e qua lota cum figuli arte olla quaedam esset formata, haec aëre exsiccata fere alba apparuit. Tentandum iudicaui num haec argilla ante indurationem per ignem figuli, vitro saturni puluerisato, e cinere saturni et arena colliquato, lege artis conspersa, durante ignitione in figuli furno, hoc vitrum decenter posset recipere, eoque decenter incrustari ad usum oeconomicum; quod nonnullis argillis peculiare esse solet, licet aliae vstionem in furno requirant antequam dictum vitrum in fluxu illis sat valide adhaerere possit. Post decentem figuli vstionem autem vitrum saturni non defluxerat, sed omne euanuerat. Omne vitrum in auras auolare potuisse, impossibile censeui. Olla tantae albedinis erat, quantam ante vstionem in figuli furno obseruaueram. Cogitavi vitrum intrasse totam argillae substantiam, quae inde lapideam duritiem sine dubio habitura fuisset. Sed cum olla diffringeretur, minima vi cohaesio argillae vincebatur, et minorem duritiem in igne acceperat quam in eodem aliae argillae figulinae solent. Breui, vidi argillam hanc neutiquam ad vasa figulina inferuire posse; sed aliis experimentis vidi hanc argillam praecipuis *a)* notis terrae fullonum pollere;

a) quas enim quidam vt characteres terrae fullonum adducunt, maior durities minorque in pastam cum aqua vt redigatur pronitas, et alcalinae terrae



pollere; qualem eam esse quoque iam ante plures annos, experimentis cum pannis laneis etc. institutis Pater compererat. Cum auctores, qui terrae fullonum mentionem faciunt, ut plurimum fullonum experimentis indolem eius explorent, quod vero, si minimam quantitatem solummodo possideamus, impossibile, si maiorem, saepe sumtuosum est; aliorum inquisitioni relinquo, an aliae terrae fullonum similem habitum ostendant ad ignem furni figuli, nec ne; id quod minori quantitate argillae, minimisque impensis explorare liceret, et viam panderet ad generaliores theses mineralogicas.

Hac occasione in memoriam reuoco argillam quandam Bornholmensem rubram, ad Bolum armenam fere colore accedentem, quam cum aliis ex eadem Insula allatis lotionem, formationem, vstionem in furno et ante follem tractavi; haec rubedinem suam in igne conseruauit, adeo ante follem, et vi ignis simul pari gradu resistebat quam aliae argillae albae apyrae dictae. Vnde haec argilla apyra esse potuit, cum colorem argillarum rubentem vel flauum in igne persistentem ab admixto principio martiali deriuare soleant Chemici? Tunc vero ob


huius

rae portio admixta, insufficientes sunt, cum abesse vel deesse possint et tamen

terra fullonum esse.



huius principii admiftionem; exemplo aliarum argillarum lutearum vel rubrarum; igne fortiori in vitrum transfire debuiffet. Ergo eiusmodi color fine principio martiali erit explicandus. Bituminosae f. phlogifticae particulae tingentes argui nequeunt ob colorem in igne perfistentem. An ad alius metalli partes refugere licet?



OBSERVATIO V.

DE SALINIS QVIBVSDAM.

Cum olim intenderem falinarum indolem explorare, proficifcebar *Sülz*, oppidum Megapolitanum. Machinas, quibus antliarum ope muria e fonte in altum tollitur, et ante coctionem euaporatione concentratur, non sine magna animi delectatione contemplatus sum. Ipse e fonte falinarum aliquot libras haufi et in vitro puriffimo Sundiam mecum abstuli. Redux Sundiam, tranfeundo Pomeraniae oppidum *Richtenberg*, ibi quoque



que ipse haufi muriam e fonte, e qua olim fal culinare coxerunt, et mecum abstuli. Breui post *Gryphiae* cum commorarer, salinae, quae ibi est, portionem quoque Sundiam attuli. Cuiuslibet diëtarum muriarum tantum, quantum capit mensura duas libras colonienses aquae destillatae, in temperato aëris calore, recipiens, euaporaui in vasis vitreis latioribus, in athanore, calore lenissimo. Obtinui e muria Sülzensi Salis ficci $4 \frac{1}{8} \frac{1}{16}$, e Richtenbergensi $1 \frac{1}{8} \frac{1}{16}$, e Gryphiswaldensi $3 \frac{1}{8}$ semuncias colonienses. Gryphica muria suppeditauit Sal candidum, binae priores autem fuscum. Salinas Sülzenses considerans obseruaui muriam in aedibus gradatoriis concentratam colligi et asseruari in cisternis, ex asseribus ligneis compositis, donec coquatur. Obseruaui cisternas has obductas crusta fusca ochracea. Vidi hoc Sal venditum Sundiae, album quidem, sed non adeo candidum, quam quod *Gryphiae* paratur, vel ex Anglia affertur, citiusque deliquescit. Etsi in vsu oeconomico sanitas hominum hac imperfectione non laedatur, manet tamen sal non summa puritate praeditum; quod vitium, an corrigi possit, est res vltioris indaginis. Gryphica autem muria nullis peregrinis partibus impraegnata, candidissimum purissimumque Salem, necessariis cautelis adhibitis, suppeditans, amplificatis iis, quae
ad



ad gradationem pertinent, thesauri Pomeraniae nomen meretur, etsi non sit concentratissima.



OBSERVATIO VI.

OLEVM VINI AQVAM CONTINERE POSSE.

Oleum vini, vel, vt alii vocant, oleum vitrioli dulce, quia innatat aquae, et super aquam fusum e longinquo a candela flammam capit, videtur nullo modo cum aqua miscibile esse. Sed accendatur v. g. in cochleari minori. Si in superficie, praesertim in margine, cochlearis tempore deflagrationis obserues bullulas aëreas natantes, certus esto, absoluta deflagratione, te aliquot guttulas aquae acidulae obseruaturum esse; sed nunquam sine hoc signo praegresso.



OBSERVATIO VII.

AVRI ET ARGENTI IN IGNE PER SALE MIRABILE GLAUBERI SOLVTIO.

Mediantes Sale mirabili Glauberi tam aurum, quam argentum, in tigillo fusione solui posse, experientia edoctus sum. Hoc respectu esset res maxima consideratione digna. Dolendum solummodo est, quod leuissimo errore commisso, igne paullulum validius aut diutius iusto applicato, penetret tigilla, sicuti aqua spongiam. Notandum, quod maiorem in soluendo habeat affinitatem cum argento, quam auro. Aurum hoc sale solutum rubri coloris puluerem repraesentat. Si argentum igne fluat in tigillo, eique fluenti adiiciatur dictus puluis ruber, sal relinquit aurum, et contra aequalem circiter argenti partem transmutat in corpus scoriis simile; residuum argenti in se recipit aurum a sale dicto relictum. Si argentum istud aqua forti soluatur,
relin-

relinquetur aurum sub forma calcis, quod reductio calcis docet. Si neque scoriae, nec dictus pulvis auro impraegnatus in fluxu adiectus examinentur, crederet spectator, pulverem adiectum posse argentum in aurum transmutare.

OBSERVATIO VIII.

COHOBATIO.

Cohobatio est talis mutationis liquorum destillatorum modus, quo illi, mediante repetita in corpora fixa seu volatilia refusione et denuo iterata abstractione, vel figuntur, vel novis aut maioribus viribus imbuuntur et exaltantur. Distingui potest; in analyticam, quatenus hac operatione fixa volatilia redduntur et a terreis capitis mortui partibus separantur. Synthetica autem est, quatenus hac operatione volatilia figuntur, hinc principia separata coniunguntur, et sibi inuicem assimilantur; dum, si volatile nunc figatur, quicquid



quid actiui liquor abstractus continuit, in retorta retinetur, et cum eo, quod initio fixum erat, combinatur. Vtriusque operationis vtilitas summa tam in vulgari, quam sublimiori chemia, ad fixationes vel volatilisationes breuiori tempore praestandas, quae alia via nisi impossibiles essent, tamen ob diuturnas digestiones, circulationes etc. more veterum, longissimum tempus requirerent. Si velis fixa volatilia reddere, recipe volatilis v. g. partes sex vsque ad duodecim, ac vnā fixi; nunquam fiat cohobatio ad ficcitatem, sed solummodo, donec fixum relinquatur sub consistentia olei; sed a lenissimo igne incipiendum, et quo saepius repetitur cohobatio, eo magis intendatur ignis, et tandem maximus gradus applicetur, qui mensurandus pro constitutione subiecti. Quod tunc in capite mortuo adhuc restat, extrahitur, depuratur a terra mortua, et in sal coagulatur, et cum illo denuo nouae instituuntur cohobationes dicto modo, respectu gradu ignis, donec fixum sal volatile factum sit. Si vero hac operatione volatilia figere velis, opus est corpore fixo conueniente, cuius circa sex partes ad volatilis liquoris vnā partem recipiendae; liquor abstrahatur semper ad ficcitatem; in prioribus cohobationibus leniori, in subsequentibus intensiori, ignis gradu vtendum. Hoc modo, equidem
labo-



laborioso, saepe obtinentur res summae virtutis, quas omnes, quo minus enumerem, breuitatis scopus propositus vetat.



OBSERVATIO IX.

METHODVS GRADVM CONCENTRATIONIS MENSTRVORVM DETERMINANDI.

Si operationes chemicas semel institutas eodem cum successu semper iterare velimus, necesse est, vt omnes ad illas peragendas necessariae encheireses, et requisita probe determinantur. Haud parui momenti est gradus concentrationis menstruorum, praesertim spirituum acidorum et vrinosorum, aliorumque, quorum tamen concentrationem, qui processus chemicos describunt, auctores vel plane non, vel saltem ancipiti tantum et fallaci modo determinant. Determinatur vero optime determinata eorum grauitate specifica. Bilanx optimae
notae,



notae, pondera exacte adaequata v. g. marca colonien-
 sis ad modum denarii directorii, vsque ad elementa mi-
 nima, semper in partes aequales diuisa, et vitrum an-
 gustioris colli, in quo collo linea transversalis limae ope
 formata, indicans, vitrum, vsque ad hanc lineam aqua
 destillata in calore temperato repletum, continere quan-
 titatem vni marcae colonienfi pondere aequalem; vel,
 si minor quantitas placet, dimidia, aut semuncia;
 sunt requisita ad grauitatem specificam fluidorum deter-
 minandam necessaria; quibus commodissime sequenti
 modo vtendum. Repleatur vitrum vsque ad lineam di-
 ctam liquore ponderando, qui per diuersas horas in
 aëre temperato stetit, et libretur; sic commodissime
 determinatur eius grauitas specifica. v. g. Quantitas,
 spatium, quod vna marca colonienfis aquae destillatae
 repletur, implens, Olei vitrioli Nordhusiensis, indigo
 optime soluentis, pependit $30 \frac{1}{4} \frac{1}{8}$ semuncias; Angli-
 cani, $29 \frac{1}{2} \frac{1}{8}$ semunc. Aqua fortis (argentum folia-
 tum sine calore soluens, lamellatum autem crassitie
 chartae sine calore duobus diebus non soluens, sed in
 leni calore quem manus perferre potest, dimidiam sui
 partem satis breui tempore soluens) idem spatium oc-
 cupans pendebat Marcam vnam et $5 \frac{1}{4} \frac{1}{8}$ semunc. Ea-
 dem aqua fortis tam diu soluit mercurium, cui superfu-
 sa,



sa, sine caloris applicatione, donec tota in crystallos abierit, quae calore denuo fluidae redditae, quadruplo aquae destillatae dilutae non denuo concreescunt, sed solutae tenentur. Hoc modo commodissime semel annotatos effectus determinatos huius vel illius menstrui semper, quoties volupe erit, in usum meum conuertere possum. Saepe scribunt auctores, etiam artes docimasticae peritissimi, solui hoc vel illud corpus in hoc vel illo menstruo; sed dolendum, quod, etsi secundum effata summorum virorum operationem instituamus, res non semper succedat ob iusto maiorem concentrationem vel debilitatem menstrui, quam non determinarunt. Hinc historiae solutionum et praecipitationum haecenus typis expressarum valde emendari possunt, sed non nisi immenso labore.





OBSERVATIO X.

ARENA FERREA RVDENSIS.


Num ferrum nativum existat, de eo adhuc lis est inter auctores mineralogicos *a*). Quae externo splendore ferrum maxime referunt, ut mica ferrea (*Eisenmann*) etc. ut plurimum arsenicales sunt minerae, et pessimae indolis ferrum dant, scil. quod quidem facile funditur, ast frigidum facillime frangitur (*Kaltbrüchig* vocant). Propius accedunt retractoriae minerae, scil. quae a magnete trahuntur. Sed nec hae verum ferrum sunt, sed adhuc quadam portione sulphuris pollent, unde malleabiles non sunt. Pertinet ad has arena, quae in Insula *der Ruden* dicta, inter Rugiam et Pomeraniam sita, invenitur variis coloribus imbuta. Cribri ope ex illa separari

a) Vidi in Musaeo Celeb. BÜTTNERI varia specimina sub ferri nativi nomine missa; praesertim notabile est, quod e Hassia accepit specimen Schmalkaldense, cuius forma

determinata sub-trigona et textura lamellosa probabile reddunt, artificium non esse. Réperiri dicitur in minera ferri lapidea III. VOGELII *Min. Syst.* p. 177.



parari potest facile dimidia pars particularum lamellofarum, quae ignem nondum expertae a magnete trahuntur; quare etiam ope magnetis ex hac arena colligi possunt. Similem arenam vidi a Dobberan, haud procul a Rostochio distante, Sundiam missam; aliamque Tornoënsē in collectione Celeb. BÜTTNERI. Vidi ibidem mineram e Dannemora Sueciae missam, etiam retractoriam particulis simillimis constantem, calcareis partibus immixtam, hinc cum acidis efferuescentem. Si ponamus, in fundo maris adesse venas talis minerae, illius particulae motu maris separatae et cum arena mixtae in litus reiectae talem arenam constituerent. Ceterum optimum inde ferrum parari posset, cum ab arsenico prorsus liberum sit; et quod parcum illi adhaeret sulphuris, addita terra calcarea, in fusione absorberi posset, alioquin enim euasurum, quod candens fragile esset, (*rothbrüchig* vocant).





OBSERVATIO XI.

AQVAFORTIS VIRIDIS.

BASILIVS VALENTINVS describit aquam fortem ad cuius praeparationem quoque viride aeris adhibuit. Institui debitis cautelis quondam processum, et obtinui spiritum nitri eleganti viriditate superbientem. Putavi forsan aliquid aeruginis conspurcasse collum retortae figulinae, quod cum spiritu transiuerit in recipiens. Rectificaui ideo illum per retortam vitream, rostrum intermedium et vas recipiens pariter vitrea, lutumque quod in vsum vocauit constabat e puluere purissimi steatitidis *a)* cum oleo lini in pastam malaxando reducto *b)*,
vasa-

a) Versuch einer neuen Mineralogie (auct. CRONSTEDT) §. 80. Ill.

VOGELII Practisches Mineral-System p. 100. TALCVM Smectis LINNE Syst. Nat. XII. Tom. III. p. 52. Vfus sum specie Noruegica cinerascenti, quae igne albissima euadit, nullaque mica nec metallicis partibus

mixta est.

b) hoc luto semper vsum sum in destillatione spirituum acidorum, ubi omnibus praeferendum est, dum adeo spiritus salis penetrantissimos vapores coerces, vt ne quidem naribus iuncturae proxime admotis odor vllus perci-



vasaque erant purissima, et retorta ita in catino furni posita, vt ne vnica quidem particula spiritus ebulliendo ad supremum ventris profiliens in collum defluere posset, sed soli vapores eleuati collum intrarent; et per infundibulum vitreum longissimo tubulo instructum ingerebam prouide retortae spiritum rectificandum. Sed absoluta destillatione denuo apparuit liquor amoenae viriditatis, quae Spiritu vrinoso affuso mutabatur in saturate caeruleum colorem. Apparet itaque, haud difficulter metalla cum acidis spiritibus destillando transvehī posse.

OBSERVATIO XII.

SAL MEDIVM IN CINERIBVS CLAVELLATIS.

Modus parandi cineres clauellatos venales optimos omnibus notus est. Incinerantur scil. ligna, inter quae duriora praestant. Cineribus superfundunt

H 3

aquam

percipiatur; quod lutum sic dictum perpetuum Dippelii (quod e puluere laterum coctorum et oleo lini paratur) ceteroquin notorum lutorum in

hunc finem optimum, minus praestatur, et minus commode adhibetur cum calore colli retortae deliquescat et defluat.



aquam frigidam, vt extrahant sal lixiuiofum, cui adhuc partes inflammabiles quaedam adhaerent, ab alcali contra vim ignis ad tempus defensae. Cum vero lixiuium postea vi ignis et inde producta euaporatione denuo sit coagulandum, necessitate coguntur artifices, vt tantum quantitatem maxime necessariam aquae pro solutione affundant, i. e. nullum lixiuium ad euaporationem eligunt, quam quod summe concentratum, vt ouum recens innatans nunquam fundum petere possit; si enim minoris grauitatis specificae, adeoque minus concentratam solutionem in vsum vocarent, inutiliter tempus, ignis pabulum, labores, hinc sumtus essent impensuri. *a)*

Iam si quae in cineribus inter partes alcalinas latuissent salia media, nondum in alcali versa, vti tartari vitriolati species, haec in hanc frigidam solutionem recipi non potuissent simul, praesertim ob summam hanc concentrationem, nec aliud sal cognitum potest in hac solutione abscondi. Ergo fieri nequit, vt in hoc lixiuio igne coagulato reperiaturs tartari vitriolati species. Ex-
perien-

a) affundunt quidem secunda vice denuo aquam frigidam; sed hanc solutionem debiliorem asseruant, vt postea recenti cineri affundant. Po-

sito hanc, cum concentrata non sit, sal medium soluisset, tamen id in futura concentratione rursus decidere probabile est.



perientia autem contrarium docet, scil. quod semper magna quantitas salis medii, Tartaro vitriolato analogi, e cineribus clauellatis venalibus albis optimis, instituta denuo in aqua frigida solutione, secerni possit. *b)* Quaestionem non nisi hoc modo solui posse iudico: Quando dicta solutio in ficcum sal coagulatur, hoc fit squalidum coloris adhuc cinerei, nec satis ficcum. Hac ratione coacti artifices ad dicta vitia remouenda frustulatum hoc iniiciunt furno reuerberatorio *c)*, vbi flamma hoc subiectum lambit, modo fusionem praecauent, et satis diu igne applicato extrahunt frustula ficciora alba, quae in doliis prouide clausis venduntur. Hoc album sal est, quod copiosum sal tartaro vitriolato analogum, vt dixi, continet. Hinc colligendum videtur, genesin huius salis ita explicandam esse, vt quaedam particulae salis alcalini acidum e flamma lambente recipiant.

OB-

b) Simile sal videtur quod BOERHAAVIUS ex solutione cinerum clauellatorum, sed *calida* aqua instituta, crySTALLISATUM obtinuit. *Elem. Chem.* Lond. 1732. 4to T. I. p. 296.

c) vtuntur furno ex lateribus structo, interna cavitare furnum vulga-

rem in quo panis coquitur referente, quem iniectis lignis calefaciunt, donec fere candescat; tunc glebas salis alcalini iniiciunt, et ante ostium furni ignem alere continuant, vt flamma furnum intret, in illo circuletur, adeoque sal alcalinum lambat; quod spiracula aperta promouent.



OBSERVATIO XIII.

DE SPATHIS.

Spatha basi calcarea, textura lamellosa, fragmentis plus minus rhomboidalibus, figura determinata varia, habitu ab aliis lapidibus crySTALLISATIS facile distinguenda, merentur, quae in Classe Calcareorum specialem Ordinem constituent, si in diuisione fossilium ad habitum externum simul respicere placet. Genera, ut reliquorum quae sub Classe Calcareorum comprehenduntur, varia pro diuersa partium constituentium indole et mixtione. *Calcarea*, e terra calcarea purissima crySTALLISANDO nata; forma determinata varia, cuius species praeter Ill. a LINNE a) WESTFELDIUS b) describit, nimirum eas, quas Hercynia suppeditat; *Gypsea*, terra calcarea acido vitriolico saturata constantia,

a) in *Syst. Nat. et Amoen. T. I.*

b) *Mineralogische Abhandlungen.*
6. Abh.



tia, cryſtallis prismaſe hexaedro, duobus lateribus oppoſitis latioribus, apicibus cuneatis; aliaque. Attentionem inter ea merentur, quae Fluores dicuntur, quo ſub nomine duplex vulgo intelligi ſolet ſpathorum genus; alterum leuius, lucem attrahendi vi non imbuedum, aſt certo caloris gradu phoſphoreſcens, fragmentis et figura determinata vtplurimum cubicis, quod quoque *Spathi vitrei* nomine inſigniri ſolet, cuius ſpecies plures *Cronſtedt c)*, enumerat; quibus forte addendae, quas nuper e Saxonia accepi, duae ſpecies, altera amethyſtini coloris perfecte cubice cryſtallifata, altera flauo tinſta ſingularis formae, qualem Fig. II. exhibet; has magnefiam continere, et ibi ad vitrum dealbandum adhiberi, affirmavit is, a quo illas accepi; cuius autem veritatem experimentis indagare nondum potui, cum ſpeciminibus his ſine figurae deſtructione nil demendum eſſet, nec paruitas eorum experimentis inſtituendis ſufficeret; quare tantum ex externis ſignis diiudi-

c) *Verſuch einer neuen Mineralogie* §. 97. ſeqq. peculiarem inde conſtituit ſectionem, et calcareis affocianda negat, dum nullae particulae calcareae ex iis haecenus educi potuerint, et in fuſione effectus producant terris alcalinis numquam tri-

buendos; cum tamen, quod ipſe fatetur, nondum in principia conſtitutiua ſua ea reſoluere calleamus, ſuaſcente toto habitu licebit ea ſub calcareorum claſſe tradere, donec mixtio eorum clarius pateat.



iudicare potui, eas ad Spathi vitrei Genus pertinere. Alterum vero sub *Marmoris metallici* nomine notum, quoscunque lapides non metallicos grauitate specifica superans, calcinatione debitis encheiresibus instituta in magnetem lucis mutabile, textura lamellosa, crystallis, vt statim dicetur, singularibus, equidem a CRONSTEDTIO *d)* gypso spathoso annumeratur, ob terram calcaream et acidum vitriolicum, vtrique communia, attamen ob argillaceas quas praeterea continere MARGRAFIANA *e)* experimenta docent, maiorem acidi vitriolici proportionem, et insignem grauitatem, qua omne gypsum superat, aliasque proprietates, similiter a Gypso distinguendum, et proprio genere tradendum videtur, quam marga quam ob admistas argillaceas partes proprio genere recenset. Formam eius determinatam Ill. a LINNE exhibet; differt vero ab illa, quam in omnibus speciminibus, quae haecenus videre licuit, obseruaui, paullulum, quare delineationem iuxta specimina, quae Cel. BÜTTNERVS perfectissime efformata possidet, factam exhibeo, quae in eo a LINNEANA differunt, quod latera vtrunque bis obliquata sint.

Varie-


d) l. c. §. 18. 19.

e) Proprietates, partes constitutivas, et modum, quo facultatem lu-

cem attrahendi nanciscantur, vberissime exposuit Ill. Vir, in *Chem. Schriften P. II. tractat. IX. et X.*



Varietates hae duae, quarum altera (Fig. 8.) flavescent, altera (Fig. 9.) aquea erat, vtraque Hercynica, tantum in eo differunt, quod anguli in hac magis truncati sint. Exhibet Icon *a* latioris, *b* angustioris superficiei, *c* apicem faciem.



OBSERVATIO XIV.

AQVAM DESTILLATAM PURISSIMAM PARARE.

Aqua pura saepissime indiget Chemicus. Destillatione eandem parari in vulgus notum est. Sed aqua marina per se destillata retinet aliquid peregrini, forsan bituminosi, quare sitim non extinguit, licet sale muriatico, quod antea continuerat, orbatum; et ros, itemque pluvia breui ante tonitru collecta facilius, rarius alia aqua pluuialis vel niualis, (sed tamen et haec, uti experientia edoctus sum) in destillatione vasa vitrea findunt. Ergo et in hac non omnes partes deponit aqua

I 2

pere-



peregrinas. Depuratur quidem a sale et terra crassioribus *a)*, sed facile transeunt cum aqua principia volatilia, salina nimirum et phlogistica. Optime sequenti via incedes.

Collige niuem, vel, illa deficiente, frigida et ventosa tempestate pluuiam, cautelis munditiem spectantibus decenter obseruatis, filtra per duplicem chartam typographorum. Repone aquam collectam per totam aestatem subsequenter sub tectum domus, in vitris cylindricis s. conserualibus, charta occlusis. Hoc modo contentae volatiles partes in aërem disperguntur, vel figuntur et secedentes ad superficiem formant cuticulam, tandem decidentem. Haec aquae filtretur, destilletur: quod commodissime fit ex retorta vitrea tubulata, in furno ita locata, vt particulae aqueae coctione ad superiora ventris retortae salientes, collum intrare nequeant, sed sub vaporum forma solummodo transire possint. Retortae applicetur vitreum rostrum intermedium. Recipiens vas vitreum quoque epistomio vitreo instru-

a) aqua niualis ad siccitatem destillata reliquit terram albam, quae sicco aëre fere sicca erat, humido deliquescebat, et saporem in lingua

producebat, ergo salini quid continebat; quam aliae aquae aëreae relinquunt, obscurioris coloris est.



instructum esto. Notetur in recipiente punctum, determinans altitudinem superficiei quartae partis aquae, vnica vice retortae infundendae. Commissuris lutatis infundatur aquae quadruplum mensurae dictae; sed tertia pars retortae maneat vacua. Destilletur lenissime *b)* quarta pars aquae in retorta praesentis, siphoneque euacuetur recipiens, et haec separatim conseruetur sub signo Num. 1.; subsequens quarta pars mediocri igne destilletur et sub Tit. Num. 2. asseruetur. Tandem eadem quantitas tertia vice obtenta modico igne quoque sub Tit. Num. 3. asseruanda. Residua quarta pars, vasis refrigeratis, ope siphonis e retorta educitur, quae tunc aqua destillata eluenda. Sequenti die, antequam vesicae, quibus vasa lutata sunt, ab humiditate aëris emolliantur, et earum cohaesio cum vitro minuatur, denuo destillationem repetere poteris, et sic quotidie destillando copia aquae destillatae obtineri potest, quae tamen ante usum semper per duplicem chartam typographicam filtranda; perfecte enim puram nemo mortalium obtinebit. Sufficiet, si nobis sit sat pura ad plerasque operationes. Solutio veneris in aquaforti, vel spiritu

I 3

falis

b) mediocri tantum gradu ebullire debet, et circiter duorum vel trium minorum temporis secundorum interuallo vna guttula decidere.



salis ammoniaci concentrato, vel solutio lunae purissimae in aquaforti, anatica circiter proportionem Num. 1, 2, 3, affusa considerantur post aliquot dies. Si solutiones ante affusionem limpidae fuerint, et aquis destillatis N. 1, 2, 3, affusis limpidae permanferint, nullaque facta praecipitatio, talis aqua destillata sat pura erit ad plerasque operationes. Indagatio per oleum tartari per deliquium, simili modo instituta, quoque non erit reicienda.



OBSERVATIO XV.

DE DVOBVS NOVIS SALIBVS METALLICIS.

Noua inuenta in Chemia describere nunquam inutile videbitur, licet vsus eorum nondum indagatus sit. Tradam itaque hîc descriptionem duorum salium metallicorum, casu obtentorum, quae nondum a quoquam memorata noui, hinc licet exigua eorum copia obten-
ta



ta ulterius examen non permiserit, tamen digna, quae cognita reddantur, existimo.

Alterum illorum obtinuit Celeb. BUTTNERUS ex atramento sympathetico; paravit illud e purissimo Cobalto metallici splendoris, (*Stahlderbe* vocant) quod spiritu nitri soluit, aqua diluit, tunc ebullire fuit, sensim adiecto sale muriatico, donec viror amoenus apparuerit, quo facto ad consistentiam mellaginis evaporavit; cui affusa aqua, illam soluens, rubella euaserat, et quantitas circiter vnciae dimidia diu asseruata dedit tres crystallos elegantissimas, lateribus exactissimis, splendore et regularitate quarzum arte politum mentiens.

Figura vnius crystalli sequens est: *Corpus*. Prisma tetraedrum, lateribus hexagonis, duobus oppositis maioribus; quorum alterum, vbi crystalli parietem vitri tetigerunt, fossa oblonga (*c*) excauatum est. *Apex*. Pyramis e lateribus quatuor pentagonis, truncata, superficie truncati apicis quadrangula (*d*).

Ita definiui ex vnius crystalli vno apice perfecte efformato; alter enim, qui in Iconibus (*a b c*) inferior



or est, nondum perfectus est, unde etiam laterum corporis latiorum (*a. c.*) angulus inferior truncatus est, et superficies apicis adhuc hexaedra (*e*). In ceteris duabus crystallis deficit apex, vti linea transversali punctata (*x. y.*) notavi. Cum vero in perfectiori illa apex adsit, hinc definienda erit figura huius salis. Qualis sit indolis, coniecturis certe euinci nequit. Metallicum sal certe est; et medium ob alcali et acida ingredientia. Num vero solum acidum nitrosum, aut muriaticum, aut vtrumque illi insit, determinare nequeo; Crederes acidum muriaticum vtpote debilius nitroso expelli; Sed dissuadet excavatio (*c*) salis muriatici crystallis peculiaris, quae in nitro cubico non reperitur. Forsan est sal decompositum ex vtroque acido, alcali minerali et partibus semimetallicis cobalti.

Alterum est, quod Ill. VOGELIO aestate elapsa oriebatur. Docebat nos nimirum Ill. VIR in Collegio Chemico Experimentalis praeparationem Kermis mineralis, et quidem sequenti modo. Recepit Cinerum clavellatorum *a)* uncias sex, soluit aqua feruida, filtrauit, immi-

a) Adhibitus fuit a veteribus, et adhuc hodie in Dispensatoriis praecipitur liquor nitri fixi, cum vero hic duntaxat Kermes minerale faciat quatenus lixiuium alcalinum est, et longe maiori pretio veniat, praestat loco



immisit lebeti figulino vitreato ; adiecit antimonii pulverisati vncias tres ; super prunas ebullire fuit ultra horam dimidiam, perpetuo spatula lignea agitando ; lixivium feruidum per filtrum colabatur in discos murrhinos, vbi simulac refrigerabatur, pulvis tenuissimus e brunneo rubens fundum petebat. Neglecta pulueris huius a liquido innatante separatione, post aliquot dies omnis pulvis euanuerat, et hinc inde in disco aderant crytalli salinae, parum sapidae, difficilius in ore deliquescentes, tunc autem saporis ad muriaticum quodammodo accedentis vestigia relinquentes. Figuram certe determinare nequeo, cum pleraeque indeterminatam habeant; reperi tamen inter eas, quas perlustrandas Ill. Vir beneuole permisit, vnā exacte formatam, quae prismate hexaëdro vtrinque truncato constabat. Quale hoc sal sit, determinare si velimus, ingredientia in censum veniunt. Aderant in disco lixiuium alcalinum, et pars sulphurea antimonii. Haec cum euanuerat, puto, phlogiston sulphuris auolasse, et acidum eiusdem cum lixiuio alcalino vnionem iniisse, et ita cum eo sal medium constituisse, quod Tartarus vitriolatus, vel potius

Sal

co eius cineres clauellatos adhibere, ge minoris emi possunt.
qui eundem effectum edunt, et lon-



Sal polychrestum Lemery dicendum. Diffuadent vero sapor non amarus, qui tamen salibus mediis cum acido vitriolico paratis peculiaris est, et diuersa crySTALLORUM figura, quippe hoc tantum prisma hexaedrum efficit, Tartarus vitriolatus vero crySTALLOS quarzo crySTALLIFATO exactissime respondentes, prismatico hexaedro, apicibus duobus pyramidem hexaedram, lateribus in punctum coeuntibus, efformantibus, dat. Forsan autem haec mutatio particulis Stibii regulinis in Kerme minerali praesentibus *b)* tribuenda, quae huius salis mixtionem ingredienti, decompositum id reddiderunt, Tartarum vitriolatum antimoniatum, si placet, dicendum.

Nouo hoc phaenomeno incitatus repetii experimentum domi et eadem proportionem obseruata, iterata affusione lixiuii alcalini et coctione cum illo aliquoties ex eadem portione antimonii Kermes minerale parauit. Nondum autem successit mihi tales crySTALLOS obtinere: sine dubio ob quasdam encheireses neglectas. Interim subnatum mihi inde propositum, alia quaedam experimenta instituendi. Obseruaui scil. Kermes vltimae coctionis, nisi maiori, saltem eodem rubedinis gradu pol-
lere,

b) vid. Macquer *Anfangsgründe der Praktischen Chymie*, p. 316.



lere, quo id, quod prima obtinueram coctione. Conclusionem inde feci, cum in quavis coctione, ob sulphuris educationem, proportio eius ad semimetallicam antimonii substantiam minuatur, forsan in sequentibus maiorem regulinae partis copiam simul solui, et hinc colorem exaltari. Incitatus itaque ad regulum antimonii cum sulphure vario modo combinandum, legens WIEGLEBII Observationem de colore Cinnabaris in Obs. I I da nostra citatam, ibique discens ad colorem rubrum e mercurii cum sulphure miscela obtinendum particularum ignearum accessionem requiri, idem hic applicandum putaui, quare sequentia institui Experimenta.

1) Butyri antimonii partibus duabus addidi spiritus fumantis sulphurati Beguini, methodo a WIEGLEBIO l. c. praescripta parati, qui quoque omnia ista phaenomena cum mercurio producebat, partem vnam. Miscabantur sine vlla efferuescentia et fundum petebat pulvis ex flauo rubellus.

2) Aquae destillatae vnciae dimidiaae instillaui spiritus Beguini dicti guttulas decem, addidi butyri antimonii guttulas viginti et praecipitabatur pulvis similis coloris ac n. 1.

K 2

3) Aquae



3) Aquae destillatae circiter drachmae vnicae, instillaui but. antimonii guttulas viginti, praecipitabatur, vt solet, puluis albus; addidi spiritus Beguini guttulas decem, et praecipitatum rubentem colorem assumfit; vt proportionem exactam noscerem, addidi adhuc quinque guttulas dicti spiritus, et nigrescens euasit color; qui tamen per additas guttulas quinque but. antim. rursus ad priorem redibat. Praecipitatus puluis a filtratione siccatus pependit grana tria.

4) Cum but. antim. sine praecipitatione cum aqua misceri nequeat, instillaui guttulas viginti but. ant. guttulis octaginta spiritus nitri concentrati, commiscebantur sine praecipitatione; hanc miscelam diluebam aquae destillatae guttulis ducentis, et limpida mansit; guttatim addidi spiritus Beguini guttulas viginti, et simulac vna guttula incidebat, puluis ex luteo rubellus fundum petiit. Simili miscelae e spiritus nitri concentrati guttulis quadraginta et butyri antimonii guttulis decem, non dilutae addidi spiritus Beguini gutt. decem, et a quauis guttula accidebat strepitus cum fumo denso et excalefactione vitri, et quod praecipitatum erat, coloris albo-flauidi erat; nec ab affusa aqua color mutabatur.

tur. Ergo a concentrato acido actio spiritus Beguini in regulinas partes stibii contentas impeditur.

5. Antimonii diaphoretici scrupulo dimidio addidi spiritus Beguini guttulas quinquaginta, sed nulla mutatio coloris, nisi quod a colore spiritus flavescebat. Cum vero antimonio diaphoretico spiritum salis concentratum infunderem, ac per nychthemereum digestionem subiicerem, non solum e liquore decantato per additum spiritum Beguini, praegressa effervescencia, pulvis praecipitabatur, qui initio niger erat, dein rubens euadebat, sed et residuum affuso spiritu dicto similem coloris mutationem patiebatur.

6. E vitro antimonii, addito inflammabili quodam, redux regulum. Hunc puluerisatum inieci spiritui nitri concentrato, qui partim ipsum soluit, partim sub pulveris albi forma reliquit; et solutio haec partialis diluta addito spiritu Beguini non minus rubens praecipitatum dedit, et residuus albus pulvis ab illo quoque similem colorem nactus est. Tentavi quoque partem huius reguli in aqua regia, e tribus acidi nitrosi partibus et vna muriatici parata, soluere; cum vero nimis festinarem in adiectione reguli, etiam partialem
tantum



tantum obtinui solutionem, vnde quoque pulvis parum rubens per spiritum Beguini praecipitabatur.

Concludo e dictis, regulo antimonii facultatem cum sulphure, accedentibus particulis igneis, rubrum, deficientibus iis, nigrum colorem efficiendi, cum mercurio communem esse, licet nondum colorem plane cinnabarinum obtinere potuerim, ad quem tamen color Kermis mineralis, quod coëctione vltra horam continuata paravi, valde accedit, modo saturatior est. For-
san similiter e regulo antimonii et sulphure sublimando cinnabaris parari posset; Sed crebris repetitis operationibus opus foret, vt sensim quaedam pars regulina cum sulphure in altum euehatur, quem laborem, cum nunc apparatus desit, alio forsan tempore, si opportunitas aderit, tentabo.

PRAENOBILISSIMO MEDICINAE CANDIDATO

CHR. EHRENER. WEIGELIO

S. P. D.

RVD. AVGVST. VOGEL

ORDINIS MEDICI H. T. DECANVS.

Cum suetum stadium academicum vix ultra dimidium dimensus sis; longe doctior tamen a nobis discedis, quam multi alii, qui per longe majus temporis spatium arti salutari dederunt operam: id quod equidem in ipsorum opprobrium haud dixero; quippe Tibi multae res aliter ac felicissime quidem contigerunt, dum institutionem a puero nactus es, juxta docile ingenium, idemque sane admirandum, hinc in rebus inprimis ad naturam corporum spectantibus ac in chemica arte, qua Experientissimus Parens Tuus excellit, do-

mi

mi jam tantos fecisti progressus, ut, quum ad Academiam accederes, neque harum rerum, neque multarum aliarum doctrina atque institutione amplius indigeres. Et quemadmodum jam Phytographia Tua Rugensis luculentum eruditionis Tuae documentum exhibet; ita non minus hoc est, quod in praesenti edis, specimen, quodque gratissimum fore Chemieae consultis, certissime confido. Secundet porro diuinum Numen conatus Tuos, quibus arti nostrae salutari incrementum, Tibi vero famam decusque parare voles. Scrib. in Acad. Georg. Aug. d. XXVI. M. Mart. A. R. S. MDCCLXXI.

PRAENOBILISSIMO ATQVE DOCTISSIMO
ARTIS SALVTARIS CANDIDATO

S. P. D.

IOANNES CHRISTIANVS POLYCARPVS
ERXLEBEN

PHILOS. D. ATQVE P. P. E.


Quantum faciat ad salutare artis medicae excercitium
philosophiae naturalis accuratior cognitio ex TVO
exemplo discant qui spernunt negliguntue quae ignorant.
Quantos scilicet progressus feceris in botanices studio, flora
edocuiſti quam abs TE habemus pomeranorugica, quantos
in chemiae nobilissimae artis fundamentis, disputatio inaugu-
ralis experimenta sistens elegantissima a TE instituta atque
obseruationes chemicas. Cum igitur in posterum in persanan-
dis hominum morbis felicissimus eris, egregia meritaque labo-

L

rum

rum praemia TE ferre, atque hanc felicitatem ex seueriori
naturalis philosophiae studio cum experientia iuncto TE repe-
tiisse et IPSE recte iudicabis et alii rerum haud ignari. - No-
vos, gratulor honores meritos, atque ut omnia fausta felicia-
que TIBI eueniant, sincerrime opto. Ex eorum numero
esse me voluisti, qui argumentationibus contra dissertationem
TVAM doctissimam publice proferendis ingenii TVI acu-
men TVAMque eruditionem auditoribus ante oculos ponen-
di occasionem TIBI dabunt; lubentissime officio in me delato
fungar, eoque lubentius, cum fauorem atque amorem, quo
me haecenus amplexus es, ulterius et mihi et aliis probent:
TIBI scilicet me non plane displicuisse iamiam ex inde collige-
re fas erat, quod collegio meo chemico interesse voluisti. Vt
vero et absens me amare mihi que fauere velis, vehe-
menter rogo. Goettingae, d. 25. Mart.

cl b c c l x x i.



OBSERVATIONES
CHEMICÆ
ET
MINERALOGICÆ.
PARS SECUNDA.

AUCTORE
CHRISTIAN. EHRENF. WEIGEL
MEDICINÆ DOCTORE.



CUM TABULIS ÆNEIS.

GRYPHIÆ,
APUD ANT. FERD. RÖSE. 1773.

ORDERED BY THE

CHURCH

MANUSCRIPTS

AND LIBRARY

CHRISTIAN UNIVERSITY

LIBRARY

PRÆFATIO.

Chemiae certe & Mineralogiae cognitio experimentis innititur iisque perficitur. Practicas igitur & experimenta continentes publici iuris facere animus fuit observationes, quarum primam collectionem *Observ. Chem. & Mineralogicarum* titulo *Goettingæ 1771.* speciminis inauguralis loco edidi & defendi, in his plagulis *Obs. Priorum* nomine citandam, nunc, qui hac æstate in hac Academia Botanica & Mineralogica docui, Chemica adhuc docere in posterum decreui, & circa hæc specimen editurus, hanc exhibeo alteram collectionem a me Præfide, Respondente IOHANNE THEODORO PYL, *Med. Cult. Barda-Pomer.*, publice defendendam. Primam tamen Observationem, magis licet theoreticam tam ideo inferui, quod secundæ ex *Obs. Prioribus* supplementum quoddam sit, adeoque in continuatione earum simul exhibenda, quam ut aliquis detur disputationi locus, cum contra experientias pauca obiici possint a dissentientibus; quæ vero ne omnino hypothetica videatur, id curavi ut immixtis experimentis, quorum aliqua saltem nova erunt, neque ab aliis publici iuris facta, etiam expertis illa non ingrata euaderet Chemicis. Altera methodum refrigerationis in *Obs. Prior.* Prima expositam emendatam exhibet & usus maioris redditam. Tertia & ultima furnos exponunt, illa emendatum destillationibus commodiori modo instituendis adaptatum, hæc facile novum, nondum, quatenus mihi innotuit, ab alio quo descriptum, quo
mine-

mineralium corporum indagandorum caussa instituenda experimenta facilitentur. Vtriusque delineationes addidi, quæ si minus elegantes forsan videantur, excuset B. L., cum vt magis accuratæ illæ euaderent, ipse eas sculpsim minus adhuc in hoc artificio exercitatus. Reliquæ obseruata quædam ad Chemiam pertinentia continent. Vbique breuitati studui, vix præter breues explanationes necessarias quid addens, nisi quæ, forsan notatu digna, dum hæc scribebam, succurrerunt, adducenda visa. In prima tamen paullo prolixiorem me esse oportuit, tum vt specimini disputatorio accedat hocce opusculum, cum vt obiectionibus respondere potuerim. Continuabo, si hæc placuerint, obseruationum variarum Chemici & Mineralogici argumenti editionem, in proxime edenda parte mineralogica potissimum traditurus experimenta ac docimastica, tum quæ ad indagandas lapides & terras v. g. Fluores, Feldspathum &c. pertinent, cum circa aliquas mineras nondum sat exploratas, quales v. g. plumbi minera nigra, fibrillosa &c. aliæque sunt, instituta, quibus obseruationibus passim vnus alteriusue instrumenti chemici noui vel emendati descriptionem & iconem addere propositum habeo. Fini desiderato satisfecero, si aliqua ex hic traditis Doctorum Virorum aliqualem approbationem meruerint.

Dabam Gryphiæ xiv. ante Calendas Octobris
MDCCLXXII.



OBSER-

OBSERVATIONES CHEMICÆ

ET

MINERALOGICÆ.

PARS SECUNDA.

OBSERVATIO I.

RESPONSIO AD DUBIA WELLIANA EXPLICA-
TIONI NOSTRÆ OBSERV. PRIOR. II.
OPPOSITA.

Observationum harum edendarum scopus licet magis sit
experimenta, quam theoretica, proponere, attamen
cum altioris momenti phænomena aliqua egeant expli-
catione, illamque ubi opus fuit breuem dare annisus sum, opti-
mus quoque hic locus erit refutandis iis, quæ explicationi meæ
fuerunt obiecta.

Dixi scilicet in Obs. Prior. II. *de Mercurii in pulverem conver-
sione per solum ignem*, pag. 31 - 43. a) & sufficientibus argu-
men-

a) Quæ etiam reperiunda, me infcio translata, in *Neuem Hamb. Magazin*,
X. B. 60 St. p. 541 - 568.

mentis, tum auctorum testimoniis, probare allaboravi, mutationes ibi expositas, quas ope huius operationis subierat mercurius, principii alicuius ex igne accessui deberi, quod, cum hucusque notis theoriis ex toto assentire nondum potuerim, neque proprietates eius experimentis sat compertas habuerim, omnis litis euitandæ causa particularum ignearum nomine nuncupavi, non tamen ideo LEMERII vel alius cuiusdam theoriam integram assumens & defensusurus, id tantum determinaturus esse quid quod ex igne accedat, a*) cum Phlogiston vasa vitrea non penetret, neque per fumum quid afferri potuerit in hac operatione, cui alioquin multa in augendo minii &c. pondere tribuuntur, neque particulas terreas salinas aut sulphureas in aëre obuolitantes causam huius phaenomeni constituisse probabile sit. b) Putaueram ita optime fecisse vt neutri parti
addi-

a*) l. c. p. 43.

b) Theoria est a Dno. BERAUD proposita in Abhandlung über die Frage: Warum manche Körper durch die Verkalkung am Gewichte zunehmen, welche nach dem Urtheil der Königl. Akademie der Wissenschaften zu Bourdeaux den Preis erhalten hat, in Mineralogische Belustigungen zum Behuf der Chymie und Natur-Geschichte des Mineral-Reichs. Sechster und letzter Theil. Leipzig 1771. Est vero eius sententia hæc: *Verum esse augmentum* corporum calcinatorum, etiam mercurii per se calcinati, ex testimoniis BOERHAAVII & MUSCHENBROECKII, sed in corporibus diuersis, & sub diuersis conditionibus diuersum, tamen a qualicunque igne, solari, culinari, carbonum, florum sulphu-

ris, & spiritus vini, efficiendum, etiam in vase clauso, reductione calcium metallicarum rursus demendum, (pag. 8-10.) *Accessisse partes materiales* cum calces ponderosiores de gravitate specifica amiserint. (pag. 11. sqq.) *Non tamen a particulis igneis* esse, (p. 15.) cum hæ sint miscela particularum salium volatilium, sulphurearum, aërearum materiæque ætheræ, (p. 17.) & lenissimæ (pag. 17. 19.) sint, metalla quoque in fusione non præponderent (pag. 20 sqq.) & calx plumbi reducta rursus de pondere amittat (pag. 24.), atque augmentum accedente libero aëre maius euadat (ibid). Neque e *pabulo ignis* esse posse cum huius partes vi ignis adeo subtiliscentur vt ubicunque effugiant & augmentum minus esse debeat, quo subtilius pabulum. (pag. 25.)

addictus, sed quæ experimenta iuberent & ratiocinia vera docerent, citra vllius partis studium, ex qualibet theoria, etiam contraria, assumens, de proprietatibus principii ignei ambiguus hærerem

25.) Neque *radios solis gravitate sua* materias in foco vitri caustici calcinatos augere, cum, si lux condensari possit, & ex maiori spatio in minus includi, si sensibiliter gravis sit, omnia systemata hætenus exstantia pessum itura; (p. 32.) & eo casu ob summam motus celeritatem lux omnia corpora destructura foret, quæ tamen pupillam transeat & in oculo sine eius destructione imagines pingat. (p. 33. 34.) Neque *aëris gravitatem*, aut *particulas* per vim ignis a *vasis separatas* facere posse ad augendum corporum calcinatorum pondus. Sed veram causam esse *corpora peregrina in aëre diffusa* & *vi ignis cum partibus corporum calcinationi subiectorum unita*. Adesse talia probari per evaporationem tot corporum, & olei vitrioli ac salis tartari, per attractam ex aëre aquam, augmentum. Debere vero se vnire per vim ignis cum corporis quod calcinetur partibus, licet ob gravitatem particularum salinarum sulphurearum & nitrosarum pes aëris cubicus tantummodo $\frac{1}{800}$ contineat, (p. 46. 47.) cum, antliæ exemplo pneumaticæ, vbi fumus adscendens rarefacto aëre descendat, etiam aër atmosphæricus ob particulas quibus gravidus fit vaporem det (p. 48.), similiter ignis initio vapores in aëre præsentis dissipet, quo facto aër iis liberatus & igne summopere rarefactus in poris suis particulas salinas & nitrosas non amplius sustentare possit, vnde hæmasculæ accumulæntur & in corpus ignis

actioni expositum agant, quod ob poros dilatatos facile eas recipiat (p. 49.). Hunc aërem partium aquosarum & terrarum iactura leuiorem factum statim attolli & subsequente grauiori aëris strato propelli, quod itidem particulis contentis orbatum nouo dimouendum, & sic porro. Quo solo motu omnis rudis materia magno aëris spatio diffusa corporum calcinatorum poros penetret, eorumque pondus augeat necesse esse, quod Systema HARTSOEKERI, GODOFREDI, DU CLOS experimentis & spiritus vini per regulum antimonii calcinatum tinctura fulciatur. Aliquas harum particularum etiam vasa vitrea penetrare, vnde & in vase clauso augmentum oriundum, licet minus.

Non reticendum duco ingeniosum tractatum celebris doctorum Virorum cætus approbatione insignitum, quem, dum Obs. Priores scribebam, nondum legeram. Quæ de *aëre* & *vasorum particulis* ait, non habeo quibus dissentiam. De *particulis igneis* sat mihi dicendum erit in hac Observatione, vt si hic ea anticipare vellem, postea inutili repetitione opus foret, easque augmentum istud efficere præter BOYLEUM, pluresque magnos Viros, etiam Clar. GMELIN in Tractatu *de Augmento ponderis quod capiunt quedam corpora dum igne calcinantur*, COMM. ACAD. PETROPOL. Tom. V. pag. 269. §. 7. affirmat. Idem valet de *radiis solaribus*, vbi tamen addendum, augmentum eius a summa vi & celerrimo motu oriunda desuntum nil probare,

rerem donec certiora me doceret experientia, eatenus sola existentiae probatione contentus. Sed & hæc negatur. Edidit quippe hocce anno Clar. WELL, strenua Blackianæ Theoriæ defensione *c)* notus, libellum *d)* quo dictam meam explicationem & Celeb. BUCHHOLZII *e)* sententiam refutare studet. Quamvis iam hic nostra non intersit vberius de calcis viuæ & materiæ igneæ proprietatibus differere, quippe huic materiæ, eiusque insigni in rem medicam influxui fusius pertractandis peculiarem destinaui libellum, edendum quamprimum experimentis quibusdam adhuc instituendis vacauerit, attamen cum accessus substantiæ cuiusdam

ex

cum plerique radii ab aliis corporibus multoties reflexi hinc per id ipsud debilitato impetu demum oculum intrent atque minori copia & concentratione neque quis sine noxa diu solem aspecturus sit, quanta vero vi polleant, tum corporum mineralium per irradiationem solis destructio, ac fatiscentia, & abundans ista in orbe terraqueo evaporatio perennem in natura circumadiuuans, a solis calefactione promouenda, cum summa foci speculorum vitrorumque causticorum vis omni igne artificiali maior abunde demonstrant. Quod vero *ipsa in aëre contenta corpuscula* attinet, doleo tam ingeniosam theoriā falsam esse, dum in minii calcinatione continuo flamma cum aëre iam rarefacto accedat, & in vase hermetice clauso nullo modo valeat hæc sententia, neque particulae quæ vitrum penetrent innotuerint, nisi igneæ. Quod salinas nitrosas sulphureas vocet eas particulas; malim illum hæc metaphoricè intellexisse, cum revera tales assumere ridiculum foret, quæ vi ignis decomponentur & profugantur, vitrum non penetrent, saltem in corpore cal-

cinato detegendæ forent & quidem pro diuersa aëris temperie ac mixtione diuersæ. Quoad *experimenta* quæ in maius theoriæ suæ robur adiicit, maculæ cinereæ auri a HARTSOECKERO fusi a vase, calx alba superficiem stanni a GODFREDO fusi tegens non a salibus & sulphure aëris fuit sed vera calx metalli phlogisto suo orbatæ, quod idem de filamentis cinereis reguli antimonii a DU CLOS fusi valet, & quas reguli antimonii calcinato demit spiritus vini affusus partes sulphur esse nemo probabit, igneas vero esse particulas ex nostra theoria facillime erit demonstrandum.

c) Rechtfertigung der Blackischen Lehre von der fixirten Luft gegen die vom Hrn. Wiegleb dawider gemachten Einwürfe. Wien 1771.

d) Forschung in die Ursache der Erhitzung des ungelöschten Kalks, nebst einigen freymüthigen Gedanken über die dessen Erhitzung bewürken solende Feuer-Materie. Wien 1772.

e) Chymische Versuche über das Meyerische Acidum pingue. Weimar 1771.

ex igne ad mercurium nostrum, & cum illo integra doctrina de Materia ignea negetur, paucis respondere non incongruum duco, eo quidem ordine, vt præmissis Experimentis aliquot cum mercurio solo igne calcinato institutis, primum meam de principio igneo exponam sententiam, dein quæ mercurium nostrum attinent argumentis, si quæ addenda sint, tuear, tandem de reliquis WELLIANIS dicto libello exhibitis obiectionibus quædam dicam.

Experimenta pro indole mercurii calcinati exactius indaganda vt instituerem, e phiala, cui indita vna Marca viui ex parte tantummodo in calcem versa erat, effudi superstitem viuum mercurium; rubrum tum penna euerri, cum diffracta phiala ope tubuli vitrei a phialæ parietibus separavi, quibus pars densior cinabarina firmitus adhærebat. Separavi *f*) superstitem mercurium currentem, qui omnino perfecte currens erat, neque vestigium pulueris relinquens aut caudam trahens, sed velocissimus nitidissimusque. Obtinui ita, ex Marca vna Mercurii viui phialæ inditi, viui $13, \frac{1}{4}, \frac{1}{32}, \frac{1}{128}, \frac{1}{256}$ lothones colon., & ex calce præterea separavi $\frac{1}{16}, \frac{1}{32}, \frac{1}{128}, \frac{1}{256}$, quæ pondera iuncta $13, \frac{1}{4}, \frac{1}{8}, \frac{1}{64}, \frac{1}{128}$ loth. æquant. Vnde si hoc pondus a Marcæ vnius pondere subtrahatur, pondus viui in calcem versi erit $2, \frac{1}{2}, \frac{1}{16}, \frac{1}{32}, \frac{1}{128}$ loth.: Sed obtinui massæ rubræ $2, \frac{1}{2}, \frac{1}{8}, \frac{1}{16}, \frac{1}{32}, \frac{1}{64}, \frac{1}{128}$ loth.: Si vero massæ rubræ & mercurii viui obtenti pondera addantur, efficiunt $16, \frac{1}{8}, \frac{1}{64}$ loth., quare augmentum pon-

A 3

deris

f) Maxima pars mercurii viui facile separatur ope pressionis per cōnum chartaceum. Cf. *Obs. Prior.* pag. 23. Remanent autem inter massam rubram globuli multi ægre hoc modo separan-

di, nisi hæc super chartam diffundatur & tunc globuli singuli residui ope styli vitrei, vel, si caute amalgamatio impediatur, metallici emoueantur.

deris $\frac{1}{8}$, $\frac{1}{64}$ loth. æquabit. Iam si viui mutati pondus & massæ rubræ præpondium ad partes semunciae 128^{vas} reducantur reperietur proportio vti 333 ad 18, id est vti $18\frac{1}{2}$ ad 1, vt igitur ab accedentibus particulis igneis pondus mercurii in calcinatione auctum in proportionem $\frac{2}{37}$. g) Elegi ex rubra massa frustula ruberrima fere diaphana, quorum textura lamellosa erat, qualis cinnabaris natiuæ est, neque color valde recedebat, simillima illius Iaponicæ purissimæ, quæ itidem semipellucida est; in quibus adeo certe nil amplius hærebat viui, cum in iis frustulis quæ nigrescente splendore pollebant adhuc portiunculam mercurii viui latere suspicarer; & cum ita electis mercurii solo igne calcinati frustulis, magnitudinis feminis papaueris vel minoris, non vero puluerisatis, institui experimenta sequentia.

EXPERIMENTUM I.

Mercurii calcinati elementa denarii directorii octo h) indi-
di

g) Augmenti quo mercurius in calcinatione ditatur testimonia iam in *Obseru Prior.* p. 33. adduxi. Liceat addere e KRUSII *Suppl. I. ad Obs.* & *experim. de mercurio* ex Msc. BOERHAAVII, *Nov. Comm. Petrop.* Tom. IX. p. 381 seqq. e mercurii calcis, destillationibus repetitis paratæ, rubræ vncia destillata violentiore igne, remanentibus gr. XV, obtentas fuisse viui drachmas viij cum granis octo, adeoque triginta & septem grana periisse §. 15. & ex aliis duabus vnciis cum dimidia, remanentibus granis octodecim, reuificatas fuisse vncias duas, adeoque drachmas tres cum granis quadraginta duobus periisse, §. 7. vbi itaque in priori casu

augmentum $\frac{1}{11\frac{1}{3}}$ in posteriori $\frac{1}{4\frac{1}{3}}$

viui fuisse censendum esset. Quæ experimenta licet adeo differant, vt ipsius viui partem in operatione amisissam fuisse probabile sit, poterunt tamen aliquali augmenti in calcinato præsentis testimonio inferuire, cum alioquin quantitas initio adhibita rursus obtinenda fuisset.

h) Librationes institui bilance, quæ vtrunque 2 Marcis Colon. onusta adhuc idem punctum status repetitis oscillationibus retinet accuratissime, & tamen ita onerata vnius elementi ex denario directorio (Nichtpfennings-Teil), id est

di phialæ vitreæ, affudi drachmam vnam mensura *i)* Olei vitrioli Nordhusiensis paullulum rubentis, grauitatis specificæ 1 Marcæ & 14 Loth. *k)* Phialæ orificium vesica fuilla texi. Mercurius superficie nigrescere incepit, & bulla vna alteraue magnitudinis capitis aciculæ orta, diu durans, & in liquido natans, vt solutio futura videretur, quanquam lentissima. Seposui ita in aëre temperato æstiuo. *l)* Post duos dies mercurius superficie nigricans euasit. Reliqui ita, & cum elapsis duodecim diebus denuo contemplarem frustula mercurii puluere albo obiecta fuerunt, concussione separanda, vt frustula intus adhuc rubra apparuere.

Agit itaque hoc modo acidum vitrioli in calcem dictam mercurii, non tamen eam ex toto soluit, nec reuificauit. *m)*

EXPERIMENTUM II.

Mercurii calcinati Elem. 8. in phiala vitrea addidi Olei vitrioli Anglicani albi, grauitatis specificæ 1 Marcæ & 13 Loth.,
Drach-

est Marcæ Colonienfis partis 65536tæ præpondium indicat lingulæ declinatione circiter lineam ($\frac{1}{12}$ poll.) Lubecensem æquante.

i) Vbi pondus mensura determinauit, intelligo quantitatem mensura æqualem quantitati aquæ pluuiæ id pondus pendenti. Sic Drachma vna mensura erit $\frac{1}{256}$ Mensuræ Lubecensis 2 Libras Colon. efficientis.

k) Notatum velim, ne qualibet vice repetendum sit, me grauitatem specificam explorasse modo in Obs. Prior. IX. indicata, adeoque, si grauitatis specificæ pondus sine quantitatis determinatione apponam, me intelligere pondus quantitatis quæ repleuit spatium,

quod implens aqua pluuiæ Marcam s. Semilibram vnam pendit, id est $\frac{1}{2}$ Mensuræ Lubecensis.

l) Omnia hæc experimenta, sicubi coctionis non ex instituto mentionem feci, instituta sunt solo calore temperato aëris atmospherici, mensis Iulii, in hypocausto septentrionem vergente, vbi itaque solis irradiatio calorem non auxit; Calore 76° Thermometri Fahrenheitiani.

m) Et neque hanc mercurii calcem per se factam, neque vulgarem sic dictum præcipitatum rubrum oleo vitrioli solui Ill. VOGELIUS perhibet in *Institut. chem.* §. 731.

Drachmam vnam mensura. Phænomena eadem. Oleum vitrioli paululum rubellum euaserat.

EXPERIMENTUM III.

Mercurii calcinati Elem. 8, cum Drachma vna mensura Aquæ fortis præcipitatæ *n*), grauitatis specif. 1 Marcæ & 4 $\frac{7}{8}$ Loth. tractaui eodem modo. Incepit statim solutio, absoluta intra pauca minuta, citius quam viuus solui solet *o*). Solutio hæcce elapsis duodecim diebus adhuc limpida aquea mansit, quam ideo ulterius exploraui.

- 1.) Affuso Spiritu falis ammoniaci cum Alcalico fale parato, qualem in Exper. X. adhibui, vsque ad saturationis punctum, minime turbata fuit, nec quid inde fundum petiit præcipitatum.
- 2.) Sed solutione Cinerum clauellatorum per deliquium (cf. Exp. IX.) saturata omnino turbata fuit, & præcipitatum spongiosum albidum copiosum ortum, longe maiori quantitate quam in Exp. VI. n. 2.
- 3.) Aethere (cf. Exp. XIV.) affuso non mutata persistit. *p*)
- 4.) Neque addito Oleo vitrioli præcipitare aliquid potui.

EXPE-

n) Vbi scil. Aquæ forti vulgari instillaui solutionem argenti purissimi in spiritu nitri factam, donec non amplius inde turbida redderetur, tunc per simplicem chartam typographicam filtraui & destillaui, vt ab argento rursus liberaretur.

o) Quem nisi digestionis committatur lente solui Ill. VOGELIUS affirmat. l. c. §. 735.

p) Putabam inde Mercurium viuum secessurum esse, cum id ex additione spirituum inflammabilium ad solutionem mercurii in aqua forti euenire notet Ill. VOGELIUS l. c. §. 768.

EXPERIMENTUM IV.

Calcis mercurii dictæ Elementis octo affudi Drachmam vnam mensura Spiritus salis muriatici Nordhusiensis, grav. specif. 1 Marc. & 1, $\frac{1}{2}$, $\frac{1}{4}$, $\frac{1}{8}$ Loth.

Actionem bullulis adscendentibus statim manifestavit, & reliquit globulos mercuriales. Inieci denuo frustulum optime cinnabarinum, adscenserunt bullulæ & remanserunt globuli viui liberati minuti primi tempore. Sed sine nitore erant ii, superficie cinerea, ut demum in calcem abituri viderentur *q)*, manserunt tamen ita non mutati adhuc post duodecim dies; currentes tamen omnino erant.

EXPERIMENTUM V.

Calcis eiusdem eidem quantitati superfudi Drachmam vnam mensura Aquæ regiæ grav. specif. 1 Marc. 3, $\frac{1}{2}$, $\frac{1}{8}$, $\frac{1}{16}$ Loth., ex Aquæ fortis non præcipitatae, grav. specif. 1 Marc. 4, $\frac{1}{4}$, $\frac{1}{16}$ Loth., partibus tribus, & Spiritus salis, qualem in Exp. IV. adhibui, parte una mensura compositæ.

Statim egit, Mercurius citissime obductus lana alba, a commotione in calcem albam dilabente, quo facto nova orta donec omnis mercurius calcinatus in albam calcem versus fuerit; absoluta fuit hæc operatio aliquot minutorum temporis primorum interuallo. Cum vero elapsis duobus diebus iterum lustrarem, vidi calcem albam disparuisse, & nunc globulos mercuriales currentes adesse, non tamen nitentes, forsan pauciores quam in Exper. IV. Abinde nil mutatum reperi post duodecim dies, miratus

q) cf. Ill. VOGEL. l. c. §. 737.

ratus non solui globulos, cum mercurius viuus itidem in aqua regia solui dicatur *r*).

EXPERIMENTUM VI.

Mercurii calcinati Elem. 8. addidi Aceti destillati grav. specif. 1 Marc. & $\frac{1}{16}$ Loth. Drachmam vnam mens. Illico bullulæ ortæ, sed paucæ & lentissimæ. Ast post duos dies solutio totalis facta, innatantibus tamen vt videbatur particulis albis puluerulentis paucis, quas elapsis duodecim diebus in parcissimos fioculos depositas vidi, remanente solutione limpida, neque tincta *s*), vt itaque in hoc confirmetur Ill. VOGELII dictum, mercurium sine igne tantum in calcem conuersum aceto solui *t*).

Hanc solutionem, vti illam in Spiritu nitri factam (Exp. III.) vltcrius indagaui ;

- 1.) Spiritu falis ammoniaci (Exper. X.) saturata, non mutata mansit, nycthemero tamen elapso tenui iridisque coloribus ludente pellicula tecta fuit.
- 2.) Solutio Cin. clauell. (Exper. IX.) parcum tantummodo inde deiecit præcipitatum cinerascens, vix rubellum, minori quantitate quam in Exp. III. n. 2.
- 3.) Aethere (Exp. XIV.) affuso nullatenus mutata fuit.
- 4.) Oleo Vitrioli addito puluisculus albidus fundum petiit *u*).

EXPE-

r) VOGEL. l. c. §. 738.

s) Studio adduco in hoc & XVII. experimento me non obseruasse coloris mutationem, quæ tamen præsertim in Alcohole a particulis igneis mercurii calcinati fieri debuisset, & forsan quoque oritura fuisset, si plus mercurii calcinati iniecissem, sed nolui maiorem

quantitatem impendere, cum reliquum, vti & quem in aliis phialis parauit, aliis experimentis, præsertim circa eius vim multiplicatiuam, destinassem.

t) l. c. §. 740. Idem affirmat STAHLIUS in *Spec. Becher.* p. 127. n. CVIII.

u) Num hoc ideo in Exp. III. n. 4. non

EXPERIMENTUM VII.

Mercurii Calcinati Elem. 8. affudi aquæ niualis destillatæ Vn-
ciam vnam. Vnica bullula orta. Post duos dies mercurius ru-
bicundissimus, & vnicus minimus globulus currens. Elapsis
duodecim diebus mercurius vix mutatus nisi nigricans, & pauci
minimi globuli reuificati.

EXPERIMENTUM VIII.

Vtriusque eandem recepi quantitatem, sed vltra octo hora-
rum tempus supra prunas ebullire fui; turbida euaserat aqua,
& mercurius pallidus, nitore orbatus & vnicus globulus reuifi-
catus.

Mouit me ad hoc & præcedens experimentum instituendum
Celeb. BUCHHOLZII experimentum, qui digestionem aquæ destilla-
tæ pluuiæ cum Mercurio præcipitato rubro, acriorem illam ob-
tinuit, aqua calcis & Oleo Tartari per deliquium affusis mercu-
riale præcipitatum largientem, neque tamen nitrosi acidi quid
prodentem, vnde partialem illam merc. præcipitati solubilitatem
vnitæ puræ materiæ ignis s. lucis iure tribuit x). Tam paruum
vero mercurii calcinati respectu aquæ affusæ quantitatem ideo re-
cepi, vt, vtrum ex toto solui possit, indagarem.

EXPERIMENTUM IX.

Mercurii calcinati Elem. 8. affudi Semiunciam (pondere)
solutionis cinerum clauellatorum saturatissimæ per deliquium, a

B 2

cry-

non successit, quod ob concentratius
acidum nitri mercurius facilius retine-
retur, vti etiam si cretæ aquaforti so-
lutæ oleum vitrioli additur, nec solu-

tio diluitur, tarde demum orta seieni-
tes fundum petit in crystallos collecta.

x) Chym. Verf. p. 91-95.

cryſtallis in illa ortis decantatæ y), grav. ſpecif. 1 Marc. 9 $\frac{1}{4}$ Loth. Bullulæ ortæ parvæ, lentiffime aſcendentes, merc. ſenſum intumuit pallidior, globuli mercuriales aliquot ſeceſſerunt, vt tamen duodecimo die adhuc pauci duntaxat liberati eſſent & calx mercurii valde nigricans z).

EXPERIMENTUM X.

Spiritus falis ammoniaci cum cineribus clauellatis parati, grav. ſpecif. 1 Marcæ & 1 Loth., recepi Semiunciam (pondere); inieci Mercurii noſtri calcinati Elem. 8. Statim incepit ſolutio bullulis minimis crebro aſcendentibus, & tempore quinque horarum omnis mercurius reuificatus fuit. Miratus celerem effectum, præuiſum tamen, cum particulæ igneæ ob maiorem cum alcalico volatili ſale affinitatem, mercurium deferere, adeoque qui non deſtructus fuit viuum relinquere & huic iungi debeant, interim cum contraria alii notent aa) pulcherrimum experimentum repetii, & ſequenti die adhuc 11 $\frac{1}{2}$ Elem. mercurii calcinati inieci, ſed ſimiliter ſtatim ſuperficies bullulis minimis albeſcebat, quæ a nouis protruſæ aſcenſerunt, donec diſparente rubedine ſoli globuli

y) Plura de hac vid. in Obſ. IV.

z) Mercurii viui partem vnā in cochleari ferreo ad ebullitionem calefactam, tum Salis alcalici partibus duabus in crucibulo fuſis additam, commotam, effuſam, inde fieri in aqua ſolubilem nec corroſiuam eſſe, ſed in medicina adhibendam, notat & Inclytum WALLERIUM inuentorem perhibet PETERSEN *kurze Abhandlung von der Calcination der Metalle im Feuer in kleinen Abhandlungen einiger Gelehrten in Schweden, über verſchiedene in die Phyſik, Chemie und Mineralogie*

laufende Materien. Erſter Band. Copenh. und Leipzig 1766. p. 218.

aa) Soluere enim ſpiritus vrinoſos calces mercurii Ill. VOGEL. l. c. §. 745 docet, niſi quod via humida paratas addit, hæc excludenda, vel cum bene ſaturatos notet noſter ſpiritus vrinoſus iuſto debilior fuit, quo caſu & inde elucebit non ſuperfluam me impendiſſe operam, ſi menſtruorum adhibitorum grauitatem ſpecificam in quolibet experimento notaui, e qua ſcil. concentratio eorum deſumenda.

buli mercurii viui minimi quidem aut nitidissimi celerrimeque currentes remanerent. Quod solum experimentum, nisi sequentia confirmarent, sufficit demonstrandis iis, quæ in Obs. Prior. dixi, Mercurium in ista calcinatione nullatenus per partis cuiusdam constitutiue priuationem vel aliam combinationem, sed per solum accessum materiæ alicuius ex igne in solidam puluerulentamque massam conuerti, cum hac materia ita ablata in pristinam formam redeat similiter ac si maiori vi ignis reuificetur.

EXPERIMENTUM XI.

Olei Therebinthinæ Drachmæ dimidiæ inieci aliquot frustula Mercurii calcinati. Illico ortæ sunt bullulæ paullulum nitentes, & postridie mercurius læte ruber, globulis paruis mercurialibus adhuc adhærentibus nitens. Duodecim diebus elapsis cum iterum perlustrarem, vix sedecima pars rubri remanserat, reliquus in globulos nitidos currentes reuificatus erat.

EXPERIMENTUM XII.

Olei Oliuarum *bb*) fere eidem quantitati iniecta frustula mercurii calcinati tertio die tumida reperi, pallida, globulis ma-

B 3

ioribus

bb) Oleorum in hoc & præcedenti experimento adhibitorum grauitatem specificam ideo non adduxi cum circa hæc tam insignis ista non sit momenti quam in solutionibus salium, sed tantum non semper eadem sit, neque methodus ea concentrandi adhuc notus. Et circa inflammabiles spiritus alia datur methodus vsitata & concentrationis gradum determinans scil. deflagratio &c. Cum tamen & multis in experi-

mentis vtilis sit grauitatis specificæ notitia, non displicebit si hic quorundam oleosorum & inflammabilium grauitatem specificam, qualem eam comperi enarrem, quod supplementi instar ad Obs. Prior. IX. considerari poterit. Pondus indicatum notare pondus quantitatis vnâ marcam aquæ volumine æquantis iam supra monui.

Reperi vero grauitatem specificam

Olei

ioribus viui plena, quorum & aliqui liberati; duodecimo die vltra duas tertias partes reuificatus fuit in magnos globulos niten-tes sed lanatos, vt frustula adhuc hinc inde rubra, lana albida connexa. cc).

EXPERIMENTUM XIII.

Mercurii calcinati Elem. 8. affudi Drachmam vnā mensu-
ra Alcoholis fortissimi, non tartarifati, in deflagratione semun-
ciæ ne vestigium quidem humiditatis alicuius relinquentis. Bul-
lulæ paucae ortæ, lentissimeque motæ. Duobus diebus elapsis
mercurius rubicundissimus euasit, & vnicus globulus minimus
splendens adfuit; plures post duodecim dies, nitidi, & reliquus
calcinatus non mutatus nisi forsan color magis dilutus. Alco-
hol tinctum non fuit.

EXPERIMENTUM XIV.

Aether f. Naphta vitrioli subtilissima dd), qui omnem cum
aqua vnionem respuens, illi superfusus admota candelæ flamma
in

	Loth.
Olei Amygdal. dulcium -	14 $\frac{1}{2}$ $\frac{1}{8}$
- - Oliuarum - - -	14 $\frac{1}{2}$ $\frac{1}{8}$ $\frac{1}{16}$
- - Papav. albisimi -	14 $\frac{1}{2}$ $\frac{1}{4}$
Pinguedinis liquidæ Ceti (<i>Trahn</i> vocant) -	14 $\frac{1}{2}$ $\frac{1}{4}$
Olei sem. Cannabis -	14 $\frac{1}{2}$ $\frac{1}{4}$ $\frac{1}{8}$
- - - Lini Holland. -	15
- - Nucum iuglandum	15 $\frac{1}{16}$
Sebi bubuli, post refrige- rationem, vbi cautela opus fuit ne dum lique- factum vasi ponderanti ingerebatur, in refrige- rato a bullulis aëreis ca- ua relinquerentur :	14 $\frac{1}{2}$ $\frac{1}{4}$

cc) Puto hanc lanam ortam esse e
mucilaginoso olei expressi præcipuam
differentiam ab æthereo efficiente, quod
mercurii globulis reuificatis se appo-
nendo illos connexit vt minus liberati
fuerint. Cæterum notabile est globulos
hic maiores fuisse quam in præceden-
ti Experimento, & reuificationem paul-
lum citius successisse; annon quod olea
expressa paucioribus particulis igneis
prædita quam ætherea facilius ea assu-
mant, licet τὸ mucilaginofum depo-
nendo minorem partem mercurii reui-
ficasse videantur.

dd) Facile intelliget B. L. mihi ser-
monem

in distantia vnus pollicis transuersi accendebatur, iniectionum mercurii calcinati frustulorum superficiem quidem cineream reddidit, vt egisse in illum appareat, paucissimos tamen globulos reuificauit *ee*).

EXPERIMENTUM XV.

Solutio argenti purissimi saturatissima in aqua forti mercurium nostrum calcinatum dimidiæ horæ interuallo totum soluit, neque exemplo arboris Dianæ, phænomeni Chemicis notissimi, vlla præcipitatio argenti orta, sed cum adhuc post duodecim dies solutionem hanc considerarem, nullatenus mutatam reperi.

Patebit ex his experimentis Mercurium calcinatione per solum ignem immutatum cum viuo multis conuenire, multis differre respectu rationis ad menstrua; & confirmari, quæ in Obs. Prior. affirmaui mutationem quam in ista operatione passus est accessui materiæ ex igne deberi, cum ex plerisque horum experimentis appareat illum non minus per infusos liquores ab iis liberari & in pristinam formam currentem restitui posse, quam ope maioris motus ignis fieri reuificatio docet, idque eo facilius citiusque quo magis ad recipiendas eas particulas prona sint liquida affusa. Reliqua consuetaria ex his experimentis deducenda, tum hinc inde annotaui, cum in sequentibus passim suis in locis sum adducturus.

Quod

monem non esse de sic dicto Oleo vini, in fine destillationis liquoris anodynæ mineralis HOFFMANNI cum phlegmate acidulo transeunte, sed de Liquore æthereo FROBENII, statim e peculiari spiritus vini & acidi vitriolici proportionem destillatione obtinendo, vel ex Liquore anodyno encheiresibus de-

bitis separando, longe subtiliori, de quo conferenda, quæ GEOFFROY in ACTIS PARISINIS docuit.

ee) Annon & hinc liquet inflammabiles liquores eo lentius & difficilius igneas particulas assumere, quo plures earum iam assumerunt, iisque magis subtilisati sunt?

Quod vero meam de particulis igneis attinet sententiam, illa mihi ideo æquatiùs videtur determinanda, cum in Obs. Prior. breuiter dicta minus rite ac optauì intellecta esse appareant. Sic me LEMMERIANAM de particulis igneis theoriam MEYERIANÆ de acido pingui substituere *ff*), & ignis materiam male STAHLIANO Phlogisto præferre *gg*) lego, meque simul cum LEMMERIO impugnari video *hh*). Sed non videtur legisse Clar. WELL, quod ipsissimis verbis declarauì *ii*), me ideo duntaxat particularum ignearum voce usum esse ne litigiis istis circa proprietates huius principii motis immiscerer, id tantummodo contendens esse quid quod ex igne accedat. Quare neque LEMMERIANÆ, neque MEYERIANÆ theoriarum plenarius sectator haberi volo, ne alienæ theoriæ obiicienda in me redundant, neque mei, si quos in ratiocinando commisero, errores illarum impugnationi faueant. Propriam itaque meam contendo theoriam, ex diuersis selectam, e nullius consentientis dogmatibus refellendam, cum varia circa momenta dissentiam, minime tamen nouam iactaturus quam iam prisci Chemiæ patres partim fouerunt, posterorum multis iusto uisam simpliciore.

Est uero mea sententia hæc: Esse quid in igne, quod essentiam eius constituat, uerum principium s. elementum, quibusdam corporibus iunctum quiescens, liberatum agens, motu adiuuandum, e cuius actione in Phlogiston s. corpora id continentia ignis fieri possit, nunquam sine istius principii existentia oriundus, accedente aeris liberi motu flamma. Purissimum hoc, quatenus innotuit, apparere in radiis solaribus, igne electrico,

in

ff) WELL. *Forschung etc.* p. 9.

gg) *ibid.* p. 16.

hh) *ibid.* p. 15 - 30.

ii) Obs. Prior. p. 43.

in culinari forsan alteratum, vt tamen aliena sint, quæ accesserint, distinguenda cum certæ indolis vasa v. g. vitrea non penetrant. Hoc colorum, lucis, caloris primariam causam, primum mouens, summe actiuum, salibus oriundis fontem præbere & partem constitutiuiam essentialem, ipsum nondum modificatum, nec ad aliquam notarum in Salibus classium amandandum, tamen illa generare cum terra & aqua, quæ ideo in decompositione Salium, aufugiente hoc, solæ eorum partes constitutiue habitæ fuere *kk*). Hoc cum subtilissima quadam terra, forsan ipsius
actione

kk) Iam IOH. BAPT. van HELMONT aquam fere vnicum elementum primigenium esse assumpsit, in quam terra tandem conuerti possit per essentia suæ priuationem.

STAHLIUS *Sal in se nil aliud esse nisi summe subtilem terram cum aqueo corpusculo connexam*, *Opusc.* p. 96. asserit & similia *ibid.* pp. 110. 129. 132. 557. affirmat; *neque materia vlla conspicuum, aut demonstrabile aliud falsedinis essentiam constituens principium dari, in Specim. Becher.* p. 42. 43. Boracis exemplo probare studet. Cum vero Salium in terram resolutione nil aliud probetur quam illam in iis adesse, dum volatilis pars separata auolare potuit, vti iteratis solutionibus & evaporationibus ex vitriolo, in quo tamen acidi præsentia certissima est, demum sola ochra parcissimo salino prædita, e cineribus clauellatis tamen sola terra remaneat, tum etiam, non dicam ex vulgari terra & aqua, sed neque ex his obtentis terris & aqua denuo Salia ista obtineri possint, neque adeo terra e distillatione aquæ pluuiialis residua in aqua ista rursus ex toto solubilis sit, o-

Pars II.

minino inde apparet auolasse quid quod ad terræ cum aqua combinationem, indeque oriundam salinam substantiam, necessario & essentialiter requiratur, iureque principium salinum dicendum sit; in quo etiam consentientem habeo Præceptorem, sempiterno pietatis cultu prosequendum, Ill. VOGELIUM in *Instit. Chem.* nota ad §. 85.

Neque probandæ salium ex sola terra & aqua genesi sufficiunt adductæ ab Ill. WALLERIO (*Rede vom Ursprunge der Salze in kleinen Abhandl. einiger Gelehrten in Schweden etc. 2ter Band*, pag. 12.) experientia *salis albi ex oleo & terra sublimandi*, quod tamen olei saporem retineat, & *salis e calce viua per aquam obtinendi*, vbi tamen in calcareo nil eius adfuerit, dum additum Sal quodcunque impediatur quo minus calx viua fiat, cum, priorem casum quod attinet, reuera multum salini in quolibet oleo contineatur, euoluendum, etiam ad phlogisti cum aqua combinationem necessarium, ad quod ignis actio accedit, quoad ultimum casum vero omnia ab igne pendere iam plu-

C

actione modificata, constituere Phlogiston, Salium consanguineum, mite illud & iners, omnibus in corporibus plus minus magna copia præfens, huius actione euoluendum, vt liberetur hoc, & actiuum se præbeat, nunquam sine illius præsentia effectum exhibiturum. Hoc aëre vehi, in omnia corpora naturalia agere, ad imperfectorum perfectionem, perfectorum destructionem multa facere, aëris elasticum augens ni constituens, veterum Pabulum vitæ, Flammulam vitalem, Ill. a LINNÉ Electricum pulmonibus hauriendum. Hoc fluiditatis & soliditatis pro conditionibus corporibusque iunctis diuersis principium, perennem in natura adiuuare circulum, omnis motus intrinseci ac vis multiplicatiuæ causam atque principium esse, vt fermentatio, epidemix, contagia &c. ab illo originem ducant //). Hoc veri ignis, materiæ f. particularum ignearum, principii ignei f. lucis nomen iure mereri, vel caustici ab effectu, dum καυχάζω etiam Græcis ardere, vrere audit; quæ nomina mihi Synonyma erunt.

Hoc existere nemo negabit, qui excitandi & alendi ignis phænomena, eiusque actiones & effectus studiose indagauit. Nec obstat atmosphæram minus circum caustici speculi focum quam culinarem ignem calere mm), cum ibi radii recta progrediantur, hic quaqua versum diuergant licet plerique vi furnorum fursum cogantur. An quoque candelæ vel lampadis flamma ope tubuli ferruminatorii (*Löthrohr*, *Bläserohr* vocant) in conum propulsa
verus

pluribus ab aliis demonstratum sit, & a me probabitur in sequentibus.

//) Quæ obscura si videantur, atque nimis hypothetica, cum tamen suis innitantur argumentis, vetante hic pro-

posita breuitate alibi fufius exponendis, eatenus affirmanda censebo donec veriora & clariora alii tradiderint.

mm) WELL. *Forschung etc.* p. 29.

verus ignis non sit, cum etiam circum hanc atmosphæra minus caleat, vt chartam admotam in distantia dimidiæ lineæ non accendat, quæ apice metalla facillime fundit & ad dimidium pedem admotam manum æstu lædit? & cuilibet candelæ flammæ manum ad latera sextuplo propius admoueri posse, quam supra illam, lippis ac tonsoribus notum est.

Vt itaque omnino vnico elemento f. principio ignis nomen dari possit *nn*), si alioquin id ita vocare licet quod proxima causa ignis est, illumque producere valet simulac in actum abit? Et ita intellexere iam veteres. Vel si nomen obstat, vt effectum f. actionem quam agens f. causam ignem vocare malimus, dicatur per me principium ignis f. lucis, perinde erit, dummodo concedatur hoc solam proximam ignis f. flammæ causam, in illa ipsa tale adesse & tale in alia corpora agere. Et idem de solaribus radiis valet.

Vt vero hoc effectum exferat vtique motus opus erit; vnde frictio actionem eius omnino poterit promouere, nunquam tamen sola ignem effectura, nisi adesset principium, quod per illam motum ignem cieret. Vt itaque si frictio sola ignis causa primaria assumenda *oo*), denuo explicandum erit quo modo & qua vi illum producere valeat.

Neque opus est, vt quod principium ignis vocamus semper sub omni conditione & solum ignem producat *pp*). Agere ne-

C 2

quit,

nn) ibid. p. 26.

oo) ibid.

pp) ibid. p. 20.

Acida & alcalia mixta coeunt in sa-

lia media neutrorum effectus edentia. Acidum vitriolicum in Gypso, sulphure ita inuolutum est, vt nemo hæc corpora salina dicturus sit, nec salini quid con-

quit quod non reperit in quod agat; & in qualibet actione requiruntur conditiones illam facilitantes impedimentaue remouentes *qq*).

E dictis patebit quæ sit sententia mea, alibi ulterius exponenda suisque argumentis tuenda. Sufficiat hic probandæ eius existentiae mercurii dicta mutatio.

Phænomena in hac operatione obuia sat explicavi *rr*), ut pauca addenda sint. Quicquid Clar. WELLIO placeat, esse tantummodo modificationes *ss*), ratione tamen sua carere nequeunt, vbi hic triplex duntaxat datur modus, ut scil. mercurio quid addatur, aut dematur, vel partium eius constitutiuarum alia fiat combinatio. Ultima vero effecta non esse reuificatio ope solius ignis

continere crediturus, nisi illa chemice indagando tale quid obtineat. An vero ideo acidum vitriolicum salinum non est cum non semper tale se præbeat?

qq) Sic Salia non agunt nisi soluta; ergo secundum WELLIANAM argumentandi methodum non hæc solutionis causa habenda, sed aqua illa continens, cum tamen, vix vlla vera solutio præsertim aquosa possibilis sit nisi aut in menstruo aut in soluendo salini quid hæreat. Similiter ignis produci nequit sine existentia & actione principii cuiusdam, cui ideo iure ignei vel ignis nomen dandum; sed requirit ut sufficienti copia adducatur, rite in subiectum dirigatur, (v. g. radii solares per speculum causticum colligendi in focus) actio facilitetur. Ad flammam producendam requiritur aer liber accedens, non vero ut ignem producat, vel quatenus aer est vere alimento inserui-

at, sed ut candentes particulas magna copia & vi auferat, alioquin lente auolaturas ut visum effugiant; vehiculi itaque vices sustinens, aperto scintillarum flammam furni validam præcedentium exemplo.

Neque Phlogiston inflammari posset, nisi aut in illo lateret, aut ab extra adveheretur principium inflammationem efficiens, quod vero ex mea quidem sententia optime ita explicatur, ut Phlogiston ex principio ignis & subtilissima quadam terra compositum esse assumamus, unde a motu vel accessu particularum ignearum motus principii illo contenti oriundus, cuius effectus pro minori vel maiori gradu & varia modificatione lux, eaque concreta vel radiis coloratis distincta, calor, ignis, flamma vernaculis nominibus nuncupari solent.

rr) Obs. Prior. p. 30-43.

ss) *Forschung etc.* p. 22. 23.

ignis, eiusque fortioris succedens docet, cum ii effectus maiori igne augendi forent, vnde primum erit assumendum, confirman- te augmento ponderis maiori ignis gradu rursus auferendo, nec non reuificatione per affusa fluida efficienda, vti Experimenta adducta demonstrant. Nec obstat rationi, in minori motus gra- du adhærere posse corpori cuidam, quod in maiori per rapidi torrentis vim rursus abripiatur. Neque opus est, vt in quoduis corpus eosdem exferat effectus. Agit omne principium actiuum quamdiu non adsunt quibus impediatur, sed pro passiuo s. subie- cto diuerso diuersum itidem exhibet effectum. Sic, vt plura alia taceam, acidum nitri alcali fixo iunctum refrigerans nitrum dat, cum ignito tamen inflammabili corpore detonans, volatili com- binatum iam solo calore flammans, quod argento iunctum sum- mum corrosiuum dat a magno in corpus animale effectu inferna- le adeo dictum; & ipsa corrosiua sunt duntaxat relatiue talia scil. simulac adest in quod ita agere possunt. Similiter principium ignis prout diuerso corpori plus minus iunctum occurrit, nunc rodentem, causticam vim exferere potest, nunc iners vix perci- piendum latere donec liberatum vel in motum positum denuo a- gens se effectum præbeat.

Sufficiant hæc probandæ meæ sententiæ mercurium in hac operatione cum neque quid amiserit, neque partes eius constitu- tiuæ aliam inter se inuicem passæ sint combinationem, formam mutatam &c. accessui materiæ cuiusdam debere, qui cum hic ex solo igne fiat, per vas vitreum, idque ne quidem candens, cum itidem radiis solaribus effici posset *tt*), si tempus & circumstan-

C 3

tiæ

tt) Saltem viuum aqua forti solutum inspissatum in foco speculi caustici in- pul-

tiæ fauerent, erit a principio, quod ob reliquos, quos edit, effectus igneum dicendum. Ne tamen, dum quibusdam Cl. WELLII argumentis respondeo, reliqua maioris forsan momenti tacendo effugere videar, singula perlustrabo.

Ad pag. 9.

De me iam dixi, me nullius theoriæ ex toto addictum cense-
 ri velle, sed absque præiudicio auctoritatis sola veritatis vesti-
 gia indagare, ideo tamen Celeb. Virorum experimenta in vsum
 meum vertere & ratiocinia vera experimentis fundata itidem as-
 sumere; in eo tamen LEMERIUM, HOMBERGIUM, MEYERUM,
 WIEGLEBIUM, CRANZIUM, BUCHHOLZIUM, priscosque Chemi-
 cos sequi, & a BLACKIANÆ theoriæ defensoribus, cum HELMON-
 TIO aliisque peculiare ignis elementum negantibus, dissentire, vt
 peculiare principium asseram, quod in actum positum ignem pro-
 ducere valeat, sine quo nullus ignis oriundus, cuius cum proxi-
 ma causa & essentialis pars constituens sit merito igneum dicen-
 dum. MEYERIANAM theoriam tamen ideo totam amplecti ne-
 queo, quod recentiorum experimenta speculis causticis instituta
 idem in solari assumendum iubeant, quod ibi soli culinari igni
 tribuitur, in hoc forsan a pabuli differentia mutatum, sed acci-
 dentaliter duntaxat; fieri tamen diuersæ corporum igne aperto &
 clauso mutationes probare videntur, nisi hæ plus minus validio-
 ri agentis principii applicationi attribuendæ. De Phlogisto num
 explicatio clarior existat quam mea, dubito.

Celeb. D. BUCHHOLZIUM a nostra sententiâ plane deuiare &
 calcis viuæ ortum per terram inflammabilem BECHERI s. Phlogi-
 ston

pulcherrimam rubram calcem conuersit Celeb. BUCHHOLZ *Chym. Vers. etc.*
 pag. 88.

ston STAHLII explicare non video. Lego unicam materiam igneam existere in natura vv) — persuasam se habere veritatem substantiæ ex igne ad terras calcareas vel calces metallicas accedentis xx) — eiusdem in igne solari & culinari, unde MEYERI acidum pingue in solari deficiens negandum yy) — & MEYERI acidum pingue esse simplicem puram materiam lucis, sub variorum corporum per ignem solarem aut culinarem calcinatione arctiorem unionem cum iis ineuntem, cui etiam causa rubedinis mercurii igne in puluerem conuersi tribui posset zz) — huius ope phlogiston cum terra calcarea intime vniri, unde forsitan causticum componatur aaa) — & phlogiston adesse debere in lapide calcareo e quo bonam calcem vinam vrere cupimus bbb). Vt itaque, licet vltimo in loco unionem phlogisti cum terra calcarea arctiorem assumere videatur, tamen cum eandem vi materiæ igneæ fieri præcedentibus paginis coniiciat, minime inde ad BLACKIANAM Theoriam proxime accedere videatur, vti Clar. WELLIO placet, sed potius penitus discrepare, qui ex accessu ad terram calcaream-explicat, quod secundum illam soli iacturæ sic dicti aëris fixitribuendum. Me quidem iudice licet phlogiston qua tale terræ calcariæ vniri minus putem, vtpote quod vi ignis maximam partem decomponatur, tamen accessum & unionem materiæ igneæ cum dicta terra, (sit ex igne aut ex phlogisto ipso,) promouere, hinc lapides calcareos duriores plurique phlogisto diuites meliorem calcem dare ccc) minime nego, quin potius meæ faueat sententiæ dum materiam igneam inter partes constitutiuas phlogisti numerans, ita

vv) Chym. Versf. etc. in Præfat., adducto simul Ill. POTTII effato, soli illam fontem debere.

xx) l. c. p. 36.

yy) ibid. pag. 54.

zz) ibid. p. 89.

aaa) ibid. pag. 69.

bbb) ibid. p. 71.

ccc) BUCHHOLZ. l. c. p. 70.

ita fieri arbitror vt in Calcarei vel cretæ, parciori vel nullo (si-
quidem id assumi posset) phlogisto dotatorum, internam compa-
gem minus agere dum possit ignis, quam in superficiem, ideo
quoque minus illi adhærere, cum vbi copiosius phlogiston adsit,
ex hoc ipso euoluta materia ignea minimas calcarei particulas eo
validius adgredi suaque actione extus admoti ignis effectum au-
gere possit, vnde etiam docente experientia cretæ laxiores, la-
smundenfis exemplo, cum pabulo ignis per strata alterna furno
infundibuliformi induntur, vt eo validiorem ignis vim experian-
tur, cum firmiores calcareos ita locasse sufficit, vt flamma in fur-
no circulans inter frustorum interstitia progredi possit *ddd*).
Phlogiston tamen qua tale id solum non efficere, neque plane
necessarium esse, sed etiam solum ignem admotum, licet tempus
diutius requiratur, calcareo in calcem viuam mutando sufficere,
non habeo quin Cl. WELLIO concedam, cum e testæ conchaceæ
spiritu nitri solutæ, tum oleo tartari per deliquium præcipitatæ,
& edulcoratæ igne clauso candefaciente quinque horarum tamen
in optimam calcem viuam conuersione *eee*), id quidem sequi vi-
deatur aut Calcaream terram hac methodo phlogisto suo non
penitus orbari, aut ipsius præsentiam non essentialiter ad oriun-
dam calcem viuam requiri, quamuis e contrario diutius protracta
calcinatio qua indiguit, id saltem probet Phlogisti in Calcareo
præsentiam ignis in illum actionem promouere, materiæque ig-
neæ vnionem facilitare.

Pag. 10-12.

Cretæ in Spiritu salis solutæ per lixiuium causticum in ve-
ram calcem viuam præcipitatæ explicationem per causticum ab al-
calico

ddd) cf. *Schauplatz der Handwerk. etc.*

eee) *Forschung etc. p. 43.*

calico fale ad terram calcaream transpositum negat, *cum creta pulverisata lixiuio caustico iniecta, si hoc per additum spiritum salis saturatur, calx viva tamen non euadat.* Sed mihi quidem ista consequentia necessaria non videtur. Solutioni argenti in nitri acido affusum acidum muriaticum, purum vel in fale medio latens, unionem inire cum argento, & cum illo in calcem præceps ire cuilibet notum est; quod tamen non fiet si muriæ vel adeo spiritui salis iniiciatur argentum, subtilissime licet comminutum, tumque acidum nitrosum addatur. Similiter & hic creta nulla arte adeo subtilisari potuit, ut particulæ eius tam discontinuatæ sint, quam si acido soluta est, unde etiam in experimento, quod CLARWELL opposuit, causticum ita liberatum minus separatis cretæ particulis & in fundo iacentibus minus quoque poterit adhærere, adeoque facilius in auras abibit, quam si solutioni cretæ affuso lixiuio, statim, simulac liberatur, minimas cretæ moleculas ex solutione secedentes offendit. Quantum vero in chemica corporum unione præstet particularum discontinuatio patet ex alterius solutionis per aquam, antequam altera affundatur, diluendæ encheiresi ad melioris notæ purpuram mineralem *fff*) ex auri stannique solutionibus parandam necessaria, cum si non dilutæ commisceantur, minime iste color oriundus, cum ob particulas minus discontinuatas minor unio fiat, forsan quoque volatile principium tingens magis in auras abeat.

Ad

fff) Quam arcta vero unio ibi fiat ex ILL. VOGELII verbis patet, qui stannum ita auro tam firmiter adhærescere ait, ut neque aquæ regię beneficio, neque fusione per antimonium, neque

cupellatione abinde facile separetur, nisi prius cum cupro fundatur, dein in cupella cum plumbo tractetur. *Instit. Chem. §. 780.*

Pars II.

D

Ad pag. 15. 16.

Magni STAHLII circa chemiam merita semper quidem veneror, non tamen ideo capitalis peccati me accusandum censeo, neque doctissimum virum iusto minori cultu prosequi puto, si meliora edoctus aliter sentiam. Sed neque adeo distare videbimur. Vt enim a BECHERO incipiam, cuius dogmata insigni commentario explicavit STAHLIUS, ille quidem ignem ex agitatione particularum terrearum cum aqueis eleuatarum fortissima a primo motore productum nec creatum dicit ggg), attamen aliis in locis de *introsusceptis particulis igneis* manifeste loquitur hhh), & *ignem esse substantiam materialem* contra LUDOVICUM de Comitibus & BERNARDUM contendit iii), corporumque igni expositorum *gravitatis alterationem particulis igneis* s. substantiæ in illa agentibus & figendis tribuit kkk), idque strenue affirmat, neque interni ignis per externum excitationem explicari posse, nisi externi vel interni ignis *per particulas concursus* & vnio admittantur, asserit lll).

STAHLIUS vero licet ignem non rem absolutam sed congeriem corpusculorum vehementissimo motu verticillari affectorum dicat, mmm) & flammam sine materiæ emissionem formaliter calorem excitare nnn), attamen itidem ooo) ait *substantiam* illam, quæ primo directe igneo motui aptam reddat corporum compagem,

ggg) *Physf. subterræn.* p. 14. N. 10 & 11.

hhh) *ibid.* p. 218. N. 87. p. 219. N. 93. p. 220. N. 96. p. 223. N. 109.

iii) p. 220. N. 98.

kkk) p. 220. N. 96. & pag. 224. N. 115. 116.

lll) *ibid.* p. 221. N. 99.

mmm) *Specim. Bech.* p. 18.

nnn) *Fund. Chem.* p. 37. vbi tamen cum p. 36. *Ignem aggregatum plurimarum particularum summe mobilium actu motarum* dicat, hæc cum vasa vitrea penetrent, quæ nullæ hactenus notarum, peculiaris indolis sint necesse est, a phlogisto distinguendæ quod ea non penetrat.

ooo) *Specim. Bech.* p. 19.

gem, *unice esse hoc principium, quod proinde ab hoc directo sui effectu ignem elementarem, potius elementum f. principium ignis appellare cogamur a posteriori, quæ omnino cum nostra theoria conueniunt; cum vero ad substantiam ipsam mixti vt ingrediens, vt materiale principium & partem totius compositi constitutum concurrere materiam & principium ignis, non ipsum ignem, quod Phlogiston appellare coeperit, nempe primum ignescibile, inflammabile &c. ibidem subiungat, sine cuius materiae in corporibus praesentia ignis ipse nullam iis inducere possit destructionem intimiorem ppp), neque tamen nunc dicat, quid sit inflammans istud quo inflammabile principium f. terra accendatur, mihi quidem, nisi ista ab antea dictis distinguere voluerit, ibi ea confudisse videtur qqg), qui τὸ φλογιστον, a φλογισμῷ f. inflammantis ab inflammabili distinctionem necessariam iudico, neque sine omni iure ita iudicare mihi videor, cum etiam Illustris Viri aetate celeberrimi, HENCKELIUS, dum Phlogiston f. inflammabile esse in corporibus naturalibus id terrestre dicit, quod ignem capiat & per occasionem in flammam erumpat rrr), eo ipso inflammans praesupponere videatur, & Ill. POTTIUS sss) (postquam lucem & ignem distinxerit) ttt) distinguat, & Principium*

D 2

pium

ppp) *Opusc. Chym. Phys. Med.* pag. 592.

qqg) Et vbi de terra inflammabili alibi vt ingrediente corporum naturalium loquitur, de nostro Phlogisto sermo est. Et distinxisset forsitan ulterius si mercurii in puluerem conuersionem solo igne in vase clauso possibilem persuasam habuisset, quam instituisse non videtur cum in *Specim. Bech.* pag. 81. illud experimentum, nempe mercuri-

um currentem per se in puluerem precipitandi solo calore, intactum relinquere se malle affirmet, quam imitari.

rrr) *Flora Saturniz.* p. 375.

sss) *Versuch Chymisch-Physicalischer Betrachtungen über die Eigenschaften und Wirkungen des Lichts und Feuers*, in *Lithogegnosia* Edit. II. Berol. 1757.

ttt) pag. 66.

pium lucis tunc demum ignem & arfionem efficere dicat, si cum terra tenera specifica inflammabili moueatur vvv).

LEMMERII theoriam omnem me ideo ex toto non assumere, quod respectu existentiae principii ignei illi assentiam, iam dixi.

Ad pag. 17.

Quid sint particulæ igneæ? iam dixi esse principium istud, quod in motum redactum proxima & vnica caussa lucis, caloris & ignis sit, sine quo nunquam ignis oriundus, quem ipsum constituat, cuius motus autem a variis causis remotis, frictione &c. cieri possit. STAHLIANUM Phlogiston esse non dixerim. Phlogiston enim mihi est mixtum ex principio igneo & subtilissima terra, vnde latentis in eo principii ignei effectus apparere nequit antequam hoc a terra ista liberetur. Patet e dictis definitionem hic a Clar. WELLIO datam a nostra sententia differre — quin ipsius materiae igneæ esse, cui omnino competet. Si enim de inflammabili loquitur, non dixit modum, quo ab eius motu ignis oriundus.

Ad pag. 18.

Omnino motus requiritur, qui tamen remota caussa duntaxat erit, cum sine principio tali hunc effectum producere nequiret.

Ad pag. 19.

Motus iste vario modo effici potest; omnia eo spectant, vt impedimenta principii istius motui obstantia remoueantur. Quærit ibi Clar. WELL: an *Phlogiston & Aër fixus eadem, an elementa summe affinia sint?* Quid igitur erit aër fixus? Si aër, non conuenit cum eius phænomenis, & ab at-

mo-

mosphærico differre, vbique in scriptis BLACKIANÆ theoriæ defensorum lego; sin Phlogiston sit, quomodo corpus illo orbatum nunc causticum fiet, cum hoc ab igne consumi deberet, adeoque corpus iners relinqui? Sed subiungit statim *aërem hucusque quietum, nunc motum & elasticum factum reliqua elementa simul movere.* Sed quam vi mouetur? quam elasticitas redditur? Si que hæc omnia concederem, neque ad petitiones principii respicerem, tamen tantummodo foret caussa remota, dum hic motus principio igneo opportunitatem agendi esset conciliaturus.

Ad pag. 20.

Nullum principium per se ardere, aut calefacere posse, ergo ardentem vim unico tribui nequire. — Nullum vnquam effectum edere potest agens, nisi adsit in quod agat, & modus agendi facilitate; vti igitur v. g. salia vt soluant aqua liquefacta esse, & soluendum offendere debent, & tamen vis menstrua iis tribuenda, sic quoque ignis, vt agat, requirit vt moueatur & offendant corpus in quod agat; inde tamen effectus istius caussa proxima mansurus, cum reliqua sola subsidia sint, alioquin enim cum omne agens ad effectum exferendum quasdam requirat conditiones, nulli actio quædam foret tribuenda. Materiam igneam vero s. ignem ipsum propria vi, id est per se ardere & calefacere speculorum vitrorumque causticorum effectus demonstrabit.

Quod vero maioris momenti forsan visurum dubium „*calcem vinam cum aqua vehementissime, cum Spiritu vini autem vel oleosis vix excalefieri, hinc non a particulis igneis causticam reddi,*“ id ita solvi puto: Affusis oleosis principium igneum illa adgredi &, quæ ob aquæ immixtæ præsentiam accendere nequeat, iis vniri, vti

in paratione oleorum æthereorum ex expressis videre licet; affusa aqua autem particulæ igneæ, cum huic ita vniri nequeant, aut cum calce soluenda combinentur necesse erit, aut in auras abeant; illud fit si magna aquæ copia affunditur, quo casu etiam calor minor oriundus, & plus soluetur ex calce; hoc si parca aquæ quantitas additur, vbi veram materiam ignis egredi ex inflammabilium v. g. straminis &c. adiectorum accensione patet. Sed ex theoria aëris fixi calor maior oriatur necesse foret, si plus aquæ affunderetur, cum eo maior copia celeriter ingrediens maiorem motum foret productura, quem neque solum sufficere probat defectus caloris in motu maximo quo aqua affusa siccas argillas pinguiore penetrat earumque particulas seiungit.

Neque calci viuæ id peculiare esse exinde quoque patet, quod acidum vitrioli fumans, si cum alcohole guttatim misceatur, licet & ibi æstus omnino effici possit, tamen minime strepitum edit, talem qualem si guttula eius aquæ instillatur, vbi sibilum efficit omnino similem illi si candens massa metallica parua frigida aquæ iniicitur. Quin & ferrum candens aqua frigida longe vehementius exstinguitur, quam oleo.

Ad pag. 21.

„*E mutatione corporum per ignem &c. non sequi accessum partium peregrinarum.*“ — Sequitur, si nil amissum, nec partium constituentium combinatio immutata, & augmentum conspicuum adest, vti in memorata mercurii mutatione.

„*Si materia ignea sufficeret corporibus causticis reddendis, cur carbo non euadat talis in igne clauso?*“ — Carbo phlogiston copiosum continet cuius subtilissima terra separanda antequam materia
igneæ

igne in illo delitescens liberari, & partim abire, partim cum terra eiusdem filicea &c. coire alcalicumque falem efficere possit. Quæ vero separatio sine libero aëre accedente, auhendorum vehiculo, fieri nequit, vti ipsa metallorum imperfectorum calcinatio aperto igne facilius & citius absoluitur.

Ad pag. 22.

„Ignem culinarem, solarem &c. posse destruere plus minus corpus quoddam, vel aliter combinare partes constitutivas, separare aliquas — unde effectus alii sine peregrinarum particularum accessu, adeoque pondus, color, sapor, forma externa &c. saltem modificationis phænomena.“ Sed mercurium in dicta operatione neque destrui, neque partes constitutivas aliter componi docet reuificatio tum infusis quibusdam liquoribus (Exper. IV. V. X. XI. &c.) cum solo validiore ignis gradu efficienda. Alioquin enim fortiori igne augenda foret ista mutatio, saltem eadem permansura, præsertim si aërem fixum expulsum esse placeat, quem validior ignis quomodo redditurus sit, non video.

Ad pag. 23.

„Ponderis augmentum & rubedinem accessui materiæ igneæ tribuenda non esse, cum quædam corpora igne caustica facta albidiora & dimidio leuiora euaserint, alia pondere aucta & rubra facta, nec tamen ut calx viua manifeste caustica euaserint.“ — Principii huius effectus omnino pro eo in quod vel quocum iunctum agit diuerso itidem different. Potest calcareus dum in calcem vertitur viuam minui pondere cum contineat aquam, sique placet etiam aërem, auolantia, etiam profuganda vt adhærere possit ignis materia nunc denuo

denuo augens pondus, licet amissi iacturam supplere non valeat, ut tamen calcis viuae fortioris Drachmæ duæ vehementi duarum horarum igne viginti nouem granis, id est fere una quarta parte auctæ fuerint in BOYLIANO *mm*) experimento; potest etiam alba euadere cum non contineat partes quibuscum vnita materia ignea rubedinem ciere solet *mm*). Potest iterum minium (quod forsan spectat Cl. WELL) minus causticum esse (licet etiam quodam gradu esse notum sit) cum itidem non cum quolibet corpore causticum effectum edat principium igneum, vti nec v. g. acidum nitri plumbo vnitum adeo corrosiuum ac cum argento combinatum. Certissimum semper suppeditabit mercurius noster argumentum, cum hic vti iam centies dixi hac operatione iacturam non faciat, qualem plumbum in calcinatione, neque e fumo quid accipere possit cum, quod accessit, vitrea vasa penetrauerit, adeoque nil alieni sit ad ignem ipsum non pertinentis, sed sola vi motus ablati & euecti.

„*Ferrum candidum frigido non præponderare*,“ pluribus, quam hætenus exstant, euincendum erit experimentis, difficulter instituendis, cum pauci possideant bilancem accuratissimam sensibilemque, instrumentum cuius adæquata perfectio vix a quo obtineri potest, nisi qui mathematicis principii æque sit imbutus ac in parandi huius instrumenti encheiresibus exercitatus. Sique ita res se habeat, paruum ponderis augmentum adeo non erit percipiendum, quum tum volumen augeatur, cum per superficiem scorificationem rursus aliquid de pondere amittatur. Neque
ferro

mm) de Ponderabilitate Flammæ,
p. 20. Exp. IX.

mm) conf. Obs. Prior. pag. 34-37.
& nota qq.

ferro candenti tanta in — & adhæret igneæ materiæ copia, quanta croco martis qui itidem suppleta phlogisti iactura pondere auctus erit 000). Quod adhuc magis in minio patet, vbi licet phlogiston demtum sit tamen pondus insigniter auctum, neque, vti WELLIO pag. 24. initio placet, sola modificatione cum minium plumbo insigniter leuius sit specificè. Instituenda igitur experimenta balance accuratissima, sat sensibili, debitis cautelis ne rursus refrigeratum sit metallum antequam bilanx quiescens pondus indicet, metallo non imperfecto, sed auro vel argento quæ ignis vi decomponi hætenus non innotuit ppp).

Ad pag. 24.

„*Rubedinem colorem ignis proprium esse,*“ ac sine vlla exceptione semper oriundum, id contendere animus quidem non fuit; oritur ex combinatione eius cum quibusdam metallicis, suis sub conditionibus, sæpe tamen, vt & cum inflammabili. Neque inde sequeretur, „*omnia corpora rubra materia ignea pollere ideoque caustica esse debere.*“ Habent omnino aliquid ignei cum omnis color sit lucis modificatio, hæc vero cum calore &c. ex eodem fonte fluat; sed caustica sint ideo, necesse non est, cum alia corpora minori copia particularum ignearum rubere possint earumque coercere acrimoniam, alia maiorem requirant eamque minus compescant. Neque ex propositione particulariter affirmata semper deducere licet vniuersaliter affirmantem. Et tamen concedit

000) Chalybis pondus igne auctum testatur BOYLE l. c. p. 8. Exp. IX. & p. 11. Exp. XIV.

ppp) Merentur quæ adducantur experimenta BOYLIANA argenti in igne per

Pars II.

vnam alteramue horam detenti pondere aucti l. c. p. 9. Exp. X. quæ si iterata constans augmentum docerent, maius adhuc inde enasciturum foret robur sententiæ nostræ.

E

dit Cl. WELL p. 25. „*rubedinem in quibusdam corporibus indicare posse interdum miscelam oleosam*“ — & ego ignem cum oleosis & sæpe rubedinem ciere vidi *qqq*). Et certe hic demonstrat mercurius, quem „*nil in fauorem hypotheseos nostræ probare*“ ibidem pro auctoritate affirmat Cl. WELL, cum deficientibus aliis rationibus e solo accessu particularum ex igne explicanda sit quæcunque illi contigit mutatio.

Ad pag. 26.

„*Num unico elemento ignis nomen dandum?*“ Lux, Calor, Flamma quidem tantummodo effectus sunt principii ignei, cum tamen in iis ipsis plus minus copiosum adsit hoc principium & mutationes per ea efficiendæ ab isto pendeant, illi quoque hoc nomen dari, cur nequeat, non video, vel, si circa nomen lis moueatur, dicatur per me principium igneum cuius effectus ignis sit, neque sine illo calor a frictione producendus *rrr*).

Ad pag. 27. &c.

Vtique in caustici speculi foco verus adest ignis, prodendus simulac occurrat in quod agendo talem se præbere possit, & ob radiorum ad vnicum punctum directionem minus circumcirca calet atmosphæra, vti candelæ flaminam ardere vt sentiamus manus ad latera multoties propius admouenda, quam super apicem; quæ differentia adhuc magis patet, si ope tubuli ferruminatorii celerius maiorique vi ad vnicum punctum profletur in conum, qui

V.

qqq) Vnde color olei vitrioli ab admixto inflammabili pro huius copia diversa ex albisimo in rubellum ad nigrum mutabilis?

rrr) Iam magni BOERHAAVII theo-

riæ calorem sanguinis ex attritu demonstranti obiectum fuit aquam quantopere commoueatur inde tamen non calefieri. Deberet tamen si frictio sola totaque caloris causa.

v. g. plumbum in distantia quatuor pollicum vel ultra a puncto flatus fundit, & tamen chartam lateribus admotam in distantia dimidiæ lineæ a flamma visibili non accendit.

Ad pag. 30.

Omnino res clarior euadit si scio accessisse, quod sub determinatis conditionibus quibusdam causticam vim edit. Neque video quomodo ex aëris fixi theoria melius explicetur, cum ibi circa modum quo id efficiat denuo explicatione opus sit.

Sequentia minus huc pertinent, cum præsertim calcem vivam spectent, de qua hic non agendum; & præterea nondum responderunt BLACKIANÆ Theoriæ defensores argumentis & experimentis numerosis CRANZIANIS sss), quibus Ill. Vir dictam sententiam refutavit. Pauca tamen quædam monere iuuabit, cum ex iis conclusiones huc spectantes deriuantur.

Pag. 36. „Solam expulsionem aëris primariam mutationis calca-
 „rei in calcem vivam causam esse, contendit (p. 56.) attamen concedit
 „non esse unicam causam caloris in quibusdam effervescentiis obuii, sed
 „(p. 57.) aliquam diu durantem frictionem minimarum particularum
 „cum vel sine strepitu plus minus notabilem calorem vel æstum in certis
 „miscelis pro corporum indole varia producere posse, — quam frictionem
 „aër hucusque in corpore quietus promoveat, (p. 58.) — non tamen &
 „hic materiam igneam ut solum elementum calefaciens considerandam, cum
 „sine frictione æstus oriri nequeat; & cum inflammabilia non sine præ-
 „gressa particularum determinatione inflammentur, elementa corpus con-
 „stituentia sine causâ quietem turbante inter se non moueantur, corpus

E 2

„exa-

sss) Examinis chemici doctrinæ Mey-
 cianæ de acido pingui & Blackianæ de

aëre fixo respectu calcis rectificatio,
 Lips. 1770.

„exanime per se motus impos sit, nec motum cessante mouentis actione retineat, sine frictione nullus æstus, ignis &c. (p. 60.) hunc effectum unico elemento tribuendum non esse, sed frictionem causam præcipuam omnis possibilis caloris esse assumendam.“ Quibus respondeo aërem qua aërem non posse excitare calorem, neque frictionem nisi quatenus particulas calorem producentes euoluant, afferant, vel maiori vi applicando actionem earum promoueant. Iam quæ frictione calefieri solent corpora, phlogisti quid continent, e quo tum motus vi materia ignea euoluitur, simpliciiori & facilius capiendò argumento, quam explicatio e BLACKIANA Theoria oriunda; vt itaque aëris motus & frictio remotæ tantummodo sint causæ ad proximam facientes, cum supponant necesse sit principium quod motum nunc æstum cieat.

Neque aliquid probat, quod p. 60. obiicit, „aquam ebullientem non ultra certum gradum calere,“ cum pro diuersa corporis cuius indole ignis plus minus illi vniatur. Est enim Phycis lex, adhærere quoddam corpus alii cuidam eo facilius, quo id cui adhæreat grauius est specificè, vnde quoque corpora specificè grauiora in eodem ignis gradu magis calere comperiuntur, argumento, materiam igneam maiori vi agere in illa & maiori iis adhærere copia, vt cum his corporibus maiori concentratione applicetur corpori sensibili adeoque maiorem æstus sensum producat.

Quæ pag. 39-44. proponit Celeb. BUCHHOLZII de Phlogisto sententiam attinent. Quamuis creta nitri spiritu soluta, oleo tartari per deliquium præcipitata, sicque phlogisto, saltem magna ex parte, orbata, itidem in calcem viuam versa fuerit, attamen cum diutius continuatus ignis opus fuerit, id pro nostra sententia

tia inde sequitur, phlogisti præsentiam accelerare ignis in cretam actionem, & cum illa vnionem, dum ex isto euoluatur materia ignea & quamlibet cretæ particulam validius aggrediatur, vti in præparatione vulgaris mercurii præcipitati rubri spiritus nitri tum particulas mercurii discontinuando actionem ignearum in eas accelerat, cum aliquas igneas suppeditando adiuuat, qui ipse ex toto abit in auras, neque remanet, quod WIEGLEBIANA *ttt*) & BUCHHOLZIANA *uuu*) experimenta demonstrant.

Quod vero p. 46 - 55. experimentis tuetur, „*calcem viuam, prout subtilius comminuta vsta, eo minorem calorem affusa aqua dedisse* (licet aliquem semper thermometrum indicauerit,) „*Et tamen optimam calcem viuam fuisse, quæ illico copiose in aqua fuerit soluta, vnde solam particularum calcis viuæ in frustulis separationem violentam caloris causam esse, adeoque calcem viuam optimam sine particularum ignearum accessu fieri posse,*“ concludit, quam sententiam male ficta obiectione, ex nostra theoria, firmare studet; id adeo parum obstat, vt potius nostræ theoriæ maius robur conciliet. Dixi oriri calorem ex affusione aquæ ad calcem viuam dum particulae igneae separentur, hinc corpori sensibili, cui occurrant, æstus sensum efficiant; qui contra minor sit, si affusa largiori aquæ copia hoc principium potius cum calce viua vnitum intra soluentis aquæ poros recipiatur. Idem & hic fit. Quo calcareus vel creta subtilius sunt puluerisata, eo validius illa aggredi potest materia ignea, eoque firmitus adhærere, adeoque maiori copia penes calcem manere & cum illa in aqua solui, (seu potius efficere vt plus terræ calcareæ, hac vnione salinæ indoli approximatae, soluatur,)

E 3

vnde

ttt) Fortges. Chym. Abhandl. p. 163, sqq.

uuu) Chym. Versf. p. 91 sqq.

vnde etiam Clar. WELLIO statim aqua calcis saturata orta. Est præterea ea materiæ igneæ indoles, vt quibus minori motu adhæret corporibus, ab iisdem maiori rursus secedat, si quoque ex parte tantum, vti in mercurii nostri pertractatione exposui xxx). Similiter etiam si nimio ignis gradu vsus fueris, vel ignem augendo, vel calcem subtiliori comminutione actioni eius magis exponendo, primum arctius is cum illa vnitur, tandem vero summo motu rursus separatur, vt adeo Ill. P O E R N E R U S vitrum obtinuerit, tam ex creta, quam calcareo & calce lota, penetrantissimum yyy), quod licet mihi nondum successerit, tamen mihi creta Iasmundensis, e qua ibidem calcem vri notissimum est, ope tentatæ lotionis (cum non vti argillæ ab aqua disgregetur) comminuta & in pastam redacta atque in tabulas formata, ignis gradu quo argilla cærulea, leniori flauescens, in vitrum opacum, figura permanente abierat, & Cōloniensis alba apyra cum chalybe scintillabat, fragmentis nitentibus, ita mutata fuit, vt adeo ore masticata ne minimum quidem caloris gradum excitauerit, etiam vix causticum saporem dederit, sed potius arenæ vel Tripelæ instar inter dentes strideret. Quod vero experimentum admodum infringit Theoriam de Aëre fixo, dum maiori ignis gradu hic magis expellendus, adeoque causticitas calcis viuæ, eiusque æstus cum aqua oriundus, maiora euasura fuissent.

Ex hætenus dictis simul patebit nostra de Corollariis a Clar. WELLIO subiunctis, rerum isto libello expositarum breuē epitomen

xxx) Obs. Prior. p. 37. 38. vbi tamen quod de calce viuā dixi, aliter se habere recentiorum experimenta docuere, vti statim dicturus sum.

yyy) Anmerkungen über Herrn Baume Abhandl. vom Thon. Leipz. 1771. p. 138. in quo libro itidem passim de materia ignis aliqua optime dicta.

tomen sistentibus, sententia, quorum 1^{um}, 7^{um}, 8^{um} & 12^{um} ex toto negamus.

Quod vero ipsam de *Aëre fixo* theoriā attinet, ingenue fateri cogor, me neque illam, neque argumenta illam tuentia penitus intelligere. Substantia, quæ *aër sit*, non tamen *atmosphæricus*, sed eatenus *fixus nunc elasticus evaserit*, neque tamen *verus aër sed substantia diversa*, quid sit non intelligo, neque quo modo ex illius defectu explicandum ponderis augmentum in corporibus specificè leuioribus redditis, & mercurio nulla fui parte ergo nec aëre fixo, si quis detur illiquē insit, orbato. Neque ulterius explicant BLACKIANÆ theoriæ affectæ — quin adeo Cl. WELL quærit: an *cum phlogisto idem sit?* zzz) Confundi possunt equidem interdum phænomena corporum aëre & aqua orbatorum cum effectibus ignis, sed quomodo mercurius noster calcinatus alcalia falsa caustica reddit, quod ex BLACKIANA Theoria facturus sit, dum aërem fixum, quo careret, illi demeret? Num quoque demet, qui illo non caret? Quomodo reuificatur in acido muriatico, oleo therebinthinæ aliisque liquoribus aëre fixo, ex eius theoria, saltem magna ex parte orbatis, cum quæ non habeant, dare nequeant, cui non deest. Et annon, qui ex calcareo per ignem propellitur, verus aër erit, si machina nostra refrigatoria compesci poterit, cum atmosphærico certe idem, aut aquæ aër, vti Ill. CRANZIO placet, & vis aquæ, certis encheiresibus adhibitis, in furnorum ignem augendum insignis testatur. Quin similes vapores elasticotati e subitanea commixtione olei vitrioli concentratoris & alcoholis vini oriuntur cum calore, vbi num

aër

zzz) p. 19. quo casu autem, ex ibidem adducta Stahlia phlogisti determinatione, adesse deberet & datus corpori caustico reddito, non ademptus.

Qui enim principium vrens abiens causticum relinquet corpus, quod præsens tale non reddidit? Videant, quo firmo talo stet theoria sua, aëris fixi patroni!

aër fixus expelli dicendus nescio. Vel an etiam expellitur, si ex ferri in acido vitrioli solutione copiosissimi summeque elastici vapores adscendunt, inflammabiles adeo a candelæ flamma ut cum fragore fulgurent. Requiritur tamen in calcareo aquæ expulsiō antequam materia ignea cum illo combinari possit & calcem vivam constituere, ut itaque hic causā præparans s. remota cum proxima confundatur. Sed de his alibi plura. Sufficiant hæc tuendæ sententiæ nostræ. Liceat interea aliquot proponere problemata, quæ ex aëris fixi theoria soluta optauero;

- 1.) qui vires & proprietates mercurii nostri calcinati, a viuo adeo diuersi, explicandæ?
- 2.) qui pyrophori & phosphorum aliena luce lucentium ortus & actio?
- 3.) qui inflammatio spiritus nitri fumantis cum oleis æthereis, cum & hæc, si ex expressis ope calcis viuæ parentur, aëre fixo orbata dicantur?
- 4.) qui radiorum lucis per aliqua corpora diaphana, pluri inflammabili pollentia, maior refractio quam ex conuexitatis gradu computanda?
- 5.) quid si electrici ignis similes cum solari & culinari probarentur in corpora mutanda effectus?
- 6.) vnde tam mire aucta acidi vitriolici per flammæ accessum volatilitas, in clauso igne non efficienda?


Et quæ plura sunt. Sed vereor ne hic & præsertim circa mercurium nostrum hæsitet theoria defectui tribuentium, quæ nos accessui. Certiorem itaque eatenus meam ducam sententiam, qui tamen obiectiones non ex pruritu contradicendi ortas, sed experimentis verisque ratiociniis fundatas, citraque offensionis animum propositas, grata semper accipiam mente, quibus aut ut
theo-

theoriam mutem inducar aut occasio mihi nascatur nouorum experimentorum pro thesi mea firmanda instituendorum, qui cæteroquin non partium auctoritatisque studio, sed veritatis amore ductus hæc ea, qua par est, modestia protulisse puto, neque superfluam censeo operam, cum ex theoriæ de principio igneo ad Medicinam applicatione plurima confirmari possint hætenus dubia, multaque emendari, & contrariæ hypotheses conciliari, rubedinis sanguinis, caloris animalis, vsus respirationis, actionis systematis neruosi, digestionis, epidemiarum, contagiorum, morborum acutorum, eorumque curationis, plurimumque exemplo, de quibus aliqua iam bene HAMBERGERUS dixit, ab aduersariis minoris quam par fuit æstimata; vnde vtique magna oriunda vtilitas, quæ vero fusius exponere superuacaneum foret, nisi antea id existeret principium fuerit demonstratum.



OBSERVATIO II.

METHODUS REFRIGERANDI NOVA, OBS.
PRIOR. I. TRADITA, AD TUBULOS VITREOS
APPLICATA.



Rostrum intermedium metallicum in Spiritus vini destillatione refrigerandi methodum, solitis præstantiorem, icone adiecta, descripsi, vsunque eius exposui in *Obs. Prior. I. a)*,

ean-

a) De destillatione spiritus vini, p. 12. sqq.
Pars II. F

eandemque ad destillandas res aquosas etiam adhiberi posse notavi. Monendum vero erat machinas ibi descriptas, ob tubulos stanneos, in destillatione spirituum acidorum congruas non esse, vbi tamen & vitreis tubulis istam accommodari posse dixi methodum, idque in posterum fusius exponere promisi *b)*. Sistendam igitur mihi hic proposui dictam refrigerandi methodum ad vitreos tubulos intermedios applicatam, subiunctis quibusdam destillationum, hoc modo peractarum, exemplis, vt effectus appareant, additisque si quæ de utilitate huius inuentionis addenda erunt.

Delineata videnda est hæce methodus in TAB. I. *Fig. 1.*, vbi partes apparatus literis maioribus, versalibus dictis, distinxī, de quibus nunc dicendum erit.

A. Icon est *Furni destillatorii*, de quo in subsequente observatione dicturus sum, e quo prominet collum retortæ vitreæ in situ instituendæ destillationi congruo.

Sustinetur collum retortæ *Sustentaculo B.* Perquam commoda sunt eiusmodi sustentacula, pro retortarum & excipulorum collis, vel tubulis intermediis fulciendis. *c)* Constat id Corpore tereti, plus minus cylindrico, vel si decus placuerit, tornando figurato; pedibus tribus æqualis longitudinis & directionis *d)* hoc

b) ibid. p. 20.

c) Delineata quidem exstant varii generis sustentacula, præsertim ventri excipuli sustinendo adhibenda, in WALTERII *Chem. Phys.* P. I. Tab. 3. *Fig. 95. 98.* & Tab. 4. *Fig. 103. 105.* quorum nulla vero tam commode & in variis altitudinibus adhiberi posse, quam quæ hic delineata exhibeo, facile patebit consideranti.

d) Monendum hoc duxi cum ex icone longitudine & directione diuersi iudicari possint forsitan, sed tantummodo cum, sustentaculi furno propius ad-mouendi causa, ita hoc locari debuerit vt pedes duo illi propiores, hinc anterior posteriorem tegens minus obliquus videatur & breuior sinistro; æquales tamen esse ex icone *F* facilius apparebit.

hoc firmum infistit, simul leue vt facile transmoueatur, & parum spatii requirens; superne id *Cochlea* laterali transverse applicata instruitur, transeunte ad foramen longitudinale quo corpus perforatum est, e) pro firmando *Cylindro*, in hoc foramine sursum deorsumque mobili, terminato *Furca*, ne, quem sustinet, tubus vitreus etc. etc. ad latera delabi possit. Huius ope, prout sursum vel deorsum motus cochlea firmatur, diuersum altitudinis situm effici posse ex sustentaculi dicta structura patet. Plura talia adesse debent in laboratorio bene instructo, eaque diuersæ magnitudinis, prout ex retorta vel alembico instituere placet destillationem.

Infra dictum sustentaculum retortæ collum ambit tubulus s. *rostrum intermedium* (*Appositorium*, *Worstoß*) vitreum, iunctura luto rei destillandæ idoneo f) claudenda, circumdatum Machina refrigeratoria C, inferne itidem Fulcro F sustentatum, intrans *Excipulum* D quod ferto stramineo, fulcri E orbi incumbenti, innititur. *Fulcrum* hoc E structura conuenit cum descripto B, nisi quod cylinder mobilis, loco furcæ, orbem eleuato margine præditum gerat.

Quod vero ipsam *Machinam* attinet *refrigeratoriam*, Figuræ I. Iconibus C & G absolutam, de ea sequentia veniunt notanda.

1.) *Appositorium* s. tubulus vitreus iste, si destillatio ex cucurbita imposito alembico instituatur, fere cylindricus esto, sal-

F 2

tem

e) Denotatur id in icone citata lineis duabus parallelis verticalibus punctatis corporis sustentaculi, quorum internallum percurrens linea transuersa, itidem punctata, cylindri mobilis extremum ostendit.

f) De variis lutorum genèribus vid. WALLERII *Chem. Phys.* P.I. pag. 99. sqq. SPIELMANNI *Instit. Chem.* §. 42. ZIMMERMANN *Allgemeine Grundsätze der Theoretisch-Practischen Chemie.* Dresden 1755. 4to. p. 5. sqq. VOGELII *Instit. Chem.* §. 241 sqq.

tem si superne dilatetur extremo tamen, quo alembici rostrum ambit, rursus angustior sit necesse esse patebit; vti, si ex retorta destillare placet, superne illum ampliorem esse debere, pro capi-endo retortæ collo, inferne vero angustio-rem, ne excipulum nimis magnum vel colli nimis detruncati requiratur, facile animad-vertetur. Id adhuc addere conducet tubulos solito more in offi-cinis vitriariis paratos, minima vi facile frangi immo sæpe sponte findi atque dilabi, hinc præstare illos, postquam formati sunt, aliorum operum vitreorum modo in furno refrigeratorio dicto (*Kühl-Ofen*) denuo ignescere & sensim refrigerari; quod vt eo fa-cilius obtineatur ducendi sunt tubuli e sphæra cuius tunc supe-rius extremum annulo vitreo circumdandum, qui post refrigera-tionem malleo facillime decuti potest, quo id obtinetur vt tale appositorium tum frigoris & caloris vicissitudines melius ferat, cum superne parietibus crassioribus parari possit hinc firmitus esse & vi maiori resistere, simul tamen extremo rursus angustius esse adeoque & tenui alembici rostro vel retortæ collo applicari g).

2.) Paretur Tubulus C cylindricus, vel appositorii figuræ accommodatus, vt circumcirca æquali interuallo ab illo sit remo-tus, eiusque amplitudinis vt hoc ambiens vbique dimidiæ fere vnciæ, saltem quadrantis eiusdem, spatium relinquat.

Faciendus hic est e bractea ferri stanno obducta, eius-que

a. Extremum superius circumdetur circulari bractea, similis mate-

g) Quodammodo concipi poterit talis appositorii figura e WALLERII *Chem. Phys. Tab. I. Fig. 35.* dummodo tubus sinistro sphæræ orificio insidens dematur, & hæc ipsa minoris diame-tri sit, atque tubus e dextro orificio productus longior.

materiæ, vnciam lata, afferruminanda, ne defluens aqua secundum cylindri *C* longitudinem defluat.

b. Vt vero extremum superius conseruetur in situ, afferruminentur illi tres laminæ, eiusdem materiæ, altero extremo ad angulum rectum curuato appositorium immediate prementes ad euitandam vacillationem *h*).

c. Inferiori vero dicti tubuli *C* extremo itidem ad angulum rectum afferruminetur bractea orbicularis, vnciam circa tubum eminens, qua furcæ sustentaculi innitatur, neque, si excipulum demere opus sit, ob luta nondum exsiccata, vel mollioris consistentiæ descendat, sicque aperta iunctura superiore appositorium inter & collum retortæ, ob huius æstus vix rursus exacte claudenda, plurimum perdatur de materia destillanda. Sed foramine peruia sit hæc bractea rotundo, diametrum appositorii excedente.

d. Bractæ huic transuersæ (*c*) conferruminetur tubulus itidem metallicus, priori metallico (*2*) angustior, vt tamen inter eum & appositorium certe quarta aut tertia vnciæ pars circumcirca relinquatur spatii, diametro coincidens cum dicto foramine bractæ transuersæ (*2. c*), longitudinis vnciarum duarum vel trium.

Tubuli huius minoris vsus est refrigeratorium *C* appositorio annectere, si scil. tubulus hic appositorio, eo in loco charta exiguæ latitudinis obuoluto, applicetur, tunc spatium tubulum hunc breuiorem metallicum & appositorium interiacens pulte ex gypsi vsti *i*) puluere cum aqua formata repleatur; dum tunc consoli-

F 3

data

b) Illustrantur hæc Iconibus *Obs.*
Prior. Fig. 2. b. g. & Fig. 4.

i) Eorum in vsum qui gypsum præparare nesciunt, hic modum breuiter expo-

data pulte gypsea omnis clauditur apertura inferior refrigeratorii vsque ad bracteam transuersam inferiorem (N. 2. c.).

4.) Tubulo metallico ampliori C proxime super bracteam transuersam inferiorem (N. 2. c) conferruminatum esto Infundibulum ibidem delineatum, ex simili bractea paratum, inferiori lumine in dicti tubuli, ibi perforati, cauitatem peruium, eæ longitudinis vt, in situ ad operationem requisito, minimum aliquot vncias altior sit eiusdem margo superior supremo tubuli C extremo, vt effluat aqua in infundibulum defluens. Hanc affert.

5.) Affer G vnciam cum semisse crassus, sulco longitudinali, tres quartas eiusdem partes lato, & dimidiam profundo, exaratus, remanente in extremo trabe transuersa, aquæ effluxum vetante, ante quam profundius excauatus est asser & huic cauo a latere firmiter intrusus tubulus ferreus conicus, stupra obuolutus calidoque sebo illitus, ad obturanda interstitia terebrationis inæqualitate producta, hinc aquæ per eadem effluxum cohibendum; qui tubulus circumdatur

6.) Tubulo, fili ope circumligato, coriaceo, infundibulum tubo C afferruminatum intrante, in quo absconditur filum aurichal-

exponendum duco. Contunditur Lapis Gypseus, qualis ex notis a CRONSTEDTIO (*Versuch einer Mineralogie, vermehrt durch Brünlich* p. 13.) VOGELIO (*Mineral-System*, p. 116. seq.) WALLERIO (*Mineralogie* pag. 67. etc.) aliisque Mineralogis datis cognoscitur, in frustula nucis iuglandis magnitudine; hæc in furno pistoris vri curantur; tunc comminuuntur in puluerem subtilem, cribratione a parte nondum sat

comminuta separandum. Hic in ahenno, vel alio vase lati fundi, metallico, subiectis prunis, vt fundus fere cande-scat, incipiet instar aquæ ebullientis moueri, quo facto bacillo ferreo agitando, vt tota quantitas æqualem caloris gradum patiatur, donec hæc ebullitio cesset, neque vltius, cum diutius continuato igne facultas cum aqua in lapideam massam indurefcendi pereat.

chalceum spiraliter conuolutum, dictum tubulum coriaceum distentum conseruans vt aquam transmittere valeat, neque collabatur; quo simul id obtinetur vt, ob tubuli inde enatam flexilitatem, idem adhiberi possit quamuis appositoria vel retortarum colla longitudine parumper varient; quæ vero differentia magna si sit, cum asser *G* ad parietem fixus sit, conus dicti tubuli metallicus (N. 5.) alii foramini erit intrudendus, quapropter vno pluribus in locis fulcus asseris *G* profundius exarandus est, & tunc immisso lateraliter dicto cono, trabe transuersa vltior aquæ, in asseris fulco, defluxus sufflaminandus.

7.) Si itaque aqua ex dolio per asseris *G* fulcum allata *k*) per dictum conum metallicum & tubum coriaceum effluit in suppositum infundibulum, ascendet in tubulo metallico capaciore & longiore *C*, intra huius & appositorii parietes, & ex eius extremi superioris foraminibus tribus inter bracteas (N. 2. b) relictis *l*), & ob afferruminatam bracteam circularem (N. 2. a) non defluet secundum longitudinem tubuli *C*, sed magis verticali impetu, quæ vt capiatur supponendum est.

8.) Infundibulum, annexum tubulo perpendiculari, ducenti in canalem subterraneum, per quem rursus effluat aqua extra laboratorium *m*).

Quo apparatu id obtineri patet, vt, dum appositorium ab aqua frigida, perpetuo inter illud & refrigeratorium *C* affluente, frigidum conseruatur, hoc transeuntes vapores, liquidaue destillantia, refrigerata excipulum intrent, adeoque commoda in *Obs. Prior.* p. 18. exposita impetrentur.

Nunc

k) conf. *Obs. Prior.* p. 12.

l) Notata hæc reperiuntur literis

yyy in *Obs. Prior.* Fig. 4.

m) vid. *Obs. Prior.* Fig. 5 & 6.

Nunc vero dubitatio supererat, num appositorium vitreum, ita inferne continuo refrigeratum, superne a destillante liquido calefactum, has contrarias frigoris & æstus actiones, in punctis proxime contiguis, absque fissura vel fractura ferre posset, unde instituenda fuerunt experimenta. Adhibui igitur hunc apparatus in spiritus vini rectificatione, aquarum, oleorum æthereorum, spirituum alcalinorum volatilium destillatione, &, quamvis operationem longe citius solito absoluerim, ut etiam pars appositorii supra refrigeratorium C nuda adeo caleret, ut tangentem manum æstu suo læderet, pars tamen eius, infra dictum refrigeratorium nuda, frigida fuit & liquida in excipulum transierunt penitus refrigerata. Miratus vitreum tubulum in punctis fere contiguis, sine vlla fissura contracta, tam notabile perferre posse caloris discrimen usum inuentionis cognoui eximium. Supererat ut itidem tentarem destillationem spirituum acidorum mineralium, qui, ob grauitatem specificam, qua pollent, insigniter maiorem, gradum quoque ignis requirunt sat validum, & ob eandem rationem longe magis calefiunt, ideoque & appositorium maiori æstu affecturi; quod vero cum, quatenus refrigeratorio C circumdatur, frigidæ perpetuo affluentis copia refrigeretur omni momento fissuram vel disruptionem appositorii prævidi timendam. Sed aliter euenit. En aliqua experimenta.

I.

Destillaui hoc apparatu, qualem illum icon sistit delineatum, spiritum salis satis concentratum. Excipulum delineato maius non fuit. Instruxi ignem ut omnibus tribus minutis temporis secundis elapsis guttula destillaret, & tamen omnino frigidum mansit

mansit excipulum, neque nebulæ in illo apparuere, quæ in nuda appositorii parte supra refrigeratorium sita abunde erant observandæ, neque penetrantissimi acidi odor in laboratorio nares feriebat quamvis iunctura, excipulum cum appositorio uniens, tantummodo vesica fuilla clausa esset, arrodenda si ulli vapores dissipati fuissent *n*).

II.

Pari apparatu & gradu destillaui spiritum nitri fumantem, si-
ne ullis vaporibus rubicundis in excipulo, frigido permanente,
apparentibus.

III.

Tandem methodo & gradu dictis destillando dealbaui *o*)
ponderosissimum & maxime fumans oleum vitrioli Nordhusia-
num, pigmentum Indigo dictum optime soluens *p*). Initio pau-
cissi-

n) Superior tamen iunctura apposi-
torii cum collo retortæ utique luto stea-
titico, *Obs. Prior.* p. 60. & in nota *b*
exposito, fuit claudenda.

o) Acidum vitrioli concentratius li-
cet albissimum destillatione obtineatur,
tamen a quolibet inflammabili illaben-
te cum tingatur, demum nigredinem
contrahit, qua duplici via priuatur.
Scil. dum destillatur ex retorta, quo ca-
su inflammabile illud vi ignis penitus
consumitur hinc oleum vitrioli album
transit. Vel quantitas quædam eius-
modi olei vitrioli nigri in cucurbita
detruncata balneo arenæ imponitur, ita
ut infimum punctum sat validum expe-
riatur ignis gradum, quo, itidem de-
mum consumpta omni nigredine, albi-
ssimum breui tempore euadit, licet fa-

tendum sit hac methodo aliquam acidi
vitrioli portionem vaporum griseorum
densorum suffocantium forma in auras
auolare.

p) Nota concentratissimi acidi vitrio-
lici. Neque ab oleo glaciali ultmato
in destillatione eius ex vitriolo summo
ignis gradu eliciendo solo pendet, uti
quibusdam placet, cum debilius non
fumans destillatione, si, quod prius
transit, phlegma separetur, fumans
reddi possit, & vi *τo* Indigo soluendi
imbui. Satis magnum requiri concen-
trationis gradum, oleum vitrioli Angli-
canum docet, quod parumper leuius
non ea vi menstrua respectu huius pi-
gmenti pollet, quam tinctores requi-
runt.

cissimi in paruo hoc excipulo oberrarunt vapores albidī, sed sine vlla eiusdem incallescētia vel penetratione per iūcturam inferiorem vesica suilla lutatam. Ast paucis momentis hi disparuerē adeo vt, quouis tertio minuto temporis secundo elapso, guttulam decidentem conspiciere licuerit, & tamen excipulum ac par appositorii infra refrigeratorium sita omnino, quantum pro æstiuī temporis atmosphæræ calore licuit, fuerunt frigida, quamuis appositorii pars supra refrigeratorium sita, ob validum æstum manibus impune tangi nequiuērit. Ita continuāui operationem donec valido demum igne omne oleum vitrioli transiuerit albiſſimum, retortæ fundo obscure rubente, nilque retinente præter parcissimum residuum albiſſimum, ficcissimum, apparen- ter terreum, quale in omni destillatione olei vitrioli remanere, etiam ex illo diu asseruato fundum petere solet q).

Patet e dictis methodum nostram refrigerandi sufficere adeo ponderosissimis liquoribus destillandis. Solus restat mercurius vivus quocum eam nondum tentavi; & spirituum acidorum mineralium e salibus suis destillatio; vbi vero si terreæ requirantur retortæ, ideoque appositorium vitreum non videretur adhibendum, terreum posset in vsum vocari ex compositione, porcellanæ instar semivitreſacta, paratum, idque simili instrui machina refrigeratoria.

Puto ita sufficienter vsum inuentionis docuisse. Ne vero obiiciatur me superfluam excogitasse dum in acidorum spirituum destillatione refrigeratoria adhiberi non soleant, adeoque non requi-

q) De isto sedimento vidd. DELII (resp. HÜBSCHMANN) *Diff. de Alkali Primigenio*, Erlangæ 1761, p. V. not.

dd & EL. (resp. auct. IAHN) *Diff. Experimenta & coniectura circa sedimentum olei vitrioli album*. Erlangæ 1764.


requirantur, vsum eius & hic maximi esse momenti sequentia probabunt.

- 1.) Citius absolui potest operatio, cum absque rei destillandæ dispendio & vasorum fractura timendis fortior ignis adhiberi possit.
- 2.) Excipula adhiberi possunt parua; alioquin maiora opus ne vapores adeo dissipentur excalefacto excipulo, sed colligantur.
- 3.) Vapores simulac partem appositorii intrant, quæ a circumcirca fluente aqua refrigeratur, condensantur in liquorem, neque adeo dissipantur & in auras abeunt, (vti alioquin præsertim de penetrantissimo acido muriatico notum cui coercendo nullum lutum sufficere experti consentient), hinc plus obtinetur liquidi destillandi.
- 4.) Operatio cum minori institui potest molestia, dum, si iuncturæ inferiori lutandæ vesica suilla sufficit, excipulum facilius demi potest, si quod prius transiit separare placet, & denuo iunctura lutari, cum in vulgari methodo luta ista terreo-oleosa calidissimo vitro arctius adhærere recusent, statimque nimis emolliantur.
- 5.) Parcitur quoque pulmonibus a vaporibus exhalantibus lædendis.
- 6.) Fortiores obtineri possunt spiritus acidi, dum alioquin mos est quantitatem aquæ excipulo infundere, vt vapores in illam colligantur, præsertim in destillatione acidi muriatici, quo vero debiliora obtineri illa acida luculentissime apparet; nostra autem methodo cum vix vapores intrent exci-

pulum, opus quoque non est aquam excipulo indere, vnde magis concentrati obtineri possunt.

- 7.) Ob eandem rationem quoque perfecta destillatione statim demi potest excipulum & quod transiit, effundi, cum alioquin conducat expectare refrigerationem excipuli donec vapores desinant.
- 8.) Vapores cum non intrent excipulum, melius quoque obseruantur guttulæ destillantes, adeoque gradus ignis facilius animadvertitur & dirigitur.
- 9.) Cum destillata excipulum intrent refrigerata, timendum etiam non erit ne grauiora calidiora in illo fissuras efficiant.
- 10.) Insignis methodi nostræ vtilitas erit in indagatione corporum, vbi partium constituentium proportionem euincere interest, dum hac volatilia magis coercentur & minus in auras abeant vaporum forma, adeoque, cum plus retineatur, proportio melius euinci possit.

Excipiendi tamen sunt casus, vbi destillationi subiiciuntur liquida quæ refrigeratione coagulantur, hæc enim in refrigerata appositorii parte coagulata indeque accumulata illud repletura essent, vnde tandem appositorii ruptura oriunda.



OBSERVATIO III.

FURNUS RETORTÆ NOVUS.

Quamuis furnos pro destillatione per retortam, e balneo arenæ, varios TEICHMEYERUS, STRUMPFUS, LUDOLFUS, WALLERIUS, SUKOWIUS, descripserint & icones eorum publici iuris fecerint, tamen cum omnes hi adhuc suis premantur incommodis, operæ pretium fore spero, si structuram furni exhibeam, in quo minoribus cum incommodis destillationem per retortam ex balneo arenæ institui & absolui posse creberrima me docuit experientia. Est vero ista sequens, ex *Tab. 1. Fig. 1. A. 2. 3. 4.* intelligenda.

1.) Extruaturn super pavimentum laboratorii murus e lateribus, angustiori planorum suorum impositis, hinc circa tres uncias s. pollices crassus, includens spatium pedis quadrati.

2.) Relinquatur tamen in altero latere immediate super pavimentum apertura quatuor uncias alta, quinque longa, instruenda valua mobili pro dirigendo ignis gradu.

3.) Vestiantur huius muri latera duo opposita interna tegulis planis vnam unciam crassis (*Pflaumensteine* vocant) pro ferendis craticulæ bacillis duobus transuersis, ea in altitudine, ut incumbentis craticulæ bacillorum longitudinalium summa acies super pavimentum laboratorii duorum pedum intervallo sit remota,

ta, quæ altitudo *Cinerarii* est, & in *Fig. 1. A.* linea punctata a. b. indicatur.

4) *Craticula* constet e bacillis ferreis sex parallelepipedis, quorum quoduis latus septem octauas vnciæ partes latum, pedem longitudine æquantibus, duorum bacillorum ferreorum transuerforum (quorum ope tegulis N. 3. memoratis incumbit) plano alteri cudendo annexis, dimidia sui parte eminentibus, vt acie, non plano, sursum spectent, inter se æquali distantia remotis, vti ex *Fig. 2. & 3.* apparebit.

5) Continuetur supra dictam cinerarii altitudinem (N. 3.) murus iste quadratus (N. 1.), vt pedem altior euadat, cauitatem itaque formans, in qua catinus & pabulum ignis continenda, quæ *Focus* audit.

6) In anteriore latere tamen is dimidia sui parte tantum perpendicularis esto, dein oblique continuatus vti in *Fig. 1. A. & Fig. 2.* videndum.

7) Proxime sub hac obliquitate circumdetur vinculo ferreo, ne furnus ab ignis vi distendatur atque findatur.

8) Relinquatur tamen immediate super aciem summam bacillorum craticulæ (N. 3.) apertura lateralis mobili valua instruenda, qualem ad basin cinerarii locandam monui.

9) In latere obliquo furni (N. 6.) firmetur catinus ferreus, ita locatus vt trium pedum a) fuorum duo bacillo ferreo furnum trans-

a) Cum catinorum ferreorum fusione paratorum, quales ii venales aduehuntur, pedes nimis longi sint, & carbonum descensum impedituri essent, breuiiores sunt reddendi, id quod opti-

me fit si inter prunas ante follem igniti ferra, qualis ad ligna dissecanda adhibetur, dissecantur, vt vnus tantummodo vnciæ longitudinem retineant.

transuerse transeunti, & in eius lateribus oppositis firmato, (*Fig. 2. X.*) innitantur, sicque catinus in situ obliquitatis, qualem dicta icon & *Fig. 6.* exhibet, sustineatur.

In furno ita parato destillationem instituere si placet, claudatur apertura superior lateralis valua mobili qua instructa est, Focus, s. cauum supra craticulam relictum carbonibus repleatur, retorta catino immittatur arena *b)* circumdanda; prunæ imponentur carbonibus, & sicuti carbones igne consumuntur recentes adiiciantur; sic institui poterit operatio, & ignis gradus tum per altitudinem ad quam focus carbonibus repletur conserui, cum præsertim per maiorem vel minorem aperturæ inferioris lateralis hiatum, per mobilem valuam efficiendum, determinari.

Sufficit hic furnus plerisque destillationibus instituendis, etiam validum ignis gradum requirentibus, vt spirituum acidorum mineralium, quin etiam mercurii ex sublimato vel cinnabari additis cineribus clauellatis vel calce viua reuificationem paucis horis absoluere potuerim, vt itaque alio opus non sit, nisi tali igne vtendum quem ipse catinus ferre nequeat, quo casu retorta terrea furno anemio a latere immitti posset.

Præ-

b) Præferenda omnino est arena filicea tum limaturæ martis cum cineribus lignorum elixiuatis, a quibusdam adhiberi solitis. Illa enim tum sumtus operationis auget, cum igne in calcem versa, ob grauitatem specificam leuiorem redditam æstus gradu in multis destillationibus necessario calere, hinc retortam eiusque contenta afficere, nequit. Hi vero tum eodem laborant

vitio, vt scil. debitus ignis gradus in cinerum balneo non possit administrari, tum, ob retentas partes salinas, facile colliquantur, saltem cum vitro retortæ, vnde varia incommoda oriunda. Arena vero filicea cum validissimo igni resistat, simul tamen ob grauitatem suam sufficienti calefieri potest gradu, adeoque eodem retortam afficere.

Præferendus vero ideo is est furnus hæcenus ab aliis publici iuris factis, quod eundem ope eius obtinere liceat effectum, simul tamen carbonum iniectio, ope bacilli ferrei si quando decidere recusauerint detrusio, facilitentur, ignis gradus congruus facillime determinetur æquabilis, incommoda a craticulæ obstructione oriunda euitentur, verbo pabuli ignis dispendio & labore minoribus idem ni maior obtineri poterit ignis gradus. Largiuntur vero hæc commoda potissimum notæ sequentes, quibus hic furnus præsertim a reliquis cognitis differt.

1) Cinerarii altitudo, qua ignis gradum longe maiorem produci posse, quam si solito more vix sex vnciis altius sit, quilibet expertus consentiet; dein quoque sufficiens ignis gradus ita obtineri potest sine impositione coni & cylindri angustioris altioris quibus ingestio carbonum etc. etc. valde impediuntur.

2) Valvæ mobiles aperturarum, præsertim inferioris, cum earum ope exactissime determinari potest ignis gradus desideratus.

3) Crassities parietum minor, quæ vulgaribus sex vnciarum, unde hi quidem diutius æstum retinent, sed tardius calefiunt, hinc operationem retardant.

4) Craticula solitas latitudine longe excedit, unde tum ob liberiolem aëris accessum maior ignis motus, hinc gradus, producendus, cum obstructio eiusdem ab incumbenlibus prunulis & cineribus minus timenda. Distantiam bacillorum inter se, eorumque crassitiem, tales delineavi, quales optimas esse experientia creberrima confirmavit, ut carbonibus ope cribri a pulvere detrilo separatis, æquabilis ignis gradus obtineri possit.

5.) Re-

5) Rectilineis parietibus internis instructus furnus hic sufficit scopo, hinc supersederi potest ellipticæ illi figuræ ab auctori-
bus commendatæ qua fit vt carbonēs facilius in superiore foci
parte remaneant, hinc inferior vacua aëris frigidi intrantis ad ca-
tinum accessum hinc huius refrigerationem admittat.

Et quæ plura sunt:

Ne vero aliorum forsan inuenta mea venditare, vel male
mea alienis præferre videar, comparandus erit furnus noster
cum similibus apud auctores reperiundis.

Furnus ollæ a TEICHMEYERO c) descriptus & delineatus si-
milis nostro est, & laudem omnino meretur. Cum autem cra-
ticula & cinerario destituatur, neque apertura valua mobili in-
structa sit, vnus idemque gradus ignis determinari & conseruari
nequit, neque is adeo vt in nostro intendi. Præterea ollæ argil-
laceæ a figulis paratæ facile ab accessu aëris fissuras contrahunt,
in catino ferreo non timendas.

Emendasse illum putauit & iconem dedit STRUMPFUS d),
cui *Pallium* audit. Emendauit illum in eo, quod addiderit crati-
culam & tubum imponendum quo ignis augeri possit. Sed suis
itidem premitur incommodis. Siue enim ex bractea ferri, siue e
lateribus exstruatur, nostro tamen carior erit, paratu difficilior,
reparationis difficillimæ. Craticula parua tum facile obstruitur,
cum sufficientem aëris accessum non permittit. Cinerarii alti-
tudo non sat magna est, hinc cono & cylindro angustiori impo-
nendis

c) *Instit. Chem.* p. 42. Tab. 2. Fig.
15.

d) D. IO. HEINR. SCHULZ *Chemische Versuche.* Zum Druck befördert
durch D. C. C. STRUMPF. Halle 1745.

nendis opus habet, quibus vero carbonum ingestio eorumque delapsus promotio per bacillum admodum euadunt difficiles, saltem molestæ. Peculiaris cupellæ figura, in regionibus ab vstrinis diffitis difficillimam vel impossibilem reddit eius acquisitionem. Caret valuis mobilibus, quibus omnes subsequentes ignis gradus determinari possint. Neque tali furno opus est, cum idem effici possit per quemcunque furnum anemium bonæ notæ, cui a latere catinus applicatus.

Non valde recedit, quem LUDOLFUS e) proposuit, paribus ob cinerarium minus altum, craticulam angustam, figuram foci ellipticam, & caminum angustiore laborantem incommodis, quibus accedit, quod catini pars prona inferior, ob eius situm, prunis decenter cingi, hinc debito gradu excalefieri, nequeat.

Neque melior est duplicatus eius furnus, quem etiam WALTERIUS f) exhibet, minus tamen aptum esse ipse fatetur. Sed & simplex iste, demto catino superiore, tamen ob craticulam angustam, & quod catini inferior superficies ignis actionem non experiatur, cæteraque incommoda, nostro longe erit inferior.

Quem demum Celeb. SUCKOW g) exhibet, furnum ollæ emendatum, is quidem TEICHMEYERIANO in eo præcellet, quod maiorem ignis gradum eumque magis determinatum hoc mediante efficere liceat, & STRUMPFIANO Pallii furno simplicior est, facilius paratur & minores sumtus exigit, hinc & illi utique præferendus. Sed reliqua tamen cum præcedentibus communia
habet

e) *Einleitung in die Chymie. Erf.* 98. p. 79. 80.

1752. Tab. 3. Fig. 15.

g) *Entwurf einer Physischen Schei-*

f) *Chem. Phys. P. I. Tab. 3. Fig. dekunst.* 1769.

habet incommoda. Tubulus enim e lateribus formatus altior difficulter paratur, facillime finditur, & deesse potuisset, si cinerarium nostro altitudine æquale esset. Foci Figura elliptica *h)* indeque orta minor iusto craticulæ dimensio, facillime obturationem a cineribus vix instrumento referendam admittunt, & carbones non tam commode ingeri possunt, neque demum inferiores cupellæ parietes vbique sat ignem experiuntur.

Dictis probasse puto Furnum a me exhibitum, ob sua commoda aliis notis esse præferendum, sed superest incommodum in omni destillatione e catino oblique sito obuium, nostro cum reliquis commune, quod scil. retortæ venter totus arena nequeat circumdari, vnde in destillationibus validum ignis gradum poscentibus, vti olei vitrioli, mercurii viui, salis vitrioli narcotici, Zinci, aliorumque, cum summum ventris retortæ & colli punctum minus caleat, id, quod vaporum forma adscensit, refrigeratur ibidem & maiori quantitate collectum guttatim in ventrem decidit & capiti mortuo denuo commiscetur, hinc nil in excipulum defluere potest, aut, si eius indolis sit, vt refrigeratione soli-

H 2

descat,

h) Genere negandum mihi erit istud axioma, a plerisque Chemicis receptum, figuram partis, pabulum ignis continentis, ellipticam esse debere. Nam triplex inde oritur incommodum 1) difficilis carbonum ingestio, 2) deliuitas ad craticulam, in qua facile prunæ remanent, vt inferne cauum oriatur consumtis prunis & frigidus aër accedens refrigeret cupellam, quæ calefacienda erat, 3) minor craticulæ magnitudo vnde tum obstructio eius sæpius oriunda, cum aëris accedentis ad augendam ignis vim efficacia insigniter imminuitur.


Neque vsum exhibet, ob quem elliptica figura auctoribus placuit, cum catinus non locatus sit in foco ellipseos, & prunis tegi debeat, hinc radiorum ab iis exeuntium in illum repercussio minus efficere possit, inferior vero curvatura omnino nil faciat ad ignem reflectendis radiis augendum, cum prunis tegatur; adeoque figure istis vsum tum demum foret quodammodo experiundus, si solo calore vel flamma aliquid efficere placeret, atque tunc ignis in foco ellipseos inferiore, catinus in superiore collocaretur.

descat, collum retortæ obturat, vnde demum fractura eiusdem oriunda. Quare huic incommodo remouendo allaborauī; remouetur autem sequenti modo.

Præter annulum ferreum quo furnus infra obliquum eius latus, ad fissuras præcauendas, circumdatur, simili etiam summus furni margo, excepto latere obliquo cingatur annulo, cum inferiore dicto connectendo per duas ferreas bractæas obliquas, triangulum cum inferiore annulo efformantes, quarum ea, quæ cum furni latere obliquo coincidit, cochleis duabus maribus instructa est; quæ omnia in *Tab. I. Fig. 5.* sunt videnda, & in opposito latere similia concipienda. Reliqua ex *Fig. 7.* apparebunt. Scil.


Bractææ duæ ferreæ, quarum altera in extremo alteram contingente fere ad tertiam digiti partem duplex sit, vt exorta inde crena alterius extremum in se recipiat, in exterioribus angulis, superiore & inferiore, singulis foramine pro transmittendis dictis cochleis maribus perforatæ, vbi vero vniuntur maiore foramine, quod collum retortæ transeat, peruia, vniantur, & maius illud foramen moueatur secundum collum retortæ donec foramina angularia in se receperint cochleas mares descriptas, sicque bractææ apprimantur catini margini, cui antea circumcirca cylindrus fere quartam vnciæ partem crassius massæ ex arena & argillæ paratæ, mollioris consistentiæ, appressus ne foramina arenam transmittentia relinquantur. Ne vero bractææ calore flectantur, bacilli duo ferrei transuersi iis imponantur, extremis item, pro transmittendis cochleis maribus, perforati, atque nunc totus hic apparatus ope cochlearum feminarum maribus applicatarum catini margini apprimatur. Nunc

Nunc tantum id superest, vt, ne intra maximi foraminis bractearum peripheriam & collum retortæ arena effluat, spatium istud cylindro mollioris pastæ ex argilla & arena formatæ claudatur. Quibus absolutis nunc per foramen paruum in loco vnionis bractearum, supra superiorem bacillum transuersum, effectum, in *Fig. 7* umbra notatum, ope infundibuli immittatur arena sicca integrum catinum repletura & retortæ ventrem ac colli partem vsque ad bractæas istas circumdatura (vti ex *Fig. 6.* apparet), neque ob omnes aperturas clausas effluxura; qua encheiresi non solum in dictis casibus operatio facilitatur, sed & in aliis destillationibus maior ignis vis retortæ applicatur, hinc destillatio citius absoluitur, licet id quoque fatendum sit fundum retortæ ignitum absoluta destillatione grauiorum liquidorum, ex quo finis operationis diiudicari possit, nunc minus facile obseruari.



OBSERVATIO IV.

CRYSTALLISATIO SALIS ALCALICI LIXIVOSI.



Alcalia cærulei violarum fyrupi coloris in viridem mutatione, cum acidis efferuescentia, & in medium s. enixum Sal, sæpiissime crySTALLISABILE, vnione determinari notum est, eaque quatenus ignis vi in altum euehi se patiuntur, vel eiusdem actioni resistunt, in *volatilia* & *fixa* dispesce, quamuis & hæc adhibitis

quibusdam encheiresibus & additamentis volatilifari posse, saltem ex parte, fatendum sit.

Hæc *Fixa* iterum tam originis quam proprietatum quarundam diuersarum caussa iterum distingui solent: vt aliud *minerale* audiat, in hoc regno tam acido muriatico in Sal culinare, aut vitriolico in mirabile istud Glauberi *a)* vnitum, quam nudum *b)*, forsan ex fatifcente ad aërem muriatico sale, auolante eius acido, relictum, cum profundius effossa terra, loci id suppeditantis, ab HASSELQUISTIO missa, merum Sal commune dederit *c)*; verum Alkali, alioquin mera terra habitum *d)*, quod autem vere Sal alcalicum esse DU HAMEL *e)* & Ill. MARGGRAFIUS *f)* experiri-

a) I. F. CARTHEUSER (Resp. STEINBERG) *Diff. de Sale mirabili Glauberiano natiuo.* Frf. 1764.

b) VOGEL *Pract. Mineral-System.* pag. 298.

CARTHEUSER *Elem. Mineralogia.* pag. 32.

BÜCHNER (Resp. Auct. KOCH) *Diff. non omnia salia alcalia fixa ignis progeniem esse.* Halæ 1768. §. V. seqq.

MODEL *Abhandlung vom Persischen Salze.* In *Chym. Nebenstunden.* pag. 247. seqq.

Relation succinte concernant la Terre de Debresin, pour seruir de Supplement a l'histoire naturelle du Sel lixivial mineral qui resiste au feu. Par. Mr. GLEDITSCH. In *Nouveaux Memoires de l'Academie Royale des Sciences & belles-lettres Année MDCCLXX.* Berlin 1772. p. 8 - 18.

c) CRONSTEDTS *Versuch einer Mineralogie.* Vermehrt durch BRÜNNICH. p. 152. 3.

d) NEUMANN *Chym. Edit. KESSEL.*

P. II. p. 412. §. 44. & p. 421 - 424. §§. 66 - 69.

POTT *Obs. & Animadvers. Chym.* Coll. I. Berol. 1739. p. 3. & 7. 8. Sed proxime salinam esse, facile in Alkali minerale conuertendam postea asseruit in *Neuen Anhang zur Lithogeognosie.* pag. 26.

STAHL. *Fund. Chem.* p. 62. §. 35.

IUNCKER *Consp. Chem.* Tom. alter. p. 337. nisi contradicant ibid. p. 491. 2) *a* dicta.

e) *De basi salis marini*, in ACT. PARIS. Vers. STEINMEYER. Tom. IX. p. 402 - 26. E sale marino, addito acido vitriolico, spiritum acidum destillauit, residuum sal mirabile cum carbonum puluere igne clauso calcinauit, ex hepate inde orto sulphur ope acetis præcipitauit, quod igne rursus profugauit & itaque Alkali salis marini nudum obtinuit.

f) *Erweis, dass der aus dem Kochsalze geschiedene alcalische Theil ein wirkliches Sal alcali und keine Terra alcali*

perimentis demonstrarunt. Continere tamen terram, igne mutandam, RIBOCKIUS g) autumat, quam tamen vere calcaream, e quolibet Sale culinari, maiori vel minori copia, per Alkali fixum præcipitandam, non tamen essentialem alcalici Salis partem, habendam esse quominus censeam, nil est quod impediat. Neque illud, vti quibusdam h) placet, per Alkali lixiuiofum semper præcipitari, MARHERR i) & HAGEN k) notarunt, & propria me docuit experientia, dum alcali mineralis e sale muriatico, per additam cinerum clauellatorum solutionem deliquescentia paratam, separationem & crystallisationem frustra tentavi. Idem in Sodæ sale artificiali, forsan quod Salis muriatici in plantis, e quibus ista paratur, præsentis acidum in concrematione, ob unionem cum partibus phlogisticis, ex parte ablatum sit, adest licet lixiuiofo mixtum k*), vnde etiam deliquescentiam vniuersalem alcalium notam censere videtur HENCKELIUS l), lenta tamen euaporatione separandum, dum hoc in crystallos abit. Hoc minori acredine, ex atmosphæræ actione in puluerem fatifcentia nec deliquescentia, ac faciliiori crystallisatione a sequenti differre m) præ-

alcalina sey. In *Chymischen Schriften* I. Tb. p. 167 - 189. præmissa commutatione de modo illud e sale communi obtinendo; dum scil. illud in nitrum cubicum mutauit, huiusque cum addito inflammabili detonationem instituit.

g) *Diff. de natura alcali mineralis.* Goett. 1763. Præf. III. VOGELIO habita.

h) BÜCHNER. *Diff. cit.* §. III. n. 5.

VOGEL. *Inst. Chem.* §. 575.

WALLER. in nota ad VRBANI HIERNE *Act. Chem. Holm.* T. I. p. 95. f)

i) *Chymische Abhandl. von der Verwandtschaft der Körper.* p. 56. seqq.

k) *Physicalisch-Chymische Betrachtungen über die Herkunft und Abstammung des feuerbeständigen vegetabilischen Laugensalzes.* Königsb. 1769. §. 21.

k*) Solum minerale in quadam specie reperit Cl. HAGEN: *Abhandl. von dem feuerbeständigen Laugensalze des unterirdischen Reichs.* In *Hamb. Mag.* XXV. B. p. 115 - 128.

l) in *Mineral. redinius.* p. 177. n. 8.

m) cf. BARCHUSEN *Elementa Chymiae.* L. B. 1718. p. 307.

WALLER. not. ad HIERNE cit. pag. 94. (b) *El. Mineral. Vers. Germ.* p. 234.

præstantiores Chemici *n*) & Mineralogi *o*) consentiunt.

Aliud *vegetabile* ab origine, vti *lixiviosum* a modo, quo obtinetur, dici solitum, e vegetabilium concrematorum cineribus elixiuandum, idem per totum regnum, leuem licet, quamdiu non omne oleosum ignis vi propulsum, specifica plantæ vis adhærens differentiam efficere videatur *p*), artificiale habitum *q*), quod sola ignis actione *r*), acidum plantæ cum terra, accedente inflammabili quodam, combinante, producat *s*), at educi MARGGRAFIANIS *t*) experimentis compertum *v*), nisi & hic aliquid dandum esse particulis igneis, quæ spiritibus mineralibus, qua-

n) VOGEL. *Instit. Chem.* §. 578.
BÜCHNER. *Diff. cit.* §. III.

o) CRONSTEDT *l. c.* p. 152.
V. IUSTI *Grundriss des Mineral-Reichs.* §. 265.

p) Alcalium e plantis non sat calcinatis, vt vires specificæ remanserint, elixiuatorum differentias annotavit & variarum solutionum salinarum atque metallicarum ab iis additis mutationes in adiecta tabula exposuit Celeb. GME-LIN in *Diff. de Salibus alcalicis fixis Plantarum. Comm. Petropol. Tom. V.* p. 277. sqq. inserta.

Qua de re etiam legi potest KUNCKELII *utilium observationum s. animaduersionum* Caput I.

q) STAHL. *Fund. Chem.* pag. 84. §. 35.

r) BARCHUSEN *Elem. Chem.* pag. 20. Ax. VIII.

IUNCKER. *Consp. Chem.* Tom. alter. p. 375-377.

s) cf. III. VOGELII *Instit. Chem.* §. 577. cum limitatione & 589.

BOERHAAV *Elem. Chem.* Ed. Lips. 8vo. Tom. I. p. 640.

SPIELMANNI *Instit. Chem.* p. 256.

BECHERI *Phys. subterr.* p. 377.

STAHLII *Specim. Becher.* p. 122. n. XXVIII. & p. 104.

Plura qui cupit adeat BÜCHNERI *Diff. cit.* §. II. & DELII (Resp. HÜBSCHMANNNO) *Diff. de alcali primigenio.* Erlangæ 1761.

t) Erweis, dass die Salia alcalina fixa auch ohne Glühfeuer aus dem Weinstein durch Hülfe der acidorum zu ziehen seyn. In *Chym. Schriften II. Theil* pag. 49-69. Tam ex tartari, & salis acetosellæ, quam ligni faginei rasuræ & plantarum aliquarum lixiuiis, additis acidis, Salia media obtinuit, qualia basi lixiuiosa pollent.

v) Dari Alkali fixum non artificiale iam VRBAN. HIERNE in *Tentaminum Chemicorum* Tom. II. Tentam. VI. de alcali fixi in corporibus præexistentia antequam comburuntur, contra BOYLEUM contendit, cuius §. VII. (*Observationes de alcali fixi in corporibus præexistentia sine igne*) præsertim ad Alkali minerale pertinet.

quales ii parari solent, certissime adhærent *x*), probabile videatur. Acrius hoc & magis igneum, vtpote retinens quid ex igne, cuius ope obtentum fuit, minus crystallifabile, aquæ siticulofum, vt etiam ea ex aëre attracta deliquefcant, his notis a præcedente abunde distinguitur. Deliquefcere nemo negabit & vnanimi Chemicorum consensu asseritur, e quibus BOERHAAVIUM *y*), STAHLIUM *z*), VRBANUM HIERNE *aa*), WALLERIUM *bb*), VOGELIUM *cc*), SUCKOVIUM *dd*) nominasse fufficiat. Et huic proprietati debetur id phænomenon, quod ægerrime aut vix in crystallos se cogi istud patiat, vt etiam Salium lixiuioforum crystallifationem TEICHMEYERUS *ee*), IUNCKERUS *ff*), aliique *gg*) determinate negauerint, & impossibilitatis rationes, e particularum grauitate nimia, & cohæfione iusto minore defumtas, attulerit LUDOLFUS *hh*). Sed aliter docuere alii.

Sic

x) Quod de Oleo vitrioli & Spiritu nitri fumante non facile negabitur, itidem Spiritui salis communis tribuendum erit, cum talis, ex sale communi, addito oleo vitrioli, destillatus cum aqua ita incaluerit, vt vas manu tangi nequiuert. vid. *Hamb. Magazin. XV. Band. p. 9.*

y) *Elem. Chem. Tom. I. p. 637. cf. p. 649.*

z) *Specim. Becher. p. 124. n. LII.*

aa) *Act. Chem. Holm. Tom. I. pag. 75. 76.*

bb) *Mineralogie. Vers. Germ. pag. 234. 3 Anm. 2)*

cc) *Instit. Chem. §. 571.*

dd) *Entwurf einer physischen Scheidekunst. p. 38.*

ee) *Instit. Chem. p. 171.*

ff) *Conspect. Chemiæ. T. I. p. 559. Pars II.*

n. 7. & T. II. p. 378. n. 12.

gg) BARCHUSEN *Elem. Chem. pag. 96. 111. & p. 370.*

SCHULZ *Chemische Versuche. p. 9.*

WALLERIUS *Chem. Phys. P. I. pag. 249. §. 9.*

Idem legendum est in BÜCHNERI (Resp. Auct. THEBESIO) *Diff. de Crystallifatione. Halle 1758. §. IX.* qui etiam nunquam crystallos obtinendas affirmat, & si quæ obtineantur §. XI. Sali medio latenti, vel ab acido aëreo generato tribuendas censet.

hh) *Einleitung in die Chemie, pag. 547. & crystallos ex Sale tartari obtinendas Tartarum vitriolatum esse notat.*

Sic etiam repetitis alcalici lixiui inspissationibus & solutionibus, si quod crystallifatum fuit separetur, remane-

Sic vt familiarem pharmacopoeis encheiresin Salis Abfinthii aliorumque lixiuioforum, ope sulphuris prunis iniectioni, crystallifandorum ii) taceam, vbi minime alcalicas crystallos, sed sal medium, ex vnione alcalici salis cum acido sulphuris vapore ortum, obtineri cuilibet rerum chemicarum quodammodo gnaro patebit, iam BOHNIUS lenta ad cuticulam, non-rumpendam, euaporatione crystallos parari posse egregias perhibuit, quales sibi natas per annos conseruauerit, etiam in loco frigidioris atque interdum humidioris hyeme sepositas kk); nec non illam crystallisationis salium, per additum spiritum ardentem, facilitandae encheiresin etiam alcalicorum salium in crystallos reductionem adiuuare docuit ll), quod itidem Cl. HAGEN confirmat mm). Nisi mediae indolis illae fuerint, quas obtinuit, crystalli, quales in lixiuiosis salibus haerere atque eorum deliquescentia vel solutione, & inspissatione ad pelliculam, indeque oriunda salis enixi crystallisatione, iteratis vicibus institutis, separandas esse BOERHAAVE nn), STAHLIUS oo), alique docuere. Neque recedere videtur SPIELMANNUS, qui itidem hunc BOHNII modum altiori scrutinio dignum iudicat pp).

Non

re tandem quod in crystallos cogi nequeat, etiam KUNCKELIUS monuit in *Lab. Chym.* pag. 158.

Cf. IUNCKERI *Consp. Chem.* Tom. alter. p. 363.

ii) cf. QUELMALZ (Resp. HAHN) *Diff. de Salibus falsis seu mediis.* Lips. 1741. §. 36.

IUNCKERI *Consp. Chem.* Tom. alt. p. 367. n. 29.

kk) *Diff. Chymico-Physicarum* XIII.

de Vittrificatione & Crystallisatione. §. 27.

Num huc pertinent a STAHLIO in *Fund. Chem.* pag. 86. periodo tertia dicta?

ll) l. cit. §. 29.

mm) l. cit. §. 24.

nn) *Elem. Chem.* p. 642.

oo) *Opusc.* p. 321.

pp) *Instit. Chem.* p. 197.

Non adeo diuersam methodum proposuit Celeb. MONTET
 qq) Salis alcalici, e Tartaro probe exusto elixiuati, in ampliori
 vase, furno immisso, lenta, calore ebullitione minore, euapora-
 tione ad fortem pelliculam glaciale, tumque conseruato leni
 calore, sub lenta refrigeratione in crystallos valde regulares co-
 gendi, aquam in sicco loco non attrahentes, in frigido tamen
 conseruandas, cum calido ne liquecant timeat. Sed hexædras
 iis tribuit pyramides atque prismata, vt legenti facillime dubita-
 tio oriatur, annon Sal medium istæ fuerint, a Tartaro vitriolato
 parum diuersum, cum huius forma determinata talis esse soleat,
 alcalicorum vero Salium alia. Cæterum se inuentorem putat
 esse, & primum detexisse methodum Alkali fixi vegetabilis cry-
 stallifandi, cum nulli Chemici hac de re locuti sint rr), & recen-
 tissimi GALLORUM negent, quamuis iam ante MONTETUM eius
 crystallifationem docuerit CARTHEUSERUS.

Hic enim iam anno 1757. ss) vnanimem Chemicorum de
 non succedente eius crystallifatione consensum, postquam nota-
 vit, methodum tamen tradit quo id obtineri possit crystallifatum;
 vt scil. Alkali lixiuiosi solutionis, affusa aqua paratæ, vel per de-
 liquium obtentæ, partibus quatuor vna Spiritus salis ammoniaci
 aquosi, cum Alkali fixo parati, vel alius Salis alcalici volatilis ad-
 datur, quod mixtum, si leni calore digeratur, profugato Alkali
 volatili & fluido ad semissem exhalato iam incipiat crystallifatio-
 nem;

I 2

qq) De methodo Alkali fixum tartari crystallifandi. In ACT. PARIS. Ann. 1764. p. 576-579. Translat. in *Mineralogischen Belustigungen*. 3 Th. pag. 397-401.

rr) Sed annon iam similem metho-

dum proposuit IUNCKERUS in *Consp. Chem.* Tom. alt. p. 368?

ss) *Obs. chemico-physica de crystallifatione salium alcalium fixorum*, in ACT. MOGUNT. Tom. I. p. 149.

nem; qua via crystallos obtinuerit vere alcalicas, quamuis quod ad aërem in deliquium non abierint dubium moueri possit, friabiles illas, cæterum oblongas, compressas, vtrinque obtusas s. truncatas, tetraedras, vt tamen duo latera opposita latiora fuerint. Rationem in eo ponit, vt terræ alcali fixo iunctæ portionem per volatile illud deiici, hinc isto exhalato fixum, superflua terra orbatum, nunc facilius crystallisationem subire putet, quamuis mihi quidem paululum aliter hac de re sentiendum esse videatur, & ad igneas particulas in alcalico sale præsentis respiciendum, quæ si maiori proportionem adsint, crystallisationi obstantes, addito Alkali volatili (quod inter & igneum principium arctiorem adesse affinitatem citior magisque perfecta mercurii solo igne calcinati, per hoc quam fixum, reuificatio *tt*) probabile reddit) demi, hinc remoto impedimento nunc alcalicum sale fixum in crystallos abire posse, haud improbabile videtur, quin salis alcalici mineralis, postquam cum calce fusum fuerit, inde nata deliquescenti facultate confirmatur *vv*).

Addidit huic commentationi MANGOLDUS se salis tartari solutione & inspissatione septies repetitis pellucidam obtinuisse massam, in qua diffracta crystalli adfuerint, cuius phænomeni simile mihi contigit cum mercurii per cinerum clauellatorum solutionem deliquio obortam reuificationem *xx*) ope coctionis absoluere tentarem, vbi, cum phialæ orificium non obturauerim, aquæ portio coctione exhalata & Sal remittente caloris gradu in massam pellucidam fuit congelatum, inæqualem illam crystallis gracilibus splendentibus, vt videbatur tetraedris, (duobus lateribus

oppo-

tt) *Obs.* I. Exper. IX. & X.

xx) *Obs.* I. Exp. IX.

vv) vid. HAGEN l. cit. §. 23.

oppositis latioribus), apice oblique truncatis, hinc rhomboideis, quæ ita residua solutione liquida tectæ, sepositæ post aliquot hebdomades adhuc similes manserant non mutatæ.

Nuperrime occasione litigii de acido pingui & aëre fixo moti itidem de Alkali fixi lixiuiosi & Terræ foliatæ tartari deliquescentia & crystallisatione fuit disceptatum, & ex principiorum horum defectu & præsentia explicata fuit dicta differentia; vt etiam Alkali lixiuiosum aëre fixo saturatum non solum ita sine deliquescentia asseruari posse *yy*), sed & eius ope cum aceto paratam terram foliatam tartari non deliquescere asseruerit Cl. WELL *zz*).

Me quod attinet, quamuis omni studio ex deliquescentibus cineribus clauellatis lentissimæ ope euaporationis, leni calore æstiuo athmosphæræ in hypocaulo crystallos obtinere allaborauerim, sciens ita salia crystallisabilia in crystallos longe maiores coire, quam si euaporatio aucto calore citetur *aaa*), crystallifare tamen nequiui, sed, quæ super solutionis superficiem parietibus vitri accreuerant, crystallos minimæ dicta solutione saturatissima commoto vase ablutæ statim euanuerunt. Sed casus suppetitauit crystallos, de quibus nunc paucissima quædam dicturus sum.

Depuraueram ante sex annos aliquot cinerum clauellatorum libras solutione ac euaporatione, & inspissatum Sal igne, modo non candefaciente, prorsus ficcaueram, ac in vitro asseruaue-
ram, cuius orificium vnciam cum dimidia diametro amplum du-
plici

I 3

yy) cf. IACQUIN. *Exam. Chem.* pag. 77. 78.

zz) *Rechtfertigung etc.* p. 152. 153.

aaa) cf. STAHL *Beweis von den Salzen, dass dieselben aus einer zarten Erde mit Wasser innig verbunden bestehen.* Halle 1723. Cap. XXIX. p. 273.


plici vesica fuilla madefacta circumligata clauferam. Præteriti anni media æstate cum in vsum illam vertere vellem, reperi magna ex parte in deliquium abiisse, adeoque aquam per duplicis vesicæ poros attraxisse, cum hæc margini orificii vitri arctissime adhuc adhæreret, medio depressa. Solutionem hanc saturatissimam iure censendam duxi, ideoque grauitatem eius specificam explorauī; quare per simplicem chartam typographicam filtrare volui, sed tam illam quam emporeticam transire recusauit, quin vix madefecit, non adhærens, vt guttulæ infusæ instar mercurii viui super illam currerent, lentiori tamen motu, pinguis tactu & lenta in guttulas cum tenacitatis quadam specie diffluens, vnde decantatione contentum me esse oportuit, qui librando comperi quantitatem, spatium semilibræ aquæ replentem, viginti quinque semuncias cum quarta eiusdem parte pendere. Residuo sali, quod nondum in deliquium abierat, aquam affundendo denuo æque concentratam inde obtinui solutionem. Vtramque separatam asseruauī in lagenis vitreis subere probe obturatis, & in laboratorii loco sicco reposui, vt tamen tum æstiuī cum hiberni temporis atmosphæra calore vel frigore suo afficere illam potuerit. Hac æstate in sola illa quam per deliquium obtinui, reperi crystallos pellucidas, complanatas, ex oblongo rhombicis, solitarias, vitro non adhærentes, quas eximi parcissimamque aquam iis in filtro e charta typographica confecto superfusi, vt, si mediæ indolis illæ essent, adhærens lixiuium alcalicum ablueretur, quo facto crystallos super chartam typographicam siccaui. Lixiuium istud, cum librarem, vix grauitate specifica comperi imminutum. Crystallos fragiles fuerunt, lubricæ s. pingues

gues tactu, in ore facillime liquefcentes, lixiuiofum saporem edentes, in vitro, cuius lumen fubere obturatum erat, loco ficco non mutatae, in aperto tamen in cellam fubterraneam reposito aliquot dierum fpatio deliquefcentes, cum acidis efferuefcentes, mercurium in aqua forti folutum fulphurei coloris praecipitantes, vere igitur alcalicae fed a citatorum Auctorum cryftallis in eo diuerfae, quod noftrae in aere humido attracta aqua in liquorem abierint.

Haec funt, quae mihi contigerunt. Corollaria ex vnico experimento non tamen certe deducenda omittere maluero. Multa tamen auolantibus particulis igneis danda effe & inde elucefcit, quod haec cryftalli mercurium ex aqua forti pallidi f. fulphurei *bbb*) coloris praecipitauerint, qui additis cineribus clauellatis adhuc ficcis aurantii pulueris forma fundum petiit.

bbb) Aurantium quidem notat Clar. WELL *Rechtfertigung etc.* p. 101. colorem mercurii fublimate Alkali vegetabili cryftallifato & oleo tartari per deliquium, qui a lixiuio cauftico pallide flauo praecipitatus fuerit. Sed multa pendent a proportione. In noftro experimento itidem mercurius ex aqua forti tum per dictas cryftallos, cum per deliquefcens Alkali lixiuiofum aurantii

coloris fuit praecipitatus, fed tantum ob nimiam horum copiam additam, dum reafufa folutione mercurii in pallidum redibat, vere fulphureum. Quem vero per ficcis cineres clauellatos praecipitaueram, licet plus folutionis mercurii adderem, femper magis ad rubedinem vergentis fuit coloris, qualem & STAHLIUS notat. *Specim. Becher.* p. 141. n. CXXI.



OBSER-

OBSERVATIO V.

MERCURIUS VIVUS IN SPIRITU VINI.

Spiritum vini mercurium viuum continere asseruit, & florum rosarum, ad fermentationem sepositorum tunc destillationi subiectorum, capitis mortui calcinati, cum eo quod transfuerat cohobati, tunc obtenta aqua rosarum elixiuati, destillati, vrinosum spiritum & aquam insipidam largientis residuo sale, ab ista affusa aqua rosarum pondere aucto, viuos mercurii globulos ostendente confirmare studuit LUDOLF *a*). Sed nullum continere, neque se quid obtinere potuisse, præter partes alembici metallici, acido spiritus vini solutas, amalgamatis forma transeuntes, sed aëri aliquamdiu expositas solum corrosum metallum relinquentes, affirmavit, & ideo LUDOLFUM castigavit MANGOLD *b*).

Mihi Spiritus ardentis alcoholisationem variis modis tentanti & instituenti iam Anno 1767 semel contigit rarissimo casu mercurium viuum ex illo obtinere. En quo modo.

Spiritum vini Gallici, qualis *Esprit* nomine ita concentratus venalis offertur, vt deflagrati quarta tantummodo remaneat pars phlegmatica, additamenti cuiusdam salini ope ab aqua sua liberaturus destillaui in vesica cuprea cum alembico & appositório s. tubo inter alembicum & excipulum intermedio e stanno purissimo

a) *Siegender Chymie* p. 14 & 18.

b) *Fortgesetzte Chymische Erfahrungen und Vortheile.* p. 32.

rissimo paratis. Obtinui Alcohol fortissimum, deflagrando ne-
vllum quidem aquæ vestigium relinquens. Excipulum sæpe mu-
taui & quavis vice, qui transiit, spiritum deflagrando indagavi,
vt, si magis aquosus transfiret, illum separatim obtinerem. Ita
versus finem operationis, obtentæ portionis, vnius alteriusue li-
bræ, semunciam in cochleari argenteo dum accensi, observaui
sub deflagratione nascentem nubem fuscescentem mucilagino-
sam, finita deflagratione abeuntem in massam puluerulentam ni-
gricantem, hinc inde mercuriali globulo minimo nitentem; præ-
ter quam vna alteraue phlegmatis guttula relicta erat. Miratus
phænomenon insolitum, & citata LUDOLFI legisse memor, ob-
parcam massæ istius copiam remanentem, vt paullo maiorem ob-
tinerem, aliquot semuncias dicti spiritus in eodem cochleari de-
flagraui. Collegi itaque pulverem, qui, cochleari calefacto, a
parco phlegmate liberatus atque siccatus aureum nummum sta-
tim in superficie dealbavit (*verquicken* vocant) vt verus mercuri-
us vius, quin in isto adestet, non dubitauerim. Interim cum
forfan cochleari metallico quædam tribuenda esse censerem, ite-
raui experimentum deflagrationis in vase murrhino, sed idem e-
ventus. Afferuaui hunc spiritum in vitro subere clauso, & post
aliquot septimanas veros globulos mercurii viui in fundo vitri re-
peri, adhuc, cum ante breue tempus hunc spiritum afferuatam
lustrarem, præsentem.


Ergo verum mercurium viuum continuit hic spiritus vini.
Sed quomodo? Adeste mercurium viuum in spiritu vini, qua-
tali, vix erit qui affirmet. Neque in additamento fuit, neque,
si adfuisset, quomodo a spiritu vini solui, & ita solutus in altum

euehi potuerit concipere licet. Sique e stanno alembici & rostri intermedii placeret, mercurificationis exemplum foret notatu dignissimum, & tamen qui in spiritu vini solutus sustineri potuerit ambigua res. Neque sæpius hoc mihi obseruandum se præbuit, licet cum spiritu & additamento eodem in iisdem vasis operationem iterauerim. Explicationis, quam difficilem censeo, infidæ periculum facere noluerò. Neque etiam omnium phænomenorum explicatio semper exigì potest; sed vbi illa solidis argumentis superstrui nequit, præstabit sine illa enarrasse phænomenon, si quod rarius & notatu dignum fuit, quale hoc esse, quod iam adduxi, facile quis concedet.



OBSERVATIO VI.

SALIS MEDII LIXIVOSO-VITRIOLICI E CINERIBUS CLAVELLATIS CRYSTALLISATIO.



Sal medium ex acido vitriolico & Alkali lixiuioso vario modo a) parandum, Tartarum vitriolatum dictum, a quo etiam Arcanum duplicatum, Sal polychrestum LEMERII, Lapis Prunellæ, &c. parum differunt, notum est. Tale e cineribus clauellatis obtinendum iam olim commemorauì b). Hic de eius solubilitate. Scilicet Tartarum vitriolatum frigida aqua plane non solui mul-

a) vid. NEUMANNI *Chym.* Edit. seqq.
KERSEL. Vol. IV. P. II. p. 893 & 896. b) *Obs. Prior.* XII. p. 61. seqq.

multi sunt, qui contendunt *c)*, alii ægre tantummodo solui afferunt *d)*. Solui tamen comperi, dum varias cinerum & cinerum clauellatorum species tam frigida quam calida aqua elixiuabam, ut de salis inde obtinendi indole & copia certior fierem, de quibus in posterum plura. Dederunt lixiuia cinerum clauellatorum frigida instituta itidem Tartarum vitriolatum. En quo modo.

Cinerum clauellatorum libris singulis affudi aquæ pluuiialis mensuram vnam Lubecensem, (id est libras duas Colonienfes) Iunio mense; post quatuor dies decantaui, filtraui, obtinui Lixiua grauitatis specificæ Marcæ vnus & quatuor Lothorum *e)*, excolora. Denuo affudi aquæ pluuialis mensuram vnam, post tres dies decantaui, filtraui, reperi grauitatem specificam Marcæ vnus & $1\frac{1}{2}$ Lothorum. Sic iteraui & lixiuia tantum grauitatis specificæ $16\frac{1}{2}$ Loth. fuerunt, neque amplius cum Spiritu nitri concentrato efferbuerunt. Vltima $\frac{1}{3}\frac{1}{2}$ Loth. superpondii habuerunt, insipida, ut operæ pretium non duxerim elixiuationem continuare.

Reposui has solutiones in loco sicco in lagenis subere obturatis, & Octobri mense eiusdem anni reperi Lixiua prima vix paullulum terræ vel mucilaginosum quid deposuisse; in secundis vero reperi crystallos circa Lothonem dimidium pendentes; in tertiis & vltimis nullas. Crytalli hæ exemptæ, aqua ablutæ, ficateæ, nitidissimæ erant, apicibus pyramidalibus & prismate hexaedris constantes, quarum figura referentes, in ore æger-

K 2

rime

c) cf. IUNCKERI *Consp. Chem.* T. II. p. 408. g - i.

d) Vnde etiam frigida aqua solutionem cinerum clauellatorum a Tartaro

vitriolato liberam parare docent. vid. Ill. VOGELII *Instit. Chem.* §. 593.

e) vid. *Obs.* I. not. k.

rime liquandæ, saporis amariusculi, cum acidis minime efferuescentes, solutionem mercurii viui in Aqua forti sulphurei coloris præcipitantes, vere enixæ indolis ex acido vitriolico & alcali lixiuiofo compositæ. In lixiuiis generatum non fuit hocce Sal medium, cum e solis lixiuiis secundis id obtinuerim. Ergo adfuit in cineribus clauellatis & aqua frigida solutum. Sed cur non item in lixiuiis primis? Confirmatur hac experientia thesis ista: *Salia media, quorum nexum Alcalia destruere non valeant, per Alcalia fixa ex solutione valde saturata præcipitari, f)* vnde etiam ad Tartari vitriolati crySTALLIFICATIONEM lixiuium alcalico sale paululum abundans præfertur *g)*. Ergo ob saturationem primorum lixiuiorum in illis solutum non fuit; in secunda autem ob minorem alcalici salis copiam receptum. Iam data harum grauitate specifica determinari poterit, in quam concentratione lixiuia alcalina adhuc soluant salem istum medium & in quam retineant, cum vltima lixiuia aqua grauiora hinc quid solutum continentia cum spiritu nitri tamen non efferbuerint. Sequetur inde, quod si lixiuium alcalicum ab omni Tartaro vitriolato purum desideremus, sat saturatam solutionem parandam esse, vel per deliquium *h)*, cum ea nullas mediæ indolis cryсталlos dederit *i)*, vel parca aquæ copia affusa, v. g. vt fiat grauitatis viginti Lothorum.

f) VOGEL. *Instit. Chem.* §. 772.

NEUM. l. c. p. 899 & 901.

g) BÜCHNER (Resp. Auct. VOGELIO) *Diff. de Tartaro vitriolato*. Halæ 1762, §. VI.

h) LUNCKER. *Consp. Chem.* T. II. p. 367.

i) *Obf.* IV.



OBSERVATIO VII.

FURNUS MINERALIUM INDAGATORIUS.

Igne sæpissime exploranda est, quam penetrare non semper valent menstrua mitiora, corporum mineralis regni indoles, quam vero penitus indagare omnino est operæ pretium, cum hac vnica via ad illam, quæ in solo hoc regno locum obtinet, peruenire possimus felicitatem Systematum Mineralogicorum ita exstruendorum, vt externis figuræ, texturæ, coloris, &c. notis tantummodo ad subdiuisiones constituendas adhibitis, nisi tales sint, quæ veram corporum indolem certissime indicent (id quod forsan in posterum de crystallifatorum forma, modo magis illa obseruetur & accuratius determinetur, sperandum erit), vel vnicam specierum alias tota indole conuenientium differentiam constituent, (vti gemmas plerasque non nisi colore, duritie, textura, atque crystallorum figura distinguere callemus) ex internis s. relatione eorum ad ignem, menstrua &c. & ex compositorum mixtione explorata, classes, ordines, generaue constituentur certa, neque vaga aut fallacia, quorum characteres omnibus inferioribus respondeant, vt ex eorum nomine statim, ad specierum sub iis militantium indolem & vsum similia, certa valeat conclusio. Quamuis vero ob maximopere variantem illam compositorum mineralium mixtionem id quidem fatendum sit, species non dari in hocce regno adeo, ac in vegetabili & animali, definitas,

hinc difficulter, forsan nunquam, obtinendum fore Systema Mineralogicum, assumtis in Historia Naturali condendorum Systematum regulis ex affe respondens, & semper remansura esse, quæ inter species, genera, ordines, classes transitus constituent, eorumque limites ni tollant tamen confundant, quod etiam euasurum esse eo facilius credent quibus ex vnica terra primordiali modificata reliqua terrena orta videntur, attamen cum tamen ita exstructa Systemata non solum certitudine sua illius indagandorum eorum operæ pretium reddant abunde a), sed & maximi in

a) Obiicitur id analyticis systematibus mineralogicis, quale CRONSTEDTIANUM aliaque sunt, & Mineralogiæ studiosos deterret, quod ad corpora obuia dignoscenda experimentis instituendis opus sit. Sed nescio an facilius sit, vt exemplo thesin illustrem, primum ex notis externis spatharum genericam vel classificam sibi comparare cognitionem, (insidam tamen cum & detur quarzum adeo facie externa ad spatha accedens, vt ipse Andreasbergæ in Harcynia legens spathum censuerim donec experimentis institutis indolem eius plane alienam comperuerim,) & dein experimenta instituere, vt num calcareum sit, quod obuium sit, an gypseum, fluor aut Feldspathum; aut primum eius indolem explorare, quod sæpe minima opera, chalybe, guttula aquæ fortis, facili ignitione, perficiendum erit, atque tum, vt circa adductum exemplum persistam discere calcarea, gypsea, aliaque texturæ lamellosæ crystallifata, technico nomine quibusdam spatha audire. Neque tamen idéo aliquid detrachere voluero laudi quam merentur

Ill. Viri, de re mineralogica meriti, qui etiam externas notas diagnosticas assumere & cum internis coniunxerunt, cum & inde obseruationes earum detegendarum causæ instituendæ excitentur, indeque cognitio pluribus mineralium notis cognitio eorum augeatur omnino. Quin & præcipue in crystallifatis corporibus, figuram maximi censeo momenti, quæ forsan in posterum tum diagnosi, saltem multorum corporum, inferuire, eumeruendæ eorum genesi auxilium suppeditare poterit, vti & hodie silicearum gemmarum vix alias quam externas callemus differentias, & salia tam crystallorum forma discerni, quam huius operationis auxilio separari ab aliis & depurari posse notum est. Id tantum monendum duco, ne ex iis solis mineralia in sua agmina atque cohortes dispescamus cum, vbi id fieri potest, etiam ad vsum videndum sit, præterea etiam idem minerale rude & crystallifatum diuersam speciem efficere, vel adeo diuersis sub generibus militare posse mihi sine incommodo discantis non videatur. In organisatis vero corporibus, animalibus

in vita communi vsus sint futura, vt cognita generis indole statim illa specierum pateat, & species quæuis congeneri, quoad chemicos, metallurgicos, docimasticos, oeconomicos vsus, saltem maxima ex parte, substitui possit, & quoduis minerale, institutis ad indolem eius indagandam necessariis experimentis, facillime systematis debito loco inferi possit, ad illa obtinenda omnino esse allaborandum facile mecum consentient Mineralogiæ amantes.

Quantopere vero huic fini inseruiant operationes ignis auxilio institutæ, præter tot Chemicorum & Mineralogorum fama celebrium, circa mineralium quorundam indagaciones, specimina egregium istud, nunquam sat laudandum, Ill. POTTII opus *b)* docet, qui præsertim terrarum lapidumque, a Salibus Phlogistis mineralibus Metallis, eorumque mineris, simplicium nomine distinguere solitorum, filiceorum, puta, calcareorum, argillaceorum &c. cognitionem numerosissimis experimentis, impensissimo labore institutis, adeo auxit, vt indoles, partes constitutiæ & genesis eorum longe clariora nunc patefcant, & integræ Mineralogiæ tanta affusa sit lux, vt dum via, quam aperuerat Illust. VIR, incedentes veriora & clariora tradere potuerint recentiores Mineralogi, scientiæ huius facies abinde prorsus sit immutata & summo opere emendata.

Nondum

bus puto & vegetabilibus, utique non sufficere partium constitutarum indagatio, sed ibi externas notas ex contemplatione eorum collectas, ad illa dispescenda in usum vocandas esse lubentissime concedo & persuasum habeo.

b) Chemische Untersuchungen, welche fürnehmlich von der Lithogegnosie oder Erkenntniß und Bearbeitung der gemeinen einfacheren Steine und Erden, imgleichen vom Feuer und Licht handeln. Zweyte Auflage. Berlin 1757 4to.

Nondum tamen exhaustum esse indagationum fontem, neque omnia mineralia, hucusque nota, sufficienter explorata tot testantur dubia atque contradictiones adhuc in Mineralogia obvia. Actum igitur agere non videbuntur, qui de experimentis ulterius instituendis cogitabunt, ubi vero, uti in omni pertractatione Chemica, talia ista exponenda sunt, quæ ab aliis iterari possint, quapropter tum encheireses in usum vocatæ, si quæ aliquis sint momenti, & menstruorum indoles ac concentratio, vel si minus cognita ista fuerint, parandi methodus, erunt enarrandæ, cum instrumenta adhibita describenda & ignis, si eius ope quæ effecta fuerint, gradus determinandus.

Hoc ultimum vero duplici tantum effici poterit modo, ut scil. instrumentorum adhibitorum, quo furnos præsertim refero, structura exponatur, vel unius alteriusue mineralis notissimi, eodem modo tractati, eidemque ignis gradui expositi mutationes simul enarrentur, ut inde relativa corporum exploratorum indoles deduci queat.

Delineatos ideo atque descriptos tradiderunt, ut alios taceam, furnum anemium a se adhibitum Ill. POTTIUS *c)*, suumque, ustulationibus, calcinationibus, vitrificationibusque instituendis adaptatum KRAMERUS *d)*, cuius ultimi icon etiam a WALLERIO *e)* tradita. Quamvis vero POTTIANUS ille lapidibus, terris &c. ignis ope indagandis videatur suffecturus, KRAMERIANUS quoque multis in casibus adhiberi possit, attamen cum in

POTTI-

c) Zweyte Fortsetzung der Chymischen Untersuchungen etc.

Tab. VI. Descript. vid. ibid. pag. 353. seqq.

e) Chem. Phys. P. I. Tab. 4, Fig. 104.

d) Elem. Artis Docimasticæ. P. II.

cf. p. 85. (Edit. Lat.)

POTTIANO vnicum duntaxat eodem tempore institui possit experimentum, tam nimis protractum requiretur tempus pro absolvenda plurium mineralium indagatione, quam vix certe determinandum erit, vtrum in omnibus experimentis institutis idem ignis gradus sit adhibitus, hinc corpora respectu indurationis, vitrificationis aliarumque, quam ab ignis actione experiuntur, mutationum, maiorum vel minorum, plurium vel pauciorum, minus accurate cum se inuicem poterunt comparari; KRAMERIANUS vero ille, pluribus licet inferuiat experimentis simul instituendis, suis tamen cum etiam prematur incommodis, operæ pretium erit, neque Chemicis, vt spero, ingratum, hic exponere Furnum quo magis commode obtineri possit scopus desideratus.

En igitur pertractationem Furni, TAB. II. delineati, ad furnorum variorum, pro lateribus, operibus figulinis, Fayencinis *f*), pseudo-porcellaneis, murrhinisque coquendis vsitatorum regulas vniuersales exstructi, sed proprio ac speciali vsui accommodati, in quo non solum plurima tempore & gradu ignis iisdem institui possunt experimenta, sed & terrena vasa, ad chemicos labores necessaria, coqui; cuius primum structuram sum descripturus, dein ignis in illo excitandi, alendi, & dirigendi modum expositurus, vsum eius ac notas præstantiores subnexurus; experimen-

f) Barbaro vti liceat vocabulo, operum ex argilla communi subtiliori cinerea vel cærulescente, ignem experta pallide flauescente, paratorum, vitro saturnino-ioniali obductorum pigmentisque variis exornatorum suppellectili domesticæ adaptatorum, *Fayence* a loco vbi prima parata fuerunt dici soli-

torum, cum melius nomen non succurrat. Pseudo-porcellanam enim vocare maluero, semivitre facta illa opera, opacitate tamen sua a vera porcellana diaphana s. semipellucida dignoscenda, quæ vernacula lingua *Stein-Guth* audiunt.

rimentorum autem in illo institutorum seriem alio tempore publici iuris facturus.

Structuram eiusdem quæ attinent, sequentia erunt monenda.

1.) Super pauimentum laboratorii, vel alibi super fundamentum fixum, e lapidibus apyris, vel lateribus artificialibus ex argilla Coloniensi alba, aut alia apyra, cruda eademque vsta pulverifataque, anatica proportionem mistis, paratis g), extruatur murus quadratus, crassitie trium vnciarum, includens spatium quadratum, cuius latus quodcumque Pedem Lubecensem & quatuor eiusdem Vncias æquet, vti in *Fig. 3.* videndum, quem murum externe ambiat latior ex vulgaribus lateribus in *Fig. citata* literis xxx notatus.

2.) Spatii huius quadrati fundus f. pauimentum, itidem apyris lateribus vel lapidibus vestitum, eleuatum esto super pauimentum laboratorii ad altitudinem quatuor vnciarum.

3.) Latera vero f. parietes continuentur perpendiculariter ad altitudinem Pedis vnus & Vnciarum duarum, vbi laterales (dexter & sinister, si Furnus a facie anteriori aspiciatur, quam *Fig. 1.* ostendit) abeant in fornicem, segmento circuli, trium vnciarum altitudinis, æqualem, vt itaque, anteriori & posteriori pariete continuatis rectilineis, fornicis in summo puncto supra fundum

g) A me adhibiti fuere vncias duas crassi, tres, (etiam quatuor) lati, & pedem dimidium f. sex vncias longi, qui vi experientiae sufficientem parietum furni internorum crassitiem efficiunt, quod ideo monendum duco, vt

ratio pateat cur talem nec aliam eandem determinauerim, & Furnum eiusmodi sibi comparaturi similes eligant, saltem non tenuiores fieri curent parietes apyros.

fundum s. pavementum distantia, *Foci* altitudinem determinans sit *Pedis* vnus cum *Vnciis* quinque.

4.) Anterior tamen huius *Foci* paries peruius esto *Porta*, itidem leuiter fornicata, medio arcu vnicum *Pedem* supra *Foci* pavementum alta, vt itaque lateribus pro fornicis decliuitate *Vncia* vna dematur, dimidium *Pedem* lata, integrum ex parietis *apyri* & lateritii simul sumtorum crassitie longa, cuius pavementum a *Foci* pavimento oblique descendat, vt in ostio eius tantummodo crassitiem lateris *apyri* artefacti s. duas *Vncias* altius sit pavimento *Laboratorii*. Formatur itaque *Porta inferior* pro immittendo pabulo ignis, interna parietum superficie itidem *apyris* lateribus vestita *h*).

5.) Ante hanc *Portam* vtrunque apponantur tres *Lateres* vulgati, sibi impositi *Vnciarum* nouem altitudinem efficientes, tres vero distantes, adeoque huius latitudinis *Aperturam*, quam *Portæ inferioris inferiorem* vocabo, pro admittendo aëre & extrahendis prunis ac cineribus relinquentes, terminatam illam superne latere vtrique seriei superimposito, vt solet tres *Vncias* crasso, relincente in *Portæ dictæ* (N. 4.) ostio *Aperturam*, quam dein *superiorem* dicam, pro immittendo pabulo ignis. Conspiciendi sunt hi lateres, a facie anteriori in *Fig. 1*, superiori in *Fig. 4*. (vbi x notati) basin vero *Fig. 3*. & sectionem verticalem *Fig. 2*. ostendit, vbi in vtraque literis x notati sunt.

6.) Fornicis vero *Foci* s. *Camæræ inferioris* (N. 3.) crassities sit *Vnciarum* quatuor, decliuitate vtrunque, per impositos

L 2

lateres

h) vid. *Fig. 1. 2 & 3*.

lateres apyros illi adaptatos, suppleta vt in ea altitudine obtineatur pauimentum planum f. fundus *Camerae superioris* (*des Einsetz-Gewölbes*).

7.) Perforata autem esto dicta Fornix *Foraminibus* octo quadratis verticalibus, ad fornicis margines, vti *Fig. 4. & 5.* media icon illustrent, dispositis, Vncias duas diametro æquantibus, flammam e Foco in *Cameram superiorem* admissuris.

8.) Circum pauimentum *Camerae superioris* (N. 6.) continuentur sursum parietes tum interni ex apyris, cum externi e vulgaribus lateribus exstruendi (*xxx notati Fig. 4.*), ita tamen vt laterales & posteriores Pedes duos cum totidem Vnciis super dictum pauimentum emineant, anteriores autem, quatenus latitudine huic cauo respondent, solummodo ad sex Vnciarum euehantur altitudinem, relinquentes ideo, inter partes vtrinque sursum continuatas, *Portam Camerae superioris* f. *insertoriam* (*Einsetz-Loch*), superne arcu tres Vncias alto terminandam, per quam *Camerae superiori* ingeri possint, quæ ignis actioni in hoc furno exponere placet.

9.) Inde a dicta parietum rectilineorum altitudine (N. 8.) nunc ad Pedis vnus cum Vncia vna altitudinem conuergant parietes furni vt Pyramidem cauam tetraëdrum forment, cuius in apice cauum quadratum quouis latere quatuor Vncias æquet. Huius *Pyramidis* parietes interni, apyri adhuc eiusdem sunt craftitiei ac qui Focum & *Cameram superiorem* intus vestiunt, externi vero, e vulgaribus lateribus exstruendi, nunc contrahi possunt ac angustiores fieri, vti in *Fig. 2. & 1.* videre licet i).

10.)

i) In furnis, quales in officinis Fagencinis in vsum vocantur, Camera superior tegi solet fornice, iterum foraminibus peruiis, quorum unicuique conus

10.) Super apicem Pyramidis dictæ continentur parietes furni in *Caminum* f. Prisma cauum tetraëdram, diametri quatuor Vnciarum, altitudinis Pedum trium cum decem Vnciis *k*), cuius parietes interni apyri sufficiunt crassitie duarum Vnciarum; externi lateres circumpositi (in *Fig. 2.* literis *xx* notati) itidem latitudine sua, vtplurimum sex Vncias æquante, sufficiunt.

11.) Anterior vero dicti Camini paries declivis reddatur ita ut antrorsum tribus Vnciis sit inferior, eum in finem ut operarius in fouea, infra describenda, ante furnum sedens flammam ex camino erumpentem videre possit.

12.) Ad manus sunt Lateres apyri longitudine dimidii Pedis, Vncias quatuor lati, (etiam aliqui angustiores) duas alti, quibus sine interposito luto sibi impositis claudi possit Porta Camere superioris (N. 8.) vti in *Fig. 1. 2 & 4.* videndum.

13.) Ita tamen ii locandi sunt, ut in media Portæ latitudine relinquantur *Aperturæ* duæ, singulæ Vncias duas latæ, altera *inferior* parietis anterioris margini summo immediate insistens, quatuor Vncias alta, altera *superior* supra finem parietum rectilinearum (N. 8.) ad summum arcum vsque patens.

L 3

Vtrique

e parvorum lapidum vel laterum, non tamen contiguum, circulis sibi impositis gradatim minoribus superfruitur, tecnico termino Coronula (*Krönchen*) vocatus; ut a fornice flammæ in camera furni superiore circulatio, impedito quodammodo exitu, promoveatur, & simul quæ foramina transit cum per coronularum dictarum lateralia spatiola inter lapillos istos reli-

cta exire debeat itidem paullulum retineatur, adeoque flammæ diutior in Camera superiore commoratio efficiatur, hinc ignis gradus augeatur. Sed in tam paruo furno his opus non est, sufficit cauum ita in pyramidem angustari, & præterea talis fornicis paratio, ob paruum spatium incommoda foret.

k) Indicatur id lineis punctatis in *Fig. 4.*

Vtrique harum aperturarum adaptetur later apyrus, vt com-
mode eximi ille possit, atque immitti.

Aperturarum istarum vsus est, vt specimina, e quibus ignis
gradus colligendus, per illas eximi possint, vnde quoque *Forami-
na tentatoria* (*Probe-Löcher*) vocantur.

14.) Adsint *Capsulae* s. vasa cylindrica plani fundi, ex anat-
ica argillae apyræ crudæ & vstæ vel arenæ mixtura, vel, si leniori
igne vti placet, argilla communi parata, diametri Pedis vnus
(computata simul crassitie parietum dimidiam Vnciam æquante),
altitudinis quinque Vnciarum cum semisse (*Fig. 5. c.*), instructa
operculis fundi semissem Vnciæ crassi, parietibus eiusdem crassi-
tiei ad vnam cum semisse descendentibus (*Fig. cit. d*) & dicta va-
sa ambientibus; vt itaque singulae capsulae operculis suis tectæ,
simul computata fundorum crassitie sex Vncias altitudine æ-
quent.

Inseruiunt eæ, vt iis ingerantur exploranda corpora, & qua-
tuor tales sibi imponi possunt in Camera superiore vti ex *Fig. 5.
a.* apparebit.

Sit inter has, quæ foramine quadrato laterali perforata sit,
ita locata vt hoc aperturæ inferiori Portæ superioris respondeat,
vti in secunda capsularum *Fig. 5. a.* delineatarum videre est.

Adsint præterea orbes similis materie, semunciam crassi,
diametro capsularum paullum minores, quibus immixtis & ter-
nis lapillis sustentatis duplex capsulis immitti potest explorando-
rum corporum ordo, si frustula altitudine capsularum multo mi-
nora indaganda.

15.) Si

15.) Si vasa autem terrea, orbiculos, patellas &c. in hoc furno excoquere, vel terrarum ad assumenda vitra metallica pronitatem tentare placet, ea quidem etiam capsulis dictis ingeri possunt, magis tamen commodi usus tunc sunt *Cylindri cavi* argillacei, ex lamina, similis cum capsulis compositionis, tres quartas circiter Vnciæ partes crassa parati, eiusdem cum capsulis altitudinis, vel duplæ, circumcirca aliquot ordinibus foraminulorum trigonorum perforati, quibus immitti possint bacilli argillacei pyramidales triquetri, orbiculos, patellas &c. sustentaturi internis punctis, quales cylindri in fabricis operum Fayencinorum adhiberi solent, ibique vernaculo nomine *Kockers* vocantur.

Ad horum usum requiruntur orbes ex simili materia parati, diametri diametro interno cylindrorum paullo maioris, marginis deterfi acuti, quorum singuli binorum cylindrorum sibi impositorum oris interponuntur, circumposito annulo argillaceo, ut fumus atque fauilla intrare & vitra metallica, si quibus obducta sunt, vel pigmenta inquinare nequeant.

Cylindrorum horum vnum simili foramine laterali, aperturæ Portæ superioris inferiori respondente, perforatum esse debere, summum autem orbe tegendum, facile colligendum erit, ut scil. specimina ignis gradum determinantia collocari possint.

De orbibus illis id adhuc notari potest centrum eorum perforatum esse debere, ut digito immisso & vnci instar flexo imponi & demi possint.

Si vero hic coniungendorum cylindrorum modus displiceat, parari possunt laminæ argillaceæ eiusdem crassitie quadratæ, quorum quoduis latus diametro cylindrorum semuncia maius, eaque

eæque cylindris interponi, sic angulis earum extra cylindros prominentibus adhuc varia imponi possunt, apertum & violentiorem ignem expertura.

Præterea ad ignis instructionem & directionem requiruntur instrumenta sequentia.

16.) Batillum f. *Afcia* ferrea, (*Fig. 6. b.*) cuius pars latior marginata, excipiendis prunis apta, a tenuiori tereti manubrio diuergat paullulum inflexa (*Fig. 6. a.*), cuius ope prunæ e Foco f. Camera furni inferiore eximi possint.

17.) Scabrum f. *Rutabulum* ferreum, manubrii teretis, lamina ad angulum rectum reflexa, in circuli segmentum curuata, instructum (*Fig. 6. d. e.*) quo cineres & prunæ super pauimentum Portæ inferioris per aperturam eiusdem inferiorem (N. 5.) extrahi possint.

18.) *Furca* ferrea, manubrii itidem teretis, cruribus duobus, post diuergentiam parallelis, per duos bacillos transuersos, deorsum curuatos, connexis instructa (*Fig. 6. c.*) ligno Cameræ inferiori immittendo inferuiens, dum hoc longitudinaliter illi imponitur, ficque ad latera Foci reicitur.

19.) Ante faciem furni anteriorem effodiatur in fundo laboratorii *Fouea*, diametro duos Pedes ampla, & totidem profunda, cuius centrum a facie furni tres pedes distet. Ne vero oræ eiusdem mutantur parietes ligno firmandi sunt, cui scopo optime satagitur si dolium maiusculum, quale ad cereuifiam conseruandam adhibetur, transuerse in duas semisses ferræ opc disseceatur, & harum altera dictæ foueæ inferatur.

Vfus eiusdem is est, vt in illa ante furnum sedeat, qui ignem alit; profunditatis vt erecto corpore pabulum ignis ingerere possit; distantiae a furno rationes ex infra dicendis patebunt.

19.) Furni, si liber circumcirca is situs est, neque muris continetur inclusus, parietibus lateralibus & posteriori addi possunt pilæ obliquæ, acuto apice ad Cameræ superioris altitudinem euanescentes, fissuras furni ab ignis æstu forsan efficiendas præcauentes.

20.) Furnus hicce exstructus esto sub Camino, cuius angustissima apertura æqualis sit foramini quadrato laterum sedecim ad viginti Vncias æquantium, ne sufficiens aëris calefacti ascensus hinc frigidi accessus sub operatione cohibeatur.

Si vero ædificia tectaue Camino isti proxima, eodemque altiora, ob altitudinem suam efficiant, vt ventorum a quibusdam plagis admotorum vis ad camini ostium reflectatur, indeque fumi celerrimus ex isto exitus impediatur, quin ille deorsum in laboratorium pellatur, vitium istud camini machina, qualem in *Vulcano famulante* describit LEUTMANNUS, erit corrigendum.

21.) Denique præsto sit copia sufficiens frustulorum ligni, abietini, vel, quod ad summum ignis gradum producendum præstat, faginei, siccissimi, Pedem longitudine non excedentium, neque Vncia crassiorum, potius tenuiorum.

Furno ita exstructo, & reliqua suppellectile in promptum collocata nunc ipsa *Operatio* sequenti modo instituitur.

Vasa coquenda vel lapides terræque &c. exploranda indantur Capsulis (N. 14.), quarum quatuor sibi imponendæ in Camera furni superiore. Harum secunda, si ab infima numerum in-

choes, foramine peruia sit, quadrato, Aperturæ inferiori Portæ superioris respondente 1). Vel si cylindros (N. 15.) in vsum vocare placet, iidem vrendis corporibus repleti imponendi sunt modo supra descripto; vbi quoque apertura eiusdem altitudinis adesto.

Foramini isti immittantur, & supremæ capsulæ imponantur *Specimina (Proben)*, scil. laminæ Lineam crassæ, Vnciam fere latæ, & vnam alteramue longæ, ex argilla, lutea, cærulea, apy-
raque & huius cum arena aut argilla apyra vsta mistione paratæ, glebis argillaceis, pedestalli vices ferentibus, infixæ vt erectæ conseruentur. Si vitris metallicis vasa obducere, vel pigmenta tentare placeat, etiam horum specimina immittenda esse, facile est colligendum.

Immissis, quæ ignem experiri animus est, nunc Porta Cameræ superioris claudatur lateribus sibi sine interposito luto impositis (N. 12.), relictis aperturis pro extractione speciminum (N. 13.), quibus tunc adaptati lateres immittendi, vt tamen hi promineant & facili negotio eximi possint, si specimina extrahe-
re, vel per aperturas gradum quo furni contenta candeant, obseruare placeat; atque nunc omnes rimæ relictæ illito extrinsecus limo obturentur.

His peractis Portæ Cameræ inferioris, (N. 4.) nondum vero ipsi Foco, ingerendæ prunæ, quarum copia per primæ horæ interuallum sensim augenda, simulque vnicum, dein duo, & tandem tria ligni frustula (cf. N. 21.) oblique Portæ dictæ imponenda, vt laterum appositorum (N. 5.) summo innitantur.

Hoc

1) conf. N. 14. dicta & Fig. 5. n.

Hoc modo primæ horæ spatio sensim omnia calefient ingesta absque rupturæ metu, quare postea ignis solo ligno alendus.

Succeffiue scilicet nunc augendus ignis gradus maiori frustulorum ligni Portæ Foci immissorum numero, qui omni semihora præterlapsa vnico frustulo augeatur, donec frustulis duodecim ad sedecim, aperturæ superiori Portæ Foci decussatim *m*) immiſſis, illa fere repleatur, id quod circiter septima vel octaua hora ab initio operationis præterlapsa obtinebitur, quo tempore ab operario ignem dirigente, in fouea (N. 19.) ante furnum sedente, cerni poterit flamma e Camino furni (N. 10.) erumpens, rubicunda, dimidii vel integri Pedis longitudine, simulque paries Foci posterior omni fuliginis nigredine deposita albissimus apparebit, quo intelligitur contenta furni iam sat esse excalefacta quæ, absque fissurarum oriundarum metu, ignem ferre possint vehementiorem.

Sic absolutus est *Ignis præparans* (*Vor-Feuer* vocant), cui nunc succedat *Ignis completus* (*das Nachfeuer*) *n*).

M 2

Hic

m) Vt aër per Portæ Foci ostia intrans flammam celerrimo motu in Focum vehat, simulque ligni frustula citissime absque multarum prunarum remanentia consumantur.

n) Methodus ignem instruendi, pro diuersa furnorum in fabricis operum argillaceorum vsitatorum structura varia quoque in vsum vocatur. Ad duas vero potissimum, respectu structuræ, reduci poterunt hi furni classes. Alii nimirum *erecti* audiunt (*stehende Oefen*) quales in fabricis Fayencinīs adhiberi solent, quorsum & noster perti-

net, vbi nimirum Camera insertoria opera ignis actioni exponenda continens (*Einsatz-Gewölbe* vocant) superior est, illique pro pavimento inseruit fornix Foci, foraminibus pro transmitenda flamma peruiā. In his, vti de nostro dixi, Ignis præparans ligno ad Portæ Foci ostium immisso alitur, & completus ligno Foco iniecto obtinetur. Reiciuntur vero ideo ligna ad latera Foci, quia ibi plurima foramina, ibique æstus magis est suppeditandus, qui in medio ob fornicem adscendentem, vel caminum progredientem vti-
que

Hic instruitur dum conseruata semper Portæ Foci aperturæ superioris per decussatim immissa ligni frustula oppletionem, ope Furcæ (N. 18. Fig. 6. c.) ad latera foci iniiciantur ligni frustula, ita quidem vt initio vtrunque vnicum duntaxat immittatur, hic autem numerus omni semihora vnico vtrunque augeatur, donec summa ignis vis in hoc furno efficienda producat, cui fini circiter tria, quatuor, ad summum sex frustula ligni vtrunque Fo-

CO

que magis concentratur, tum vt medio pauimento Foci imponi possint varia calcinanda vel semivitrificanda, vti etiam in Fayencinorum operum fabricis, eo in loco in superpositis areis marginatis ex arena formatis, non solum Frittæ species vitris metallicis parandis inseruiens *Mastichot* (*Meister-Gut*) dicta semivitrificatur, sed etiam ipsa vitra terreo-salino-metallica, quibus opera in posterum obducenda, excöquuntur, etiam silices &c. calcinantur.

Quibus vero Camera, opera coquenda continens, a latere Foci est posita, eiusque longitudo altitudinem insigniter superat, ii *decumbentes* (*liegende Oefen*) dici solent, in quibus iterum duplici modo ignis instrui potest.

Qui nempe figulis & laterum coëtoribus vsitati sunt, iis Camera insertoria & Focus eidem pauimento sunt superstructa, & tantummodo muro e lateribus alternatim foraminula oblonga rectangula relinquentibus, quem technico termino *Stender* vocant, separata. Huic muro perforato applicantur iuncta ligni frusta, & quidem vt decussatim parieti isti accumbant, vnde ita instructus ignis præparans, *Crucis ignis* (*Kreutz-Feuer*) nomine nuncupatur. Completus vero obtinetur dum

ligni frusta ope conti ferrei manubrio instructi, ductu canalium, supra apertorum, in pauimento Cameræ operum per totam eius longitudinem exaratorum in huius Cameræ cauum propelluntur, sicque validior ibi flamma producit, id quod *Schüren*, canales vero istos *Schür-Löcher* vocant.

Quos vero murrhinis vasibus coquendis adhiberi certior factus sum, eorum Cameræ insertoriæ pauimentum altius est fundo Foci, fere æqualis cum fornice eius altitudinis, cuius paries anterior quatuor foraminibus ad basin peruia est, vti & ibidem Foci fornix ad certam ante Cameram istam distantiam v. g. Pedem vnicum, est aperta tribus dissepimentis transversis duntaxat in quatuor aperturas diuisa, ante quam iterum paries instructus est, inter quem & Cameræ operum parietem anteriorem nunc spatium remanet, ligno replendum, quod, si a flamma e Foco, in quo ignis præparans instruitur, per memoratas aperturas Cameram insertoriam intrante lambatur, accenditur eiusque flamma simul in Cameram vecta ignem completum efficit, id vero prout igne consumitur, prunis relictis per aperturas in Focus decedentibus, superiacente ligno descendente suppletur continuo.

co iniecta, conseruato simul Igne præparante, sufficient. Consumto ligno immisso, tam in hoc completo igne, quam præparante illo, recens immittendum esse continuo, vix opus erit monere.

Obtentam esse summam ignis vim in furno hocce efficiendam exinde cognoscitur, si flamma Focum intrans alternis vicibus in Portæ inferioris apertura superiore recedat, vt parumper antrorsum proflire minetur. Cum enim octo illa fornicis foramina (N. 7.) coniunctim computata efficiant planum triginta duarum Vnciarum quadratarum, Camini vero furni (N. 10.) amplitudo sedecim duntaxat æquet Vncias quadratas, dupla flammæ quantitas Cameram superiorem intrabit, quæ vt eodem tempore euehatur, dupla celeritate per Caminum moueatur, necesse est. Si itaque tanta ligni quantitas iniecta, vt flamma inde oriunda non amplius per furni caminum omnis euehi possit, minori excessus gradu cis retro mouebitur, anceps quo ire determinetur, in casu autem nimii excessus, magna copia ex Portæ inferioris apertura superiore prorumpet, teste experientia. Quapropter ea alenda est flammæ copia, quæ debitam vi aëris per furnum moti euehendam parumper excedat duntaxat, vt itaque alternatim cis retro moueatur, proruptura antrorsum, attamen vi aëris accedentis superanda & per furni Caminum euehenda, quo ipso quædam flammæ in Camera superiore commoratio & circulatio promouetur, ac inde oriundus æstus operibus ingestis applicandus augetur. Iusto igitur minor est ignis vis, si flamma continuo flumine per portam Foci indeque per Cameram superiorem e camino vehitur. Neque vero augenda est ignis copia

obtento isto alternante flammæ cis retro motu, sed eadem conservanda, cum tamen maiori flammæ mole suppeditanda augeri amplius nequeat vis ignis, sed abundans flamma magna ex parte e Portæ Foci apertura superiore erumpat, præterea vero maior ligni copia tam cito confumi nequeat, hinc tam prunarum maior moles remaneat, quarum extractione, nimis sæpe iteranda, refrigeratio quominus efficiatur vix poterit impediri, quàm flammæ minor copia producat indeque vis & celeritas ignis imminuatur.

Summa ignis vis memorata, præter dictum flammæ in Porta Foci motum cis retro alternantem etiam exinde cognoscitur, quod sedens in Fouea (N. 19.) videre possit flammam exalbidam, viuidissimam, ob celerem motum apice tremulam, & valide tripudiantem quodammodo, longitudinis quatuor, etiam sex pedum, cum forti strepitu oscillatorio, qui adeo vna cum illo alterni flammæ in Porta Foci motus sono titubante ad decem & ultra passuum a laboratorio distantiam percipi potest.

Per totum vero huius operationis decursum cauendum est, ne prunæ a lignis relictæ nimis accumulentur (quod facile contingit in modo memorato ignis instructi gradu,) quo ignis vis imminueretur, quare si quæ in Foco colligantur, Ascia (N. 16. Fig. 6. a. b.) eximendæ sunt illæ, vel Rutabulo (N. 17. Fig. 6. d. e.) in Portam inferiorem antrorsum ducendæ, tunc lignis rursus foco iniectis, ne ignis interea imminuatur, lignisque aperturae Portæ superiori immixtis horizontaliter interea positis, ut flamma eorum perpetuo motu per Portam in Focum feratur, eiusdem Rutabuli ope per aperturam inferiorem extrahendæ.

Ignis completi vis cum maiori ligni iniiciendi copia non amplius intendi possit, nunc sola diutius protracta continuatione validior reddi potest actio eiusdem. Mensura desumenda a mutatione speciminum, quorum igitur, versus finem operationis, qualibet hora, vel saltem quouis bihorio elapso, vnum ex qualibet Portæ superioris apertura eximendum (quod *Proben ziehen* vocant artifices), vt inde pateat vtrum ignis vis scopo desiderato responferit, & finis imponendus sit operationi; ex vtraque vero extrahenda sunt specimina, vt si forsan, qui igne bene instructo in inferiore & superiore camerae parte idem erit, ignis gradus diversus euaserit, e comparatione speciminum determinari possit, quid faciendum sit.

Gradus itaque, ex effectu & duratione, assumere liceat tres.

Primus is erit, quo argilla lota induratur, apyraque alba talis manet, vel volatili colore tincta si fuit, illum, saltem maxima ex parte amisit, communi vero a partibus martialibus rubedo inducatur, vt, quæ cruda lutea est, rubra euadat, laterum vulgarium & operum figulinorum plerorumque exemplo, quæ vero cinerea fuit vel cærulescens, vtpote paucioribus martialibus particulis inquinata, pallide flaueat, colore vitellum oui coctum flavedine nondum æquante; omnis tamen aquam adhuc in se recipiat quodam gradu, vt lingua illi adhærescat, hinc nondum vitrificatio effecta; is tamen erit indurationis gradus, vt cohæsiō firma sit, & illisa vasa sonora sint. Massa vero ex argillæ Coloniensis & arenæ æqualibus partibus mixta fragilis adhuc manebit, nondum sonora. Cui fini obtinendo iam sufficiet ignis completus

pletus per octo horas continuatus, sique huic scopo soli obtinendo furnum exstruere placet, vix opus erit, vt tota interna furni superficies, vti in sequentibus gradibus adhibendis requiritur, & a me descriptum est, apyris lateribus constet, sufficiet, si fornix (N. 6.) inde parata, & Focus (N. 2.) iis interne vestitus sit, reliqua e vulgaribus lateribus exstrui poterunt.

Secundus gradus igne completo sedecim ad viginti quattuor horas continuato efficitur. Hoc argilla communis in vitrum abit nigricans, opacum, cum chalybe scintillans, apyra vero illa alba Colonienfis (artificibus Anglicæ nomine vsitata) indurata sonora euadet, difficulter diffringenda, tunc fracturâ nitente leviter cærulescente, initium speciei cuiusdam vitrificationis monstrare videbitur, & cum chalybe scintillas dabit. Vasa ex anatica argillæ dictæ crudæ, & eiusdem vstæ atque puluerisatæ, vel arenæ proportionem parata nunc indurata erunt, sonora, atque cum chalybe scintillas largientur. Steatites purus ita induratus erit, vt itidem cum chalybe scintillet. Calcareus mutatus erit in calcem viuam, quæ vero nimiam vim ignis experta minus cum aqua incalescet. Massa tamen pro porcellana efficienda composita, qualis Berolinensis est, vel similis ex Bornholmienfi aut aliis argillis porcellanis cum debitis additamentis composita, albidissima quidem euasit, sed nondum cum chalybe scintillas dedit. Quæ vero ex argilla apyra silice & creta componitur massa, hoc gradu iam abit in optimam illam semivitrificatam pseudo-porcellanam, a diaphana s. semipellucida vera Porcellana opacitate sua diuersam, e qua parata opera copiosa ex Anglia &c. aduehuntur e) & *Stein-Guth* vocantur.

Tertius

e) Monendum hoc duxi cum ab iis distinguendæ forsan serunt lagenæ ter-

rex, itidem ad lapideam duritiem excoctæ, in quibus aquæ soteriæ circumvehuntur

Tertius demum & facile ultimus gradus is erit, qui ad Porcellanam excoquendam requiritur, diutius, facile ad triginta sex horas, protracto igne completo efficiendus, quo plerique lapides & terræ, si filiceam terram & argillam puras excipias, in vitrum perfectum abeunt, vti calcareorum & gypseorum exemplo nuperrime docuit Ill. POERNERUS *p*).

Desiderato ignis gradu obtento, qui e speciminum extractorum mutatione diiudicandus, vbi vero notandum venit opera huic igni exposita sub eius extinctione lenta adhuc magis indurari, vt postea exemta duriora sint speciminibus extractis, nunc *extinguendus* caute est ignis, & finis operationi imponendus, id quod technico termino *Abbreunen* audit.

Coniiciuntur nimirum ligna, hætenus oblique in Portæ ostio posita, longitudinaliter in illam ipsam, sique omnis flamma cessauit, adeoque fumus non amplius eructatur *q*) vtrique Portæ inferioris apertura lateribus & limo claudatur exacte, vti & si quæ ad lateres vtrique Portæ superioris aperturæ adaptatos remanserint rimæ, limo oblinendæ erunt illæ, vt itaque nullus transiens aëris motus relinquatur, sed lentissime omnia refrigerentur. Refrigerabuntur ita sensim furni contenta, vt post aliquot dies Porta inferior remotis lateribus obturantibus aperiri iterum possit, & aliquot horis abinde elapsis, superioris lateres, limo iuncturas

vehuntur, his enim duritiem & speciem vitrificationis, vti crucibulis Hassiacis, iniecito prunis sale communi, conciliari accepi.

p) Anmerkungen über Herrn BAU-

Pars II.

mé Abhandlung vom Thon. Leipzig 1771.

q) Quo alioquin si v. g. vasa vitris metallicis albis obducta furno immissa essent, hæc inquinarentur.

N

ras extrinsecus claudente separato, remoueri, adeoque aperta Camera superiori ingesta eximi & effectus operationis considerari.

Usus Furni nostri e dictis apparebit sequentes esse.

1.) Varii ignis gradus vsque ad summum vitrefactionis gradum, igne culinari efficiendum, in illo poterunt exferi.

2.) Institui possunt in illo tentamina circa argillas ad paranda inde vasa, hæcque vitris metallicis obducenda, quamuis iis postea inquinarentur alia ingesta, hinc præstet omittere omnia volatilia atque metallica igne destructibilia & in auras abripienda.

3.) Vasis chemicis parandis inferuiet, quæ, deficiente in vicina fabrica eorum, sæpe ipsi parare coguntur Chemici, præsertim si illa ab omni plumbi stannique vapore pura optantur, quo in figulinis & Fayencinis furnis e vitris metallicis, quibus istorum opera obducuntur, exhalante penetrantur.

4.) Indagari in illo possunt varia corpora, eorumque ad ignis actionem relatio explorari.

5.) Cum tam multa simul igni exponi possint, licebit in hoc furno centena experimenta eodem gradu ignis instituere, hinc maiori cum certitudine relatiuos fluxilitatis, vitrescibilitatis &c. gradus determinare.

6.) Specimina si semper ex eadem materia parentur, semper etiam in iteranda operatione idem gradus ignis obseruari poterit, &

7.) quoque aliis exactissime determinari, vt repetere possint,
si


si pro speciminibus materia notissima, v. g. argilla Colonienſis, *Featites* &c. adhibeatur.

8.) Maximopere parcitur temporis dispendio a ſæpiſſimè iterandis operationibus in furno anemio donec tot corporum ſpecies indagare poſſimus, quot hic vnico igne eodemque tempore perficere licet, quo ipſo &

9.) Sumtus experimentorum, a pabuli ignis conſumtione, operarii mercede, oriundos valde imminui eluceſcet.

Et quæ plura ſunt. Gratum mihi erit, ſi deſcriptio tradita id effecerit, vt Chemiæ amantibus labores corporum mineralium indagandorum facilitentur, adeoque ex experimentis pluribus inſtitutis & Chemiæ ac Mineralogiæ ipſis augmentum ſit acceſſurum. Mea quod attinet tentamina, quorum in hoc furno pericula feci, illa, ſi hæc placuerint, in ſequentibus Obſervationum mearum continuationibus ſucceſſiue propoſita habeo exponenda.





EXPLICATIO TABULARUM.

TABULÆ I.

Fig. 1. exhibet integrum destillationis ex retorta apparatusum, applicata simul refrigerationis methodo in *Obs. II.* exposita.

A. Facies lateralis Furni retortæ *Obs. III.* descripti, in qua etiam annulus ferreus fissuras eius præcauens, & valvis mobilibus instructæ aperturæ conspici possunt. Linea punctata *a - b* indicat altitudinem aciei superioris baculorum longitudinalium craticulæ.

B. Sustentaculum quo collum retortæ fulcitur, furca instructum.

C. Refrigeratorium appositorio vitreo applicatum, fulcro *F* sustentatum, quod fulcrum punctatis lineis tantummodo indicaui cum structura talis sustentaculi ex *Icone B* sat appareat.

D. Excipulum incumbens Circulo stramineo, qui sustentatur ab Orbe sustentaculi *E*.

G. Asser in cuius sulco defluit aqua per tubum exeuntem in Infundibulum refrigeratorii.

Fig. 2. Sectio verticalis Furni retortæ *Obs. III.* descripti, vt parietes anterior & posterior, baculi craticulæ longitudinales, catinus illique immissa retorta cum ambiente arena, punctis indicata, & baculus ferreus, cui catini pedes detruncati innituntur, x notatus, dissecta appareant, reliqua cavitates cum baculo craticulæ transuerso, eique subiecto latere tenuiori, in umbra appareat remota.

Fig. 3. Eiusdem Furni Sectio horizontalis, in altitudine Lineæ *a. b.* (*Fig. 1. A*) ficta, vt appareat craticula & parietes muri dissecti.

Fig.

Fig. 4. Facies superior Furni, deorsum visa, vt obliquum latus cum immisso catino appareat (visione tamen radiis parallelis ad basin furni verticalibus directâ) ac trabes illum sustentans, vt & parietes reliqui furni. Craticula vero inferior in umbra apparet.

Fig. 5. 6 & 7. pertinent ad methodum arenam circum retortam coacervandi pag. 60 & 61 descriptam.

Fig. 5. Furni pars superior a latere visa, vt annuli applicati & connexi videantur, vbi etiam umbra bracteas prominentes indicat.

Fig. 6. Eiusdem Sectio verticalis, vbi præter furni partem superiorem, catinus cum retorta, & bractæ alterius duplicatæ crena dissecta conspici possunt, cochleis sinistri lateris, cum feminis applicatis remotioribus apparentibus. In hac figura quoque apparet quomodo arena, punctis sparsis indicata, totum catinum repleat, & retortam intra bractæas ubique ambiat, quæ alias obliquam superficiem assumit, vti in *Fig. 2.* videndum.

Fig. 7. Integer apparatus, (Bractæ scilicet combinatæ, trabes transversales, foramina angularia, eaque transeuntes cochleæ mares quibus feminæ applicatæ) compositus, qualis is furno applicatus, visione verticaliter ad latus eius obliquum (non basin) directâ, in conspectum venit; vbi etiam lateris furni obliqui limites punctatis lineis indicati sunt, Foramen medium, maius, inseruit transmittendo retortæ collo, tunc circumcirca luto claudendum. Minus supra trabem transversam superiorem locatum, infundendæ arenæ destinatum est.

TABULÆ II.

Fig. 1. Facies anterior Furni mineralium exploratorii *Obs. VII.* descripti, vt præter parietem anteriorem, Porta superior lateribus clausa, cum aperturis, & inferioris Portæ aperturæ ab apposis lateribus relictæ appareant. Cautas furni interna qualis illa, demta verticaliter semisse, in hoc situ apparitura foret, punctatis lineis indicatur.

Fig. 2. Eiusdem furni Sectio verticalis ductu linearum *CC* (*Fig. 1. 3. & 4.*) per medium furnum ficta; vbi parietes & fornix Foci ac later
appo-

appositis incumbens dissecta apparent. Cava vero Camini, Pyramidis, Camerae superioris & inferioris, harumque Portarum cum aperturis suis, fornicisque duo foramina verticalia, umbra notata videntur. Quae lineae umbram comitantur parallela, crassitiem determinant laterum apyrorum quibus interna furni superficies vestitur. Reliqua spatia literis xx &c. notata vulgaribus lateribus exstruenda sunt.

Fig. 3. Sectio huius Furni horizontalis in altitudine Lineae *A. A* (vid. *Fig. 1 & 2.*), ubi Focus cum Portae declivi pavimento umbra notatus, parietes vero interni apyri & externi lateritii literis x notati, cum appositis lateribus apparent dissecti.

Fig. 4. Sectio eiusdem horizontalis in altitudine lineae *B. B* (vid. *Fig. 1. & 2.*), ubi Camerae superioris pavementum, octo Foraminibus in Focus ducentibus perforatum (in quo Camini aperturam & parietes internos punctatis lineis indicaui), atque Portae fundus elatior, cum lateribus furno appositis x notatis desuper visis, umbra notata sunt; Camerae vero superioris eiusque Portae parietes apyri cum lateribus apyris Portam clausuris, ut & parietes lateritii literis xxx notati, dissecti sunt conspiciendi.

Fig. 5. ostendit Capsulas.

- c. Capsula verticaliter dissecta, cum
- d. Operculo itidem verticaliter secto.
- b. Capsula operculo tecta desuper visa, pavimento Camerae superioris imposita.
- a. Quatuor Capsulae operculis suis tectae, sibi impositae in columnam, Camerae superioris cavo umbra notata circumdatam, cum foramine quadrato secundae in quo Portae superioris apertura inferior punctis indicata, quibus & eiusdem superior superne in umbra Camerae cavum significante.

Fig. 6. Instrumenta ad ignem instruendum, alendum & dirigendum necessaria.

- b. Asciam antrorsum visam.
- a. Eiusdem pars inferior a latere visa.

c. Fur-

c. Furca.

d. Rutabulum a latere visum.

e. Bractea eius desuper visa, vt curuatura appareat.

Mensura vtriusque Tabulæ significat Lubecensem cuius Pes, Parisini in 1440 lineas diuisi, æquat 1290. Conf. IÜRGEN ELERT KRUSE *Allgemeiner und besonders Hamburgischer Contorist. Verbesserte Auflage. Erster Theil. Hambarg 1761. 4to. TAB. VII. Vergleichung der Fußmaassen*, p. 361-363. Pes vero Rhenanus Parisini æquat lineas $1391\frac{1}{3}$. vid. *Hans-Vater. I. Theil. Zweyte Auflage. Hannover 1766. p. 521-554.* Lubecensi æqualis est Sundenfis.



Fig. 3.




Fig. 4.




Fig. 6.




Fig. 5.




Fig. 1.





Fig. 2.



Foll. 12. 9. 6. 3. 0.

1. 2. 3. 4. 5. 6. 7.

Ped. Lubec.

C.E. Weigel fec.

Fig. 4.




Fig. 2.




Fig. 7.




Fig. 6.




Fig. 3.




Fig. 5.






Fig. 1.



Poll. 12. 9. 6. 3. P.

3. Ped. Lubec.

C. E. Weigl. fec.



C. E. Weigel fec.

